

**NATIONAL ASSEMBLY OF
SEYCHELLES**

Tuesday 01st July 2025

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab; bonzour nou bann zofisyé Lasanble, bonzour manm piblik ki pe swiv nou ozordi. Mersi bokou pou zot prezans. Premyerman les mwan dir pou dir ki mon espere ki tou dimoun in pas en bon lafet Nasyonal e Lazournen Lendepandans. Parey nou konnen sa levennman i senbol nesans nou nasyon, e nou linite. So, mon espere ki nou'n nobou mark li dan lazwa. Mersi.

I annan osi en lot lokazyon ki nou pa kapab les pase, aköz i konsern nou. Nou selebre tou kalite lazournen. Yer ti lazournen Parlmanter, Lazournen Enternasyonal Parlmanter. E aköz sa i spesyal pou nou, mon anvi partaz en pti mesaz avan nou al dan lezot travay.

Donk, a lokazyon Zournen Enternasyonal Parlmanter mon apel tou nou Lasanble pou zwenn ansanm avek leres parلمان lemonn pou onor sa rol parلمانter ki nou'n pran.

Mon apel tou Manm pou renouvle nou langazman pou sa travay nob, koman reprezantan nou sitwayen. Mon fer sa avek realizasyon ki nou form en lenstitisyon esansyel dan Gouvernans nou pei. Nou, nou leker sa demokrasi ki nou krwar ladan e lo ki nou konte pou asire ki Lepep Seselwa i ganny gouvernen dan Lalwa e lazistis. E ki asir laliberte e drwa ki tou pep i devret zourir.

An menm tan nou devret reste konsyan ki nou bezwen reste legzanp pou nou sosyete. E sa i demann nou pou gard bann prensip e valer ki sa rol i demande lonnekte, respe, tolerans, e konpasyon. Sa lannen lazournen enternasyonal parلمانter pe obzerv tenmpo mont legalite *genre, gender equality action by action*.

Donk, en panse spesyal pou bann madanm ki'n annan kouraz pou pran sa rol malgre bann difikilte ekstra ki zot fer fas avek. E annou nou tou kontinyen donn zot nou sipor. Me pou sa lazournen mwan osi oule onor bann zonm e fanm

dan nou lenstitisyon ki travay akote nou, e sa se bann zofisye, e *staff* Lasanble. Nou kont lo zot pou fer sir ki nou akonplir sa misyon parلمانter. Mon espere ki nou tou, nou a ganny en moman pou selebre e onor nou lenstitisyon. Donk, mersi bokou.

Nou a kontinyen avek lezot... Onorab, Onorab Arissol ti'n demann mwan laparol mon pa war li lev lanmen. Ou'n pas laparol avek Onorab Georges? Tre byen. *Ok*, Onorab Arissol, mon donn ou laparol.

HON SANDY ARISSOL

Bonzour Mr Speaker. Bonzour tou bann Manm. Mon ti zisteman anvi donn laparol *LGB*.

MR SPEAKER

Tre byen. Mon rekonnet Onorab Georges.

HON BERNARD GEORGES

Mersi Mr Speaker. Bonzour Mr Speaker. Bonzour tou bann koleg Onorab, tou bann dimoun ki pe swiv nou. Mr Speaker, mon remersye ou pou donn mwan laparol bomaten. E se senpleman pou reiter e siport ou mesaz bomaten lo Lazournen Parلمانter. Nou bliye annan de fwa ki lenportans nou rol. Annefe dan

nou konstitisyon nou menm nou dezyenm brans Gouvernman. Nou vin apre Egzekitiv e avan Zidisyer.

E mon krwar nou pa devret bliy sa landrwa kardinal e santral parey ou fek dir, ki nou Konstitisyon in donn nou Lenstitisyon, e nou koman bann Manm Lasanble Nasyonal. Mr Speaker, mon annan ozordi en panse spesyal pou bann Parلمانter ki ti presed nou. E lo zepol lekel nou pe debout ozordi se zot ki'n ouver sa semen, pou nou kapab ariv kot nou ete ozordi.

E briyevman, mon ti a kontan lo lapar Lasanble an zeneral me nou *Caucus* an partikilye akot mon adres lasal ozordi *on behalf* nou *Caucus*, an ekspektasyon ki kekfw *Leader* Lopoziyon i ava osi pran laparol apre. Me pou senpleman reiter nou langazman anver bann dimoun ki'n anvoy nou isi, e renouvle sa konsyans ki nou bezwen annan ki koman Parلمانter nou travay pou nou distrik me osi nou annan en rol Nasyonal pou zwe pou fer marse demokrasi.

E fer epanouir nou pep isi dan nou pti pei. Mr Speaker, finalman mon ti a kontan osi zwenn ou, pou en parol remersiman pou tou bann *support staff* ki permet dan nou

distrik e isi dan Lasanble ki nou kapab zwe nou rol a plen. Mon remersye ou Mr Speaker.

MR SPEAKER

Mersi Onorab. Nou ava al lo pwen swivan. Prezantasyon dokiman, Madanm Clerk.

MADAM CLERK

Mersi Mr Speaker. Bonzour Mr Speaker. Bonzour tou bann Manm. Tou bann staff Lasanble osi tou dimoun ki a lekout. Bann papye ki pe ganny prezant bomaten i :

Income and Non-Monetary Benefits Tax (Amendment of Second Schedule) Regulations, 2025. (S.I. 42 of 2025)

Seychelles Petroleum Company Limited and Its Subsidiaries – Directors’ Report and Audited Financial Statements for the Year Ended December 31, 2025

Seychelles Progress Limited - Directors’ Report and Audited Financial Statements for the Year Ended December 31, 2025

Seychelles Patriot Limited - Directors’ Report and Audited Financial Statements for the Year Ended December 31, 2025

Seychelles Prelude Limited - Directors’ Report and Audited Financial Statements for the Year Ended December 31, 2025

Seychelles Pioneer Limited - Directors’ Report and Audited Financial Statements for the Year Ended December 31, 2025

Seychelles Ports Authority - Financial Statements for the Year Ended December 31, 2024

Seychelles Pension Fund – Board of Trustees’ Report and Audited Financial Statements for the Year Ended December 31, 2024

Opinion of the Auditor General on the Financial Statements of the Financial Services Authority for the Year Ended December 31, 2024.

Mersi Mr Speaker.

MR SPEAKER

Mersi Madanm Clerk. Mon aprezan pran en *matter of privilege* par Leader Lopozisyon, Onorab Sebastien Pillay.

HON SEBASTIEN PILLAY

Mersi Mr Speaker. Bonzour Mr Speaker. Bonzour tou koleg Onorab. E bonzour tou dimoun ki pe swiv Lasanble. Mon note an pasan Mr Speaker, ki ou

pa'n ofer mwan loportinite pou koz lo lazournen parلمانter. So, si ou pa'n ofer mwan, mon pa pou fer li. Baze lo lefe ki ou'n dir pou dir mon bezwen vin war ou. E mon koleg pa'n fer li, me in ganny sans fer. Mon remersi li pou son bann parol, e son bann propo. E mon swete ki sa ki ou ek li in dir i bann parol ki senser Mr Speaker.

Prezan Mr Speaker, mon lo mon *matter of privilege* premyerman mon oule koz lo size Mosyon ki ti vin devan Lasanble pou *quash S.I 31 of 2025*, mon oule met lo rikord piblik ki parey i mon koutim mon fer mon louvraz avek en o nivo lefikasite. E ki mon Mosyon ti atase avek mon let, parey mon ti a kontan fer piblik konnen.

E malgre tou sa bann demagozi ki'n arive dan Lasanble, tou keksoz ki mon ti fer ti dwat e an konformite avek Lalwa. Mon pa konnen lekel ki pa'n met mon Mosyon lo *Order Paper*, parey i ti devret ete. Me mon apresye lefe ki ou, ou ti fer sa ki nesaser aköz ou ti'n war Mosyon parey i ti'n devret ete Mr Speaker. Mersi sa i pou benefis piblik.

Dezyenmman Mr Speaker, *Order 35* nou *Standing Order* i dir ki nou annan privez pou *submit* en *PNQ*, en *Private*

Notice Question at least 6erdtan avan *Question Time*. Mon oule met devan piblik Seselwa ki sa lord pe ganny abize, par bann dimoun ki *run* Lasanble, pou fer ki si oule pou met bar dan lafason ki mon kapab fer mon travay.

Mon'n *submit* en kestyon anba *Order 31* pou *sitting* le 1 Zilyet 2025 ki lir koumsa, eski Lasanble i kapab ganny en leksplikasyon lo rezon det deryer sa sirkiler, *circular No. 5 of 2025* date le 20 Zen 2025 sorti kot Biro Servis Piblik, anba Lofis Prezidan ki pe demann en travayer servis piblik ki montre ouswa deklar son lentansyon pou debout dan en eleksyon pou pran *unpaid leave* imedyatman aköz ou bezwen demann permisyon pou ganny *reinstated*.

Sa kestyon in ganny anvoye anliny avek Premiz Konstitisyon, savedir proteksyon egal anba Lalwa ki par kont ni Prezidan, ni Vis-Prezidan e ni bann *MNA* pa pe ganny demande pou fer menm sakrifis par rapor a bann Travayer Servis Piblik kantmenm ki tou sa bann dimoun...

MR SPEAKER

Onorab, ou pe met ou *matter of privilege* - ou pe met ou *matter*

of privilege. Ou pa pe argimant ou ka.

HON SEBASTIEN PILLAY

Prezan Mr Speaker, mon privez i ganny vyole Mr Speaker. I tre kler. Mon ti *submit* sa kestryon Vandredi akòz Lendi ti en konze piblik. Gouvènmàn in annan 72^{er}dtan pou prepar li pou vin reponn sa kestryon... 72^{er}dtan piblik Seselwa ava note 72^{er}dtan. Mon pe ganny oblize menm ler mon *submit* en kestryon sitan boner pou *submit* li, mon pa konnen ki ler zot oule mon *submit* li.

E dan Lendi mon pa ni menm swiv sa prosedir 6^{er}dtan. Mon *submit* li pli boner ki 6^{er}dtan avan *Question Time*. Alors, mon ti a kontan ganny klarifikasyon, eski mon pou kapab demann kestryon lo non Lepep Seselwa? Oubyen eski ler kestryon i pou vin en lanbarasman pou Gouvènmàn kot la klerman i annan en vyolasyon drwa Konstitisyonnel sa bann travayer dan servis piblik, eski mon pou kapab demande sa bann kestryon? Se sa ki mon pe met devan ou. E ou larepons sete ki kestryon in ariv an retar...

MR SPEAKER

Be mon a donn ou larepons silvouple.

HON SEBASTIEN PILLAY

E paret ou menm pare pou diskite, ou pa ni menm pare pou eksplike ou pa'n ekout naryen e ou zis blok...

MR SPEAKER

Onorab, ou'n met ou *matter of privilege*. Ler ou'n demann ou *matter of privilege* mon'n dir ou *state* ou *matter of privilege*. E pa komans en largiman lo ka ki ou anvi fer. Annou obzerv sa premye silvouple. *Ok*, avan mon al lo ou *matter of privilege* les mwan dir pou sir sa ki ou'n met an evidans lo size *Order Paper* an relasyon avek ou Mosyon i napa okenn move lentansyon.

Mon mazine i en fot ki'n arive. E petet nou pa'n port e souvan nou fer sa, letan nou war en item lo *Order Paper* ki nou dir *ok*, sa nou konnen ki si sa e nou sote. Se setou. Napa okenn move lentansyon. Lo serten lakizasyon ki ou'n fer ki i annan move lentansyon, mon regrete ki sa ki ou'n fer sa. E mon krwar i pa zistifye, ou'n osi lev pwen lo mesaz ki nou'n pase bomaten.

Les mwan zis dir ou poudir mon ti toutafe pare pou donn ou laparol. Mon'n donn laparol Onorab sa kote, akòz

Onorab Arissol ti'n demann mwan e se tou. So, si ou ti anvi fer mesaz ou ti kapab zis fer li an bonn fwa ler ou pran laparol san ki ou bezwen akize ki nou pe vyol ou drwa. Silvouple, nou respekte ou drwa e bann lakizasyon ki nou pe toultan vyol ou drwa mon krwar i pa merite.

Prezan les mwan adres ou *matter of privilege*. Mon'n deza eksplik ou. Mon desizyon permet mwan repete pou benefis lezot Manm e osi pou piblik. E osi mon profit lokazyon pou klarifye sa size letan ki nou bezwen soumet PNQ. Annefe mon'n deza eksplike ki sa kondisyon ki PNQ i ganny soumet 6erdtan avan *Question Time* parey in ganny state dan Lasanble. Mon'n deza eksplike ki sa pa rezonnab, e i pa akseptab.

6erdtan avan *Question Time* i 3er bomaten lo en Mardi zeneralman. E 3er bomaten mon pa konnen lekel ki pou al pran PNQ pou al rod Minis pou vin reponn. E pou fer sir ki in pare pou... So, dan sa Lasanble mon'n dir mon lenterpretasyon se ki sa *Order i 6 working hours*. E *6 working hours*, mon'n fer sa kler dan Lasanble. E mon krwar nou'n swiv li ziska konmela.

Donk, dapre mwan PNQ i devret ganny soumet avek Clerk

pou mon latansyon 10er bomaten, lavey *Question Time*. Ziska konmela, mon rekonnet ki Onorab Pillay ti pe donn son PNQ ver 10er e 11er. E mon'n toultan aksepte, be 11er i limit ki mon kapab aksepte PNQ. Semenn pase, mon ti fer Onorab Pillay rapel ki Lendi le 30 Zen i en konze piblik. Alor, si i oule met en PNQ i bezwen fer li Vandredi le 27.

E Onorab Pillay ti aksepte sa. E dan *Assembly Business Committee* i ti dir i pou met son PNQ avan 10er edmi. E Vandredi Onorab Pillay ti menm telefonn mwan, i dir mwan i pe soumet son PNQ 10er edmi. Donk, ki'n arive sa voyaz vandredi, mon'n esper PNQ ziska 11er 45. Parey Onorab Pillay, in dir i ti annan apwentman avek lanbasad Ameriken, mwan osi mon ti annan lezot keksoz pou al fer.

Alor, 11er 45 ti limit ki mon ti kapab espere pou war PNQ e pou aprouve. Donk, ler mon pa ti war PNQ mon ti fer sa desizyon ki nou pou sot PNQ e mon ti donn Clerk lenstriksyon pou li *release Order Paper*. Mon repete, mon ekspekte ki ler final pou PNQ i pou 11er zour travay avan *Question Time*. Mon ti ekspekte ki sa i kler, i mon ekspekte ki e nou kapab swiv li a lavenir.

Mon krwar sa desizyon i rezonnab e zistifye. Mersi bokou. Onorab Pillay, mon pa pe pran okenn largiman, eskiz mwan. Nou a kontinyen, nou a kontinyen avek kestryon. Madanm *Hansard Reporter* ou ava apel Minis pou kestryon silvouple.

HON SEBASTIEN PILLAY

(Off-Mic)

MR SPEAKER

Onorab Pillay ou'n *state* ou *case*, mon'n donn mon repons nou'n fini. Nou'n fini.

HON SEBASTIEN PILLAY

(Off-Mic)

MR SPEAKER

Nou'n fini Onorab Pillay, silvouple. Ale mon a ekout ou *point of order* Onorab Loze.

HON JOHAN LOZE

Mr Speaker, Onorab Bistoquet sak fwa ou donn mwan laparol i met on son mikro, Pou mwan pa ganny mikro.

MR SPEAKER

Onorab, *ok...*

HON JOHAN LOZE

Mr Speaker, mon annan en *point of order* anba *Order 8* lafason ki ou pe *conduct*

Lasanble. Mr Speaker, Onorab Pillay, pe sey lev en *matter of privilege* pou koriz en keksoz ki ou'n dir ki pa *factual* konmkwa ki li i pa'n zanmen agree dan *ABC* pou soumet...

MR SPEAKER

Si i pa'n agree. Mwan mon'n dir se koumsa ki nou pou prosede avek *PNQ*.

HON JOHAN LOZE

Mr Speaker, ou'n dir...

(Interruptions)

MR SPEAKER

Order! Order silvouple! *Order!* Bon, Minis Bonzour Minis Antony Derjacques, Minis pou Transpor. Bonzour Mr Sonny Payet, *CEO Ports Authority*. Bonzour Mr Patrick Andre, ki la avek nou *Principal Secretary* pou *Land Transport*. Mr Geffy Zialor *CEO Seychelles Public Transport Corporation*. Konmsi i annan enn ki mon'n manke. *Sorry...* mon ekspekte... mersi. Onorab Arissol.

HON SANDY ARISSOL

Mersi Mr Speaker. Mr Speaker, mon ti a kontan...

(Interruptions)

MR SPEAKER

Mon'n ganny ase. Mon'n ganny ase avek lenteripsyon, avek dezord silvouple. Sa Lasanble pou mars annord. Mersi. Onorab Arissol, ou *matter of privilege* e bann Manm sa kote silvouple gad zot silans.

HON SANDY ARISSOL

Mon ti a kontan ki Lasanble i al lo rikord poudir Onorab Loze, souvandfwa i fer bann komanter *off-mic*. E la i fek fer en komanter kont enn mon Manm konmkwa i pou ganny piti avan ler. Nou annan Onorab Anne ki en manman...

(Interruptions)

HON SANDY ARISSOL

Nou annan Onorab Anne ki en madanm, parey tou madanm i pe al ganny son zanfan ler i ava ariv son ler pou li ganny son zanfan. Selman sa kalite komanter, ki Onorab Loze in fer e i abitye fer dan nou Lasanble in plis ki ler pou li aret fer dan nou Lasanble. E al kot DBS, rode aköz DBS pe kriy li lo radyo.

(APPLAUSE)

MR SPEAKER

Mersi.

HON JOHAN LOZE

I lalang Mr Speaker. Arissol i lalang parey son labitid.

MR SPEAKER

Onorab Loze, arete silvouple! Mon pa oule tann naryen ankorek ou. Nou a pran *Question Time*... napa. Nou a komans avek kestyon 125, dan non Onorab Andy Labonte.

HON ANDY LABONTE

Mersi Mr Speaker. Bonzour Mr Speaker, tou Manm koleg Onorab e Minis avek ou delegasyon. Kestyon i lir koumsa, eski Minis i kapab dir Lasanble si *parking* ki'n ganny fer vizavi *Inter Island Quay* i permanan e dan ki fason i pou ganny kontrole? Mersi.

MR SPEAKER

Mersi. Minis, ou repons. Avan nou komanse les mwan met a latansyon bann Manm ki mon krwar mon annan 15 kestyon lo *Order Paper*. E letan pou limite, i donn mwan apepre 10 minit par kestyon. Donk, mon pou bezwen ziz posibilite kestyon siplemanter an fonksyon letan ki nou annan. Minis, ou a donn ou larepons.

MINISTER

ANTONY

DERJACQUES

Mersi Mr Speaker. Bonzour Mr Speaker. Bonzour *Leader of*

Government Business. Bonzour tou bann Onorab. Mr Speaker, permet mwan en pti minit zis pou mwan felisit Lasanble Nasyonal ki yer ti zot Zournen Enternasyonal Parلمانter. Sa topik ki vin avek lo egalite, i a ker nou sistenm parلمانter kot bann madanm pli anpli i ganny rekonnet e i ganny reprezante dan Lasanble.

Lasanble i enportan, e i form parti sa 3 brans Gouvernman. E ansanm avek Zidisyer ek Egzekitiv i annan bann *checks and balances* ki fer sir ki isi Sesel nou pe viv dan en vre demokrasi. Mersi Mr Speaker. Mr Speaker, sa *parking* ki'n ganny fer vizavi *Inter Island Quay* i permanan. In ganny fer par Lotorite Port, e i pou ganny kontrole par Lotorite Port.

Sa *parking* in fer provizyon pou 250 veikil. Me a lavenir Minister avek lotorite, i pare pou revwar kapasite sa landrwa, espesyalman pou enkli plis *parking* a lavenir. Mersi Mr Speaker.

MR SPEAKER

Onorab Labonte, ou siplemanter?

HON ANDY LABONTE

Mersi Minis pou ou larepons. Minis, mon anvi remersi ou

avek ou Gouvernman pou finalman ki zot in kapab fer en *parking* ki pou ed sa landrwa, aköz nou konnen i vremen konzeste. So, petet ou kapab donn en pti pe plis lenformasyon si eski sa *parking* i pou enn ki pou peyan ?

E vremen dan ki fason petet ki i pou benefisye bann dimoun ki servi por oubyen menm petet bann *building* dan lavil. Parey nou konnen poudir *parking* dan lavil li menm li i vremen en problem? Mersi.

MR SPEAKER

Mersi Minis. Mersi Mr Labonte, Onorab. Nou'n note ki mannyer ou aktiv espesyalman pou fer sir ki i annan bann *parking* espesyalman, an konteks ou distrik. Wi, sa *parking* pou peyan. E nou pou ouver li dan mwan prosen. I depan egzaktaman kan bann lekipman pou vini.

Mr Speaker, eski CEO Por Mr Payet i kapab eksplike ki bann lekipman ki pe vini e kan *parking* nou eksepte li ouver? Mersi.

MR SPEAKER

Mersi. CEO, ou annan laparol.

CEO SEYCHELLES PORTS AUTHORITY SONY PAYET

Mersi Mr Speaker. Bonzour tou dimoun. *Parking* parey in ganny eksplike par minis pou peyan. E bann lekipman i an tranzit pou vini. Sa ki'n pas dan sa rezyon zot a war poudir i annan bann *civil works* ki pe fer pou akomod sa bann lekipman pay *parking systems*. E letan sa i ava'n ganny enstale, tre byento nou ava anonse kan sa *parking* pou ouver Mr Speaker. Mersi bokou.

MR SPEAKER

Mersi, Onorab Henrie, ou kestyon.

HON GERVAIS HENRIE

Mersi Mr Speaker. Bonzour tou dimoun. Mr Speaker, anvi kontrent later, sa *parking* lo *Inter Island Quay* i preski dan menm konteks avek *Eden Island*. E *Eden Island* nou'n vwar zot in desann anba *ground level*, konmsi anba later i annan en *level*. Apre ou annan *ground level*, apre dan konteks par egzanp *Maison Collet one floor up*. Akoz zot pa'n mazin dan sa konteks ki ti kapab *then accommodate* apepre 700 transpor? Eski i annan en kontrent finansyel ouswa i en plan lonterm ki zot pou sanz li? Mersi.

MR SPEAKER

Mersi. Minis?

MINISTER

ANTONY

DERJACQUES

Mr Speaker, parey zot tou zot konnen *SPA* in antreprann e in delivre en kantite proze enkli Lasose La Digue, Lasose Praslin bann travay par egzanp Bel Ombre ki nou pe fer bann travay partou kote. E byento konstriksyon en Nouvo Por Viktorya pou Sesel. Ler nou'n get bann finansman aktyel pou le moman, sa *parking* in kout nou apepre R6.5 milyon nou'n vwar pou le moman i bon komans avek sa 275 *parking* pou Viktorya avek English River.

Solman mon'n koz avek *CEO*, e a lavenir ler nou'n fini regard ki stratezi Por ki bann bezwen pou lavil Viktorya pou kwa pa en *paid parking* pou *multi-storey buildings*. Ki nou pou fer en *multi-storey car parks*. Selman i pou depan lo stratezi. E ki mannyer sa pou ganny enplimante. Mr Speaker, eski *CEO* osi i kapab azout lo la? Mersi.

MR SPEAKER

CEO, ou kapab azoute?

**CEO SEYCHELLES PORTS
AUTHORITY SONY PAYET**

Mersi Mr Speaker. Parey Minis in dekrir sa *parking* infer parey

nou'n vwar lo sirfas Onorab, se senpleman pou permet bann travay bann aktivite ki pe pase dan sa *zone*. E bokou dimoun antre nou ki servi semen sorti dan Nor pou vin dan sid, pou vin ver lavil, Zot a war i annan bann lagrandisman semen depi anler isi kot Lasanble ki pas devan *Independence School* ki tonm dan *roundabout* kot Ile Du Port.

E sa semen i pou agrandi 2 *Lane* monte, 2 *lane* desann ki pou pas devan kot *Inter Island Ferry Terminal* i ete. E si letan i arive nou pou vwar i annan restriksyon lo kote kot ou war tou manm piblik pe park. So, kestyon ki nou pe demande ki bor nou pozisyonn sa bann *parking* deza. Sa bann endividi *utilities*, dimoun ki servi bato ale vini lo bann zil.

E nou pe fer sa dan faz parey Minis in eksplik son lekor pou nou kapab a lavenir annan bann *parking* pli aprofondi, pli amelyore, e pli nonm pou kapab permet ki i annan sifizaman *parking* dan sa *zone* pou deservi lavil ensi deswit. Mersi Mr Speaker.

MR SPEAKER

Mersi. Onorab Pillay, ou kestyon.

HON SEBASTIEN PILLAY

Mersi Mr Speaker. Mr Speaker, prenon kont ki *parking* pou vin avek en nesesite pou protez bann dimoun protez transpor bann dimoun, aköz zot pe pey sa *parking*. Lekel ki pou asir sekirite sa *parking*? Eski se sekirite *Ports Authority* oubyen eski zot pe rod en kontrakter prive? E eski Mr Speaker, zot kapab dir nou si pou annan osi en plak ki zot pou *unveil* pou sa *parking* osi ler zot ouver li? Mersi Mr Speaker.

MINISTER **ANTONY**
DERJACQUES

Mersi Mr Speaker. Mon a komans sa larepons apre lo son loperasyon, *CEO* i ava reponn. Sa zafer plak pou kontinyen, tel ki i annan en Gouvernman ki delivre.

(APPLAUSE)

MINISTER **ANTONY**
DERJACQUES

Anba *leadership* Prezidan Ramkalawan, in delivre en kantite proze enkli, lopital, semen, *Library*, *Carnegie*, *National Library*, e pou kontinyen. Sa *weekend* in delivre ankor par egzanp Bova kot *village* kot Beau Vallon. Mr Speaker, avan sa nou'n delivre VTS. Mr Speaker, sa Gouvernman pou kontinyen

delivre e bann proze i la pou developman.

Tan ki nou devlope, tan ki nou delivre wi, nou bezwen met en plak poudir lekel ki'n *lead*, lekel ki'n met an aplikasyon. Kekfwa en zour, kekfwa en zour ler ou delivre en proze, ou osi ou ava ganny en plak. Mersi.

(APPLAUSE)

MR SPEAKER

CEO, ou pou donn leksplikasyon lo loperasyon?

CEO SEYCHELLES PORTS AUTHORITY SONY PAYET

Lo ki konsern loperasyon *parking* nou'n vwar letan in ouver pandan sa levennman Lafet Nasyonal Lendependans, nou'n ouver li tanporerman aköz ti an demann manm piblik poudir ki bor zot pou park zot transpor. E vi ki sa pa ti vin an dernyen moman, nou ti bezwen met en sekirite prive. Aköz nou bann dimoun sekirite ti vreman plen dan bann landrwa kot nou pe veye dan por ensidswit.

So, definitivman sekirite pou annan bann dimoun Por pou vey sa *parking* avek tou keksoz. Nou pou annan *camera* ki pou ganny kontrole dan en sentri, kot tou bann mouvman, bann dimoun ki vin park ki zot vwar ki zot veikil parey in arive

dan sa levennman, zot in vreman kontan. Zot in menm felisit nou poudir zot in park dan en landrwa kot i an sekirize. E zot espere ki a lavenir i annan menm prensip an plas. Mersi Mr Speaker.

MR SPEAKER

Mersi CEO. CEO Payet, mon krwar sa ti keston ki ti aplik pou ou, mon pa konnen si ou pou fer ou depar. Si ou fer li, mon dir ou mersi bokou e bonn kontinyasyon. Nou ava avans lo keston 126, Onorab Michel Roucou.

HON MICHEL ROUCOU

Mersi Mr Speaker. Bonzour tou dimoun ki pe ekout nou. Mon dir ou Minis, avek ou lekip bonzour zabitan Mont Fleuri. Mr Speaker, keston 126 i lir koumsa, eski Minis i kapab dir Lasanble ki travay ki SPTC pe fer pou agrandi servis bis dan bann sou distrik lo Mahe? Mersi.

MR SPEAKER

Mersi Onorab. Minis, ler ou pare.

MINISTER ANTONY DERJACQUES

Mersi Mr Speaker. An sa ki konsern servis bis dan bann sou distrik, SPTC i

kontinyelman fer bann evalyasyon sak fwa i resevwar tel demann. I annan serten defi ki *SPTC* pou lemoman pa kapab ofer servis bis dan serten sou distrik tel koman lapant e sirkonstans semen ki bokou fwa pa konvenab pou bis, proksimite semen avek bann alter prive ki fer li difisil pou fer okenn amelyorasyon bann semen a fen ki bis i kapab deservi sa bann larout.

Mankman *layby, wayleave*, e *turning point* pou bann bis. Proksimite sa sou distrik avek semen prensipal. Me Mr Speaker, i osi annan sa problem kot dimoun i park lo tou le de kote semen. Sa i fer li difisil pou *SPTC* rann en servis. *SPTC* i fek konplet en evalyasyon mazer pou optimizasyon servis bis an zeneral.

E sa pou kouder sa bann sou distrik. Serten sa bann servis adisyonnèl pou ganny enplimante konm swivan. Dan Mont Buxton kot Dan Lenn, Nouvelle Vallée, Glacis kot La Gogue, La Batie, Beau Vallon, Maldive, Val Dan D'Or, Dame le Roi, Mont Plaisir, Mahe. *SPTC* pou donn plis detay lo tou bann lazisteman e bann servis adisyonnèl ki pe al ganny met an mars dan bann semenn ki pe vini. Mersi.

MR SPEAKER

Mersi Minis. Ou siplemanter Onorab Roucou.

HON MICHEL ROUCOU

Minis, mersi pou ou larepons. Minis, Mont Fleuri nou annan nou apepre 5 sou distrik. Nou annan Rochon, Corgate Estate, nou annan Foret Noire, are Hermitage apre osi Kan Tobrouk. I annan en travay ki nou'n fer avek *SPTC* li menm li mon dir zot mersi pou sa. Kot nou'n fer plizyè vizit pou nou vwar plizyè bann sou distrik ki pou le moman pa pe ganny sa servis pou gete si *SPTC* i kapab donn servis sa bann zabitan.

Espesyalman i annan Corgate Estate li menm li, e nou annan Kan Tobrouk ki nou ti deza pe ganny sa servis ki apre ek letan *COVID* i ti bezwen arete, apre nou annan Rochon.

Mon pe gete avek *SPTC*, eski kan ki bann travay ki'n ganny fer pou zot vwar ek bann demars pou kapab met sa bann servis dan sa bann sou distrik. Kan eski kan *SPTC* li menm li pou komanse, oubyen ki desizyon zot in pran ki kan sa i ava ede pou soulaz sa bann dimoun dan sa bann sou distrik? Mersi.

MR SPEAKER

Mersi. Minis?

MINISTER **ANTONY**
DERJACQUES

Mr Speaker, eski *CEO SPTC* Mr Zialor i kapab reponn?

MR SPEAKER
CEO Zialor?

CEO SPTC GEFFY ZIALOR

Mersi Minis. Mersi Onorab, pou kestyon. *Ok*, wi, nou'n fer en pe travay lo bann sou distrik ki nou ti devret pou nou regarde si nou pou kapab entrodwir. Me selman i enportan pou nou kapab priyoritiz en pti pe anvi resours eksetera. E anvi lafason ki semen i ete.

I annan bann sou distrik, sirtou dan *sub Victoria* apepre viktorye ki nou regarde en pe son proksimite avek *main road*. Se alors ki nou bezwen met bann priyoritize. E osi regarde kote nou met nou resours, avan nou pran en desizyon.

Wi, Onorab, nou pou kontinyen travay pou regarde ki mannyer nou deservi bann larout. E tousala i pou depan en pti pe lo semen e osi lo kapasite an term resours. Mersi.

MR SPEAKER

Mersi. Onorab William, ou kestyon.

HON WAVEN WILLIAM

Mersi Mr Speaker. Bonzour tou bann dimoun ki a lekout. Bonzour Minis avek ou delegasyon. Minis, mon anvi demann avek ou, par lefe ki devlopman i en prosesis kontinyel, eski zot in fer en demars ouswa eski sekter prive in apros zot pou osi ofer servis ki ava amelyor en pti mon kapab dir ankor sa demann ki pe vini. Eski dan lepase in annan plizyer koze lo la, me eski i annan demann par Sekter Prive pou antre dan sa servis? Mersi.

MR SPEAKER
Mersi. Minis?

MINISTER **ANTONY**
DERJACQUES

Mersi Mr Speaker. Wi, ti annan en kantite kozri ant nou Minister Transpor avek *Omni Bus Operators*. Zot in dan lepase *operate* dan bann *secondary roads*. E nou Polisi, aktyel i *allow* zot, annefe i ankouraz zot pou zot rann en servis da bann semen kot *SPTC* avek son bann bis e menm son bann pli pti bis ki annan 30 *seaters* pa kapab antre.

Par egzanp Corgate Estate pou sorti pou al vir Corgate Estate i zis 150 met avek semen prensipal pou pran bann bis ki ase gran pou al vire 150 met

apre pou pran grannrout ankor i vremen difisil. I annan bann semen kot nou ti ava kontan ale, me pa ankor ase devlope apre dimoun pe park tou lede kote, semen i frenmen.

Alor wi, nou ankouraz bann omni bus operators, menm pou vin ansanm. E mon ti menm dir zot ti ava bon si zot lans en gran proze par egzant nou ava *allow* zot pou al Anse Aux Pins, anvil pou Anse Aux Pins. Selman zot pou *compete* avek SPTC, e mon'n ankouraz zot pou zot zwenn ansanm. E menm si zot kapab al rod finansman pou fer plis, pou ganny plis bis, plis mendev pou zot antre dan sa bann proze.

Alor Onorab nou laport, nou'n ouver laport, laport i ankor ouver. E nou ankouraz bann Sekter prive pou antre dan sa biznes. E pou regarde si zot kapab *feed* antre, antre dan sa bann *feeder roads*, dan sa bann *secondary roads*. Mersi.

MR SPEAKER

Mersi. Mersi Minis. Onorab Lemiel, nou a pran kou kestyon.

HON SYLVANNE LEMIEL

Mersi Mr Speaker. Bonzour Minis, avek delegasyon, tou mon bann koleg Manm Onorab, dimoun ki a lekout osi. Mon

kestyon Mr Speaker, mon krwar SPTC i ganny detrwa *request* parfwa ki sorti dan distrik. E sa lannen i annan bann *request* ki mwan menm mon'n fer atraver Mrs Sophola, kot bann zabitan dan distrik i demann plis ki semen i fer plis nou vwar zabitan i demann lasistans bis.

E Minis, mon'n tann ou nonm Mont Plaisir ki dan enn parmi bann ki pe al ganny revwar en pti pe son *schedule* bis. E an menm tan, mon konnen i annan Les Canelles osi ki sirtou Mr Speaker, i bann ler presi ki dan bomaten ler bann dimoun pe al travay e ler bann dimoun pou retourn travay ki petet sa demann li menm li i plis. Eski dan zot bann revizyon ki zot pe fer zot pe pran konsiderasyon bann ler ki sorti kot nou, kot Lotorite Distrik ki nou pe demande pou ki sa i ava kapab petet aranz en pti pe keksoz.

An menm tan, nou pe koz ler travay Mr Speaker, kot bann dimoun i ava kapab ariv en pti pe pli a ler. Akoz nou vwar ki bann dimoun pe demann sa bann ler bis pli granmaten? Mersi.

MR SPEAKER

Mersi. Minis?

MINISTER **ANTONY**
DERJACQUES

Mr Speaker, eski *CEO* i kapab reponn? Mersi.

MR SPEAKER
CEO, wi?

CEO SPTC GEFFY ZIALOR

Mersi Minis. Mersi Onorab. Wi, byensir letan nou pe fer sa global check nou pe gete nou bann bis, nou pe regard partou, *ok*. Sa bann landrwa ki Lotorite Distrik e osi bann *MNAs* in donnen. Sa nou'n pran an gran konsiderasyon. E ozordi letan nou'n vini nou ti pe *focus* plis avek nou bann pti sou distrik ki mannyer kestyon i vini.

Me selman parey Minis in dir dan 2 semenn, dan detrwa semenn, dan 2 semenn ki vini la nou pou anonse ki bann larout ki pe ganny *improvement*. E Anse Royale i enn bann larout ki'n ganny touse byen. Mersi.

MR SPEAKER

Mersi *CEO*. Bon, se tou kestyon ki mon kapab pran lo sa enn. Nou ava avans lo 127, Onorab Norbert Loizeau. *CEO SPTC*, mon remarke poudir - *sorry* ou ankor la. Mersi, i ankor aplike. Onorab Loizeau, 127.

HON NORBERT LOIZEAU

Mersi Mr Speaker. Bonzour Minis, ek ou delegasyon. Bonzour tou Manm. Bonzour tou zabitan Distrik Bel Air ki pe ekout mwan ozordi. Mr Speaker, mon anvi demann Minis, eski Minis i kapab enform Lasanble si *SPTC* i annan plan met en servis bis pou deservi bann zabitan ki reste Stevenson Delhomme Road dan distrik Bel Air? Mersi.

MR SPEAKER
Mersi.

MINISTER **ANTONY**
DERJACQUES

Mersi Mr Speaker. Mersi Onorab. Stevenson Delhomme *Road*, i reste enn parmi bann semen dan bann sou distrik ki annan bokou defi pou permet travay amelyorasyon semen, anfen ki bis i kapab deservi sa larout. Baze lo evalyasyon ki'n ganny fer lo sa semen, bann defi in ganny idantifye. E se enn, mankman *layby* apropiye, vi ki sa semen i ase etrwat.

Dezyenm, lespas sifizan pou permet bis vire. Trwazyenm akse pou bann bis 30 *seat* mannev lo sa larout anvi ki i annan plizyer veikil prive ki park lo sa larout. Baze lo proksimite bann later, lakaz, miray, laboutik ki'n balizaz ek semen, i fer li vreman difisil pou

Gouvernman antreprann travay amelyorasyon sa semen pou fer bis kapab donn en servis la.

O kour sa bann lannen ki'n pase, *SPTC* i par kont entrodwir servis bis an plis lo sa koridor St Louis pou benefisye sa kominoter. Mersi Mr Speaker.

MR SPEAKER

Mersi Minis. Wi, Onorab Loizeau, ou kapab met ou siplemanter.

HON NORBERT LOIZEAU

Mr Speaker, mon anvi dir avek Minis vi ki sa kestryon i fer dezyenm fwa mon pe met sa kestryon. Mon'n mete ler Gouvernman *US* ti la, naryen pa'n ganny fer pou zabitan. Le rezon ki mon pe demann sa kestryon se ki, nou bann dimoun aze ki sorti Stevenson, zot bezwen desann tou sa gran zistans.

E danze ki i annan se pou zot koup semen grannrout St Louis pou zot al lo *bus stop*. Alors Minis, vi ki dan lepase naryen pa'n ganny fer, eski nou, nou Gouvernman aktyelman zot annan plan petet pou fer serten travay ? Akoz ler mon pe gete landrwa vire i annan anler kot Romeo Quatre anler. Mon krwar pa si nou pou bezwen *siding*.

E ki travay osi zot pe fer avek lapolis vi ki sa bann transpor ki park tou dilon larout, ki fer li vin en problem se pa dimoun ki reste la dan sa landrwa. Se bann dimoun ki vin la zis zot park zot vin vann drog akote kot en lakaz.

E i annan bokou bann transpor osi ki pa pe servi ki zis ganny mete la. Ki travay osi zot pe fer ek lapolis pou kapab dil ek sa sityasyon pou ki omwen mon bann dimoun aze dan Stevenson Delhomme i a kapab ganny en servis bis? Mersi.

MR SPEAKER

Mersi Onorab. Minis?

MINISTER **ANTONY DERJACQUES**

Mr Speaker, *SPTC* in deza mont dan sa semen pou al get kot ou'n sizere, kot lafanmir Quatre. E mon a demann *CEO* si i annan okenn komanter lo la.

Lo *zebra crossing*, posibilite mon a demann *SLTA* pou al regarde si nou kapab fer en *zebra crossing*. Selman i osi dan en kontour la, pou al fer *zebra crossing* kot kontour.

Mr Speaker, mon ava demann *CEO* si *SPTC* in egzamin okenn lot posibilite. Apre mon sanse ozordi mon annan *CEO SLTA*, li osi i kapab

donn en pti *advise* Onorab lo sa semen Stevenson Delhomme. Eski *CEO SPTC* avan i kapab fer en komanter?

MR SPEAKER

Byen, nou a ekout sa 2 *CEO*.

CEO SPTC GEFFY ZIALOR

Mersi Mr Speaker. Mersi Onorab pou sa. Wi, *SPTC* in monte a detrwa repriz a diferan ler laba Stevenson Delhomme. E nou'n vwar ki i en pti pe *challenging* pou bis deservi laba anler. E kot i konsern *turning point* nou vwar poudir i annan bokou amelyorasyon i bezwen ganny fer si i annan en *turning point* pou fer.

E pou le moman nou pa pe kapab war en *turning point* pou Stevenson Delhomme, pou *SPTC*. Mersi Mr Speaker.

MR SPEAKER

Mersi. *SLTA*?

MINISTER **ANTONY DERJACQUES**

Mr Speaker, eski *CEO SLTA* i kapab donn en pti konsey? Mersi.

CEO SLTA PARINDA HERATH

Mersi Mr Speaker. Bonzour tou Manm. Parey Minis in eksplike ansanm avek Departman Transpor, nou kapab fer en vizit

pou gete si i annan en landrwa apropiye, kot nou kapab met en *zebra crossing* pou bann dimoun ki sorti Stevenson Delhomme ki bezwen koup semen pou al lot kote pou pran bis.

Selman nou bezwen get byen si i en landrwa ki apropiye avek sirtou sa semen i annan bokou kontour. E la tou le de kote i annan en kontour. So, nou ava evalye nou a gete e si i annan posibilite pou met en *raised crossing*, bokou kriter i bezwen ganny asses. Nou pa oule *slow down* trafik osi. E osi i dan en landrwa ki anpant, so lo kote sa nou ava vizite ansanm avek Departman Transpor pou nou gete.

Lo kote semen li menm, parey Minis in eksplike dan son larepons i annan en kantite landrwa ki annan bann miray, bann lakaz, eksetera kot i fer li en pe difisil oubyen enposib menm pou nou *widen* sa semen.

Lo kote *turning area*, bis 30 seater i bezwen bokou en landrwa ki bokou pli gran ki bann transpor normal. Kot transpor normal i vire anler i pa apropiye, i pa ase gran pou en bis vire malerezman. Mersi.

MR SPEAKER

Mersi. Onorab Pillay, ou kestyon ?

HON SEBASTIEN PILLAY

Mersi Mr Speaker. Mr Speaker, mwan fransman premye fwa mon tann sa kestyon vin dan Lasanble. 3 manda koman *MNA* Bel Air, naryen pa'n kapab ganny fer Mr Speaker. Kestyon pou *SPTC* Mr Speaker, dimoun Bel Air a fer zot desizyon.

Zot pe ganny demande pou met sa bann servis an plis dan sa bann landrwa. Be eski zot annan ase drayver pou zot kapab *fulfill* nesosite annan sa bann servis, oubyen eski zot annan plan pou anploy bann drayver etranze pou zot kapab *meet*? Akoz tou lede kestyon ki'n vini i konsern sa sityasyon.

Eski zot pe met bann servis adisyonnèl pou bann drayver par egzantp, mon konnen Port Launay i sipoze annan en *rest room* ki zot sipoze fer, mon pa konnen si zot in fini fer. So, ki zot pe fer pou fer ki zot kapab konplemant servis ki zot pe donnen avek efektiv ki zot annan, pou kapab delivre lo sa bann servis bis Mr Speaker? Mon zis dir i annan 3 manda naryen i pa'n fer Mr Speaker.

MR SPEAKER

Mersi. Minis?

MINISTER ANTONY DERJACQUES

Mr Speaker, dan detrwa semenn parey mon'n dir *SPTC* pou fer son bann lanons. *Management* avek *Board* ler zot fer en evalyasyon, zot pran kont *human resources* ki en ki nonm drayver. Zot pa pou promet, zot pa pou enplimant en proze ki enkli plis *frequency* bann bis avek bann nouvo larout par egzantp, san pran konsiderasyon *human resources*. Mr Speaker, eski *CEO* osi i kapab antre e reponn? Mersi.

MR SPEAKER

CEO, yes ou kapab adrese.

CEO SPTC GEFFY ZIALOR

Mersi Minis. *ok*. Lo kote resours parey nou'n dir lot fwa letan nou ti vini, sa legzersis i en legzersis optimizasyon. Savedir i pa neseserman nou pou bezwen en gran kantite drayver an plis. Me selman nou touzour annan sa ki nou apel *recruitment drive* ki nou fer. E sa nou pou kontinyen fer.

E letan ou fer sa bann legzersis koumsa optimizasyon nou vwar landrwa kot nou kapab aziste, oubyen landrwa kot nou kapab dil avek *timing*, *timing* bis. So, i pa neseserman i pou en problem lo kote

resours drayver ek bis. Me touzour nou travay lo nou *recruitment drives*. So, nou pa pou vwar en gran problem ek sa. Mersi bokou.

MR SPEAKER

Mersi *CEO*. Onorab Gabriel.

HON CONRAD GABRIEL

Mersi Mr Speaker. Mon a dir bonzour tou dimoun. Bonzour tou dimoun a lekout spesyalman zabitan Point Larue. Mr Speaker, 4an edmi mon la prezan ki Onorab i anmenn son premye kestryon. Minis, *SPTC* i fer vizit prezant serten rekomandasyon ki *SLTA* ek *Land Transport*. Ki *SLTA* ek Land Transpor i fer ek sa bann rekomandasyon, silvouple sey eksplik nou, eski zot *provide other alternativ* or ki zot fer egzakteman? Mersi.

MR SPEAKER

Mersi. Nou en pti pe depas kestryon. Minis, mon a demann ou *panel* donn en repons bref silvouple.

MINISTER **ANTONY**
DERJACQUES

Mr Speaker, ler rekomandasyon i al kot *SLTA*, *CEO* i la nou a demann li pou reponn ki *SLTA* i fer ek bann rekomandasyon.

MR SPEAKER

Thank you. CEO?

MINISTER **ANTONY**
DERJACQUES

Annefe aköz tou sa bann lorganizasyon i tonm anba mwan. Mon ava reponn. Mr Speaker, ler nou ganny en rekomandasyon sorti dan distrik parey Onorab Anne Bistoquet in fer rekomandasyon lo met lalimyer Roche Caiman, nou, nou kontakte Minister, nou kontakte *PUC* avek *SLTA*.

E ler nou bann *inspector* i regarde, e nou vwar i merite, nou met lalimyer Roche Caiman ek *Eden Village*. Se koumsa ki nou travay, nou get merit sa bann rekomandasyon ki sorti kot piblik avek bann lotorite. Nou partaz dan bann lotorite kot i konsernen e nou regarde si nou kapab enplimante ouswa non. Mersi Mr Speaker.

MR SPEAKER

Mersi Minis. Nou aprann kestryon limero 128, Onorab Audrey Vidot.

HON AUDREY VIDOT

Mersi Mr Speaker. Mon a dir bonzour Mr Speaker, tou Manm Onorab, Minis ek ou delegasyon, e tou dimoun ki a lekout. En bonzour spesyal pou zabitan Roche Caiman. Mon

byen kontan ou larepons Minis. Mon kestyon i konm swivan;

Zabitan Roche Caiman *Eden Village*, in met a mon latansyon ki dan *weekend* napa servis bis ki fer larout *highway* sirtou dan Dimans.

E sa i fer ki zot dan en sityasyon tre dezavantaze. Minis, lo lapar mon bann zabitan mon pe demande ki garanti ki *SPTC* i kapab donn zot pou ki *SPTC* i met an plas en *schedule* bis ki pou marse, dan en fason ki bann zabitan kapab ariv travay e fer bann lezot depласman ? Mersi.

MR SPEAKER

Mersi Onorab. Minis?

MINISTER **ANTONY**
DERJACQUES

Mersi Mr Speaker. I annan en pe letan deza ki *SPTC* pe aktyelman deservi bann zabitan *Eden Village* pandan *weekend*. Sa i atraver sa bann servis swivan.

Servis ki kit Viktorya pou al ver Sid an pasan par *highway* bomaten ant 7er a 7enkar. Apre midi anviron 5er apre midi. Servis ki pe kit bann destinasyon dan Sid pou al anver Viktorya an pasan par *highway*- bomaten ant 6er a 6er 45. Apre midi anviron 5er apre midi. avek lazisteman *schedule*

bis ki *SPTC* pe al enplimante, sa bann servis pou ganny mentenir.

Pou osi annan bann servis adisyonnèl ki pou ganny met dan milye lazournen. Sa bann sanzman pou ganny anonse par *SPTC* dan milye *juillet*, savedir dan 2 semenn. Mersi Mr Speaker.

MR SPEAKER

Mersi Minis. Onorab, ou siplemanter.

HON AUDREY VIDOT

Mersi Minis pou ou larepons. Mersi Minis pou konfirman poudir aktyelman la an Zilyet zot pou annan nouvo *schedule*. Mon krwar zabitan Roche Caiman pou byen apresye. Eski Minis, i kapab dir nou dan sa bann *schedule* osi si pou posib si dan letan konze piblik osi *SPTC* i kapab enkli dan sa bann *schedule*. Akoz nou konnen dan letan konze piblik osi parfwa i annan dimoun ki pe ganny difikilte pou ganny bis pou al *Eden Village*. Mersi.

MR SPEAKER

Mersi Onorab. Minis?

MINISTER **ANTONY**
DERJACQUES

Wi Mr Speaker, sa i dan nou plan. E nou pe sey fer tou sa ki

nou kapab ki *SPTC* i rann en servis ki o standar ki abordab, e ki kouper plis posib tou kwen Mahe ki nou, nou annan kapasite pou fer. Mersi Mr Speaker.

MR SPEAKER

Mersi. Onorab Bistoquet, ou kestyon.

HON ANNE BISTOQUET

Mersi Mr Speaker. Bonzour Mr Speaker. Tou dimoun a lekout. Bonzour *panel*. Minis, mon vremen apresye ki zot pe al reviz *schedule* bis. Parey ou konnen sa i en konsern ki zabitan in met devan mwan pandan ki mon'n vin reprezantan Roche Caiman. E zot in dir mwan ki plis ki 4an zot pe met sa konsern devan. E alors mon oule zis remerci ou pou ki finalman sa *schedule* pe ganny revize. Mersi.

(APPLAUSE)

MINISTER **ANTONY**
DERJACQUE

A ou tour mon osi anvi felisit bann madanm Onorab, espesyalman bann zenn parey ou, Onorab Bistoquet. E mon'n note ki mannyer ou vremen aktiv dan Roche Caiman. Mersi.

MR SPEAKER

Mersi. Onorab Larsen, mon a pran ou kestyon wi.

HON CECILE LARSEN

Mersi Mr Speaker. Bonzour Mr Speaker. Bonzour tou dimoun espesyalman bann zabitan Au Cap ki a lekout. Mr Speaker, mon ti a kontan *raise en matter of privilege*, aköz parey nou'n tann o kler dan Lasanble ki Minis in dir Onorab Bistoquet koman en Manm Proporsyonnel, in kapab pe travay dan distrik Roche Caiman.

E mwan koman en Manm Proporsyonnel mwan osi mon pa pe ganny akse ek lenformasyon dan Au Cap. E zot ti blok mon kestyon, e mon ti a kontan konnen aköz silvouple la devan Lasanble. Mersi Mr Speaker.

(APPLAUSE)

MR SPEAKER

Bon. Mwan mon napa sa lenformasyon...

(comments off-mic)

MR SPEAKER

Onorab Pillay, ou kapab reste trankil silvouple? *Order!* Onorab Larsen, mon konnen ou annan en defi, en size ki ou'n leve avek Minister Gouvernman

Lokal. Mon krwar Minister Gouvernman Lokal in donn en repons, Minis, pa kapab reponn pou li. Mersi. Onorab Arissol, ou kestyon.

HON SANDY ARISSOL

Mersi Mr Speaker. Bonzour Minis avek ou lekip. Mr Speaker, mon ti a kontan demann avek Minis, anvi ki kestyon Onorab Audrey Vidot i dir poudir napa servis bis ki fer larout *highway*. E Minis ou'n eksplike ki i annan en servis bis, sa i montre poudir *MNA* i dekonekte avek sistenm ek son distrik. I pa konnen vremen ki pe pase dan son distrik. Anvi ki in la pandan 2 manda.

Mon ti a kontan demann ou, anvi ki ou'n eksplik sa seri servis ki ou Minister avek ou bann teknisyen pe ofer zabitan Roche Caiman, mon ti a kontan demann ou eski i annan okenn demann sorti kot Lotorite Distrik par *MNA* Elekte oubyen *DA* an relasyon avek servis bis ki fason pou amelyore, kwa ki mannyer pou ed bann zabitan Roche Caiman. Mersi bokou Mr Speaker.

MR SPEAKER

Minis, wi, si ou annan keksoz pou azoute?

MINISTER ANTONY DERJACQUES

Premyerman, parey tou bann *MNA* i konnen mon bezwen fer kler ki *SLTA*, *SPTC*, Minister Transpor ler bann Onorab, ler bann *MNA* i kontakte nou, nou reponn a zot bezwen. Savedir si zot kontakte direktman Minister Transpor, ouswa *SLTA*, ouswa *SPTC*, ouswa *SPA*, nou reponn e zanmen in deza annan en konplent.

Napa okenn Onorab ki'n deza lev telefonn pou telefonn mwan, i pa'n kapab koz ek mwan. Zot tou zot in kapab fer li, e mon kontan ki dan plizyer bann miting prive piblik i annan *MNA* tou le de kote in *attend*. Alor, mon oule fer sa kler. Pou Roche Caiman mon oule osi met lo rikord ki tou lede *MNA* ki pe reprezant ouswa ki pe debout pou Roche Caiman in kontakte lotorite.

(comments off-mic)

MR SPEAKER

Order!

MINISTER ANTONY DERJACQUES

Tou le de. E Onorab Anne Bistoquet in telefonnen, in kontakte, in koz ek mwan e servis in ganny donner. Onorab Audrey Vidot in kontakte *SLTA*

direkteman, e servis in ganny donnen. Alor, mon oule met sa kler ki dan Sesel i annan en demokrasi. Sa demokrasi i annan 3 brans Gouvernman.

Tou le 3 i travay ansanm, e i annan *checks and balances* selman osi zot travay ansanm pou promosyon demokrasi ek devlopman isi Sesel. Mersi Mr Speaker.

MR SPEAKER

Mersi. 2 pti komanter. Premyerman, Minis Onorab Bistoquet pa reprezant Roche Caiman. I en Manm Proporsyonnel, i kapab koz lo lapar zabitan. I kapab adres problem dan nenport distrik, me pa koman reprezantan Roche Caiman. Alor, sa i kler. E Onorab Arissol, mon bezwen osi demann ou mon pa apresye ki bann Manm i kritik travay bann Manm lezot sa.

Si zot war poudir en Manm pa pe perform son devwar parey i pe fer, mon krwar zot devret annan respe pou travay sa Manm, met zot kestyon me selman pa fer referans... pa fer referans ki sa Manm pe mal fer. Mersi. Onorab...

(comments off-mic)

MR SPEAKER

Order! Onorab Vidot ou'n fini demann ou kestyon. Nou ava avans lo kestyon 129.

HON AUDREY VIDOT

(Off-Mic)

MR SPEAKER

Ki ou *matter of privilege* Onorab?

HON AUDREY VIDOT

Mersi Mr Speaker. Mr Speaker, mon kestyon mon'n demann li kler. Minis in reponn in dir pou dir i annan revizyon. Ou pa kapab toler Onorab Arissol vin dir poudir mon kestyon pa fer sans.

MR SPEAKER

Mon'n adres sa. Mersi. *CEO* Zialor, mon krwar se a se moman ki nou'n ariv lo dernyen kestyon. E mon pa konnen si ou anvi reste oubyen si ou anvi fer ou depar. Dan sa ka mon a swet ou bonn kontinyasyon e mersi. Bon, nou'n ariv lo kestyon 129, e sa i dan non Onorab Rocky Uranie.

HON ROCKY URANIE

Mersi Mr Speaker. Bonzour *panel*. Bonzour tou koleg Onorab. En bonzour spesyal pou tou zabitan Zil Pros ki a lekout. Mon kestyon i lir koumsa,

Anvi ki nou'n vwar nouvo *club car* ki pa neseserman afilye avek okenn *guesthouse* oubyen lotel ki'n antre lo La Digue resaman. Eski Minis i kapab enform nou Lasanble si bann propriyeter *guesthouse* e lotel ki ti'n deza fer zot laplikasyon pou *club car* si zot osi aprezan pou ganny zot *club car* pou fasilite transfer zot kliyan. Mersi.

MR SPEAKER

Mersi Onorab. Minis?

MINISTER **ANTONY**
DERJACQUES

Mersi Mr Speaker. Pou le moman i annan en moratorium dan donn nouvo permi transpor lo La Digue. Sa i pou transpor normal, e i osi pou *club cars*. Par kont sa lannen nou'n donn permi pou en *club car*, e 2 *utility electric vehicles*. Premye se pou par demann, akòz Lasante ti'n demande e i fer ki avek Servis Lopital La Digue ki ti bezwen ki en kontrakter i delivre manze ki'n kwi a bann pasyan. Alor, i ti bezwen en transpor.

Dezyenm se a demann Minister Lagrikiltir, pou 2 fermye lo La Digue, akòz zot ti pe ganny bokou problem pou kapab fonksyon efikasan lo zot laferm. E osi pou delivre zot prodwir. Apre nou'n zis donn permisyon pou bann dimoun

ki'n deza annan en permi pou sanz ouswa ranplas zot veikil. Mwan osi mon oule ki Lasanble in note ki nou pe gard sa Polisi anba *review* detanzantan. Mersi Mr Speaker.

MR SPEAKER

Mersi Minis. Wi, Onorab, ou siplemanter?

HON ROCKY URANIE

Mersi Minis, pou ou repons. Eski Minis ou annan avek ou lenformasyon konbyen *guesthouse* oubyen lotel ki'n fer laplikasyon pou *club car*? E ki diferans i annan ant *club car* avek *utility electric transport*? Mersi.

MR SPEAKER

Mersi.

MINISTER **ANTONY**
DERJACQUES

Mr Speaker, bann lot lotel ek *guesthouse* ki'n fer laplikasyon ki zot, zot napa *club car*, dernyen sif ki mon ti vwar 2 mwan pase a pepe ti annan 12 laplikasyon. Mersi.

MR SPEAKER

Mersi. I ti'n demann en kestyon mon pa tro konpran *club cars* konpare avek *utility*. I annan en repons lo la Minis?

MINISTER **ANTONY**
DERJACQUES

Yes, Mr Speaker. Mr Speaker, en *electric club car* nou pe zis regard transportasyon pasaze. E ennler zot kapab met en pti *personal luggage* ler zot pe al kot en lotel ouswa *guesthouse*. Sa *utility* pou sa 2 fermye, i annan en pti keson deryer, en pe parey selman pa parey en *pick up*. Konmsi si zot kapab met zot bann prodwir e transport zot bann prodwir lo laferm. E osi pou al vann ler zot pe rekolte.

Enn nou apel li *multi-purpose utility*, akòz i kapab anmenn en pe plis kargo. Lot i pirman pou pasaze avek son *personal luggage* parey ou konnen. Mersi Mr Speaker.

MR SPEAKER

Mersi. Wi, Onorab en leksplikasyon, klarifikasyon.

HON ROCKY URANIE

Mersi Mr Speaker. Eski Minis ou kapab donn Digwa, reasir sa bann operater *guesthouse* e pti lotel ki pa ankor ki'n fer zot laplikasyon. Kan ki zot ekspekte kapab vreman vin avek en desizyon pou vreman donn sa bann dimoun en solisyon pou zot ganny zot transportasyon? Mersi.

MR SPEAKER

Mersi. Minis, ou annan en lasirans?

MINISTER **ANTONY**
DERJACQUES

Mr Speaker, nou pe fer en revi. E annefe semenn pase a pepre 10 zour pase, sa revi in antre dan mon biro. Mon kapab dir ki i annan a pepre 5 dimoun ki ti annan *club car* oparavan ki pa pe servis ouswa in abandonn zot proze. Alor, i annan en diskresyon pou 5 ki Minister, ouswa Minis i kapab *allocate* nouvo *club car*.

Mr Speaker, sa larepons kekfwa i donn mwan en sans pou eksplike, akòz i annan *moratorium*. La Digue i en zil touristik, e i *host*, i resevwar bokou touris. Mon konnen resaman *moratorium* osi lo *guesthouse* ek bann lasanm touris in ganny revwar par Minister Touris. Sa i montre ki sa zil i ase pti. E i pe ariv lo son kapasite. Kapasite pa zis pou *guesthouse* ek lotel ek bann lasanm adisyonnèl. Me kapasite osi pou transpor.

Si nou tro anmenn devlopman touristik avek loto, veikil semen La Digue, i pou transform La Digue pou sorti en *Green Island* pou vin parey nenport zil, nenport landrwa lo Mahe ek Praslin. E sa pou touy

sa bann Lendistri Touris ki deza an egzistans ek tou bann lot lendistri ki depan lo *tourism*. Alor, nou bezwen annan prekosyon a *drwat *speed* ki kalite devlopman si i soutenab ouswa non ki La Digue i pas atraver.

Mon kontan poudir ki nou'n seye e nou'n kapab met en pe kontrol. Alor nou pa'n fer La Digue ganny transformen totalman. Selman nou konsyan osi ki bezwen kontinyen annan devlopman. Alor, Minister Touris in lev *moratorium*, rev i an tre kot Minister Transpor. Alor, i annan en diskresyon pou en pe dan sa 12 kapab ganny en transpor.

Nou ava gard sa anba *review*, e nou ava get bann priyorite. E pti a pti nou a gete ki mannyer nou kapab soulaz sa sityasyon La Digue. Mersi.

MR SPEAKER

Mersi Minis. Onorab, ou'n fer 3 mon krwar i ase. Nou ava avans lo kestyon 130, Onorab Desheila Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou Manm koleg Onorab. E bonzour tou dimoun Perseverance. Mon kestyon i al koumsa,

Eski Minis i kapab dir ek Lasanble si pe annan en konversasyon ant Minister Zafer Entern, Minister Labita e osi son Minister konsernan sant rimann Ile Perseverance pou regard lo posibilite ouver sa semen ki sorti vizavi Lakour Mazistra i fini dan *Zone IEA* pou fasilite mouvman bann deteni ? Mersi.

MR SPEAKER

Mersi. Minis, ou repons.

MINISTER

ANTONY

DERJACQUES

Mersi Mr Speaker. Sa propozisyon pou fer en koneksyon ant Ile Du Port avek *Zone* Endistriyel Ile Perseverance vizavi lakour i enn ki'n fini ganny met an konsiderasyon, in fini ganny *design*. I pe ganny enkorpor dan Proze Lenfrastriktir *Zone 6*, ki *SIA* in fini *tender* e pou ganny enplimante tre byento.

Annefe enn bann rezon prensipal sa *roundabout* ki pe ganny konstri a sa moman la par *SLTA* devan Lakour, i aköz i pou annan ekse semen avek *zone 6* lo *Ile Du Port*, ki pou osi servi sa koneksyon avek Ile Perseverance atraver en pon. Sa akse i pou osi kapab servi sa Sant Rimann. Mersi Mr Speaker.

MR SPEAKER

Mersi Minis. Onorab siplemanter?

HON DESHEILA BASTIENNE

Mersi Minis, pou ou leksplikasyon. Minis, selman dan lentere zabitan Perseverance ki zot osi pli ale zot pe war sa pe vin en gro konsern. Akoz la nou pe war plizyer ankor bann lezot fasilite ki pe antre. Parey nou pe vwar *Marine Police* osi la, ki'n deza pe fer zot laparans dan menm zone.

E vi ki ou'n dir nou ki poudir plan ti sipoze ganny soumet kot *Planning*, eski ou kapab asir zabitan si ou annan okenn dele letan ki petet sa proze i a kapab ganny materyalize ? Mersi.

MR SPEAKER

Mersi Onorab. Minis?

MINISTER ANTONY DERJACQUES

Mersi Mr Speaker. Mon osi oule fer ase kler ki zone 6 avek bann devlopman i tonm anba *SIA*. Mon'n rod sa lenformasyon pou ed Lasanble, e osi akoz konstriksyon semen avek sa *roundabout* i tonm anba *SLTA*.

Wi, i dan plan pou nou fasilite tou sa bann kliyan ki pe

vin lo zone 6 ki pe vin Ile Perseverance *I mean*. Pou nou kre bann semen, bann trotwar osi, bann *roundabout* pou fer sir ki akse i ganny donnen. *PS* osi i lo *Planning Board*, *Planning Authority Board*.

E i son travay osi pou pran konsiderasyon lo tou bann plan, ki ganny soumet devan *Planning*, ki annan sa akse e annan semen. E tou bann kliyan dan sa bann zone, dan sa bann vilaz i annan akse e i annan en bon semen. Mersi.

MR SPEAKER

Mersi Minis. Nou ava avans lo kestryon 131, Onorab Andy labonte.

HON ANDY LABONTE

Mersi Mr Speaker. Minis, kestryon i lir koumsa,

Eski Minis i kapab dir avek Lasanble ki nouvo devlopman son Minister pe fer, pou ede amelyor konpetans bann enstriker ki montre dray lo semen? Mersi

MR SPEAKER

Mersi. Minis, ou repons.

MINISTER ANTONY DERJACQUES

Mr Speaker. Minister pou Transpor pe drafte en Polisi ki ladan pou enkli standar pou

bann enstrikter. Zot pou bezwen fer en tes teori, e tes persepsyon danze. Apre sa zot annan en tes *practical driving*, e zot pou konplet en tes dray defansiv. An plis ki sa, sa enstrikter pou bezwen pran en *refresher course* ler zot al renouvle zot sertifika konpetans.

Sa sertifika i tou le 5an. Nou pou swiv de pre bann enstrikter ki annan en ta etidyan ki pe *fail*. Sa bann enstrikter pou kapab ganny apele pou nou regard ki problem ki zot pe pas ladan. E nou kapab fer en *refresher training* si i nesesser. Mersi Mr Speaker.

MR SPEAKER

Ou siplemanter Onorab Labonte?

HON ANDY LABONTE

Mersi Minis, pou ou larepons. Minis, i enportan petet pou note ki nou konnen poudir sa bann enstrikter ler nou pe koz konpetans zot bezwen en landrwa pou zot kapab sirtou ler i annan sa tes *off-road*. Eski zot pe mazin rod en landrwa apropiye kot sa bann enstrikter i kapab ganny en landrwa pou zot kapab montre sa tes *off-road*?

Apre ler ou'n koz dan ou larepons ou'n koz lo konsernan tes, nou konnen poudir sa tes ki bann dimoun ki anvi aprann dray i fer i annan bokou konplikasyon ki pe arive ozordi kot plizoumwenn sa bann dimoun pe *fail*. Me pe *fail* akòz napa en formasyon ki sa bann dimoun i kapab aprann avan or petet dan en fason.

Montre sa bann dimoun si oule en lekòl oubyen en laklas kot zot kapab al ladan, zot kapab aprann pou zot kapab pas zot bann tes pou zot al... zot tes teori avan zot al aprann dray. So, eski dan sa lespri osi i annan en keksoz pe ganny fer pou ede ki sa bann enstrikter i kapab kontinyelman ganny kliyan ki zot biznes i kapab kontinyen marse? Mersi.

MR SPEAKER

Mersi. Minis?

MINISTER **ANTONY DERJACQUES**

Mr Speaker, eski PS Andre i kapab reponn?

MR SPEAKER

PS?

PS SLTA PATRICK ANDRE

Mersi Mr Speaker. Bonzour tou dimoun. Bon a sa ki konsern preparasyon pou bann

enstriker e osi bann *novice driver* parey ki nou apel zot, enn i devwar sa bann enstriker pou enstriker sa bann *novice drivers* dan tou form drive. Depi teori e lapratik. Me an mazorite, zot pa pe fer teori zot pe fer zis lapratik. E sa i enn bann rezon akòz ki i annan en gran *failure rate* letan bann *novice drivers* i al fer zot tes.

E nou ki nou'n fer, nou'n vwar sa akòz nou'n kontinyen evalye sityasyon. E nou pe met an plas en laklas ki pou prepar bann *novice drivers* pou zot legzanmen teori letan zot pare pou fer sa. So, nou deza fini annan landrwa. Ki nou pe al fer, se ki nou pe al *tender out* avek okenn enstriker ki ti a kontan *operate* sa laklas pou kapab devlop bann *novice drivers* pou zot kapab prepar zot pou zot legzanmen.

Si i arive ki nou pa ganny personn, nou pou bezwen pran dimoun dan departman li menm li pou fer sa bann laklas ki neser. Mersi Mr Speaker.

MINISTER **ANTONY**
DERJACQUES

Mr Speaker, mon ti ava kontan osi azoute ki wi, i annan konplent sorti kot piblik lo sa ot standar ki sa *theory test* in demande. Mon oule fer kler enn de keksoz,

Premyerman, nou pe fer tes pa zis pou Sesel me a en standar enternasyonal, akòz i annan en kantite drayver Seselwa osi ki bezwen sa standar ler zot al drive deor espesyalman dan en vizit ouswa dan en konze. Alor, nou annan bann konvansyon kot standar i bezwen ganny mentenir.

2) mon rekonnet parfwa sa bann kestyon teori i vreman difisil. Par kont wi, nou pe kre bann landrwa kot nou kapab fer bann lekol teori. Par egzanp 2 semenn pase mwan avek Prezidan Larepiblik Prezidan Ramkalawan, nou ti al ouver nouvo VTS Stasyon lo Zil Eve, Eve Island Praslin.

E enkli dan sa batiman i en landrwa kot in ganny spesyalman konstri e in ganny tou son *furniture* kot nou kapab fer leson pou teori. E nou pe demann bann *instructors* Praslin pou koste avek VTS Praslin, e pou servi sa landrwa byen. Dan sa *compound* Praslin kot Stasyon VTS, dan son *car park* nou osi pou fer *off-road driving instructions*.

Savedir nou pe bouze, e parey PS in fek dir pou Mahe nou'n fini idantifye sa landrwa pou *theory School*, kot en dimoun prive i kapab vin montre leson pou kapab fer ki sa *pass mark* i monte.

An menm tan, nou bezwen osi revè sa bann *theory test* par egzanp mon a donn en legzanp, mon krwar ki kekfwa *theory* nou bezwen konn tou bann *signs* pou *driving* tou bann *signs*.

Selman kekfwa i pa nesese pou nou kapab *memorized* espesyalman pou en *novice*, kote tou sa bann *signs* i ete Mahe. Sa pou fè nou *fail*, nou pou konn bann *signs* selman nou pa pou konnen dan ki bout semen partou Mahe sa bann *signs* i ete. Alor, nou bezwen annan en pti revè (1)

- Limero 2 nou bezwen annan bann *driving schools theory*.
- 3 nou bezwen annan bann *instructors* ki toultan fè bann *refresher calls* e angaz zot egalman pa zis dan *driving*, me osi dan montre leson ki manner pou *drive*. Mersi.

MR SPEAKER

Ok. Onorab Labonte mon a donn ou en klarifikasyon vitman.

MINISTER ANTONY DERJACQUES

Mr Speaker, *sorry* Mr Speaker. Zis pou azoute ki osi bann kestyon pou an Angle, Franse, ek Kreol byento e sa pou ede.

Mersi Mr Speaker. Mon *apologies* si mon'n enteronp ou.

MR SPEAKER

Wi, ki ou klarifikasyon Onorab?

HON ANDY LABONTE

Mr Speaker, mon apresye ki Minis in dir pou dir kestyon i pou dan diferan fason i pou Angle, Kreol e Franse. Petet en kestyon ki ou pa'n reponn Minis, petet lo Mahe sa tes *off-road* kot zot fè ler zot pe montre zot bann etidyan ki pa pe aprann si oule. Eski zot kapab ganny en landrwa ki i pou vin pou zot ki zot pa pou ganny *disturb* dan serten fason.

Aprè dezyenmman, nou konnen poudir *nowadays* bokou transpor i otomatik. So, eski dan sa lespri i annan serten keksoz ki pou moderniz, akòz nou war bann etranze ki vin Sesel nou war zot avek en *driving license*. Eski nou garanti poudir sa *driving license* i konpatib ?

Konmsi pou nou bann dimoun Sesel eski i annan en keksoz dan sa lespri pou ed zot. Akòz i annan marmay menm entelektyel zot pa sitan bon, me selman zot kapab *drive*, konmsi ki manner dan sa laliny pou ed sa bann dimoun pou zot kapab ganny en *license*? Mersi.

MR SPEAKER

Mersi. Minis, si nou ti kapab pas bref lo sa pwen. Mr Speaker, pou nou ganny en teren spesifik i difisil. E kot nou servi i annan bann *challenges* e anba en lot lotorite, i pa tonm anba Minister Transpor. Nou'n fer demann pou en teren. E Mr Speaker, kekfw PS prezan ki direkteman li ki pe sey negosye pe sey rode. E apre lo bann etranze ki vin Sesel, kekfw PS i kapab donn en pti *advice*. Mersi.

MR SPEAKER

PS, wi?

PS SLTA PATRICK ANDRE

Mersi Mr Speaker. Mersi Onorab, pou ou kestyon. Parey nou konnen menm nou Seselwa, letan nou al aletranze si nou annan nou en *International Driving License* i permet nou pou drive dan sa bann lezot pei. Savedir ou'n *achieve* en serten nivo dray, ki permet ou pou ou kapab dray dan en lot pei. E otreman osi, lezot nasyonalite ki vin Sesel zot osi zot annan en peryod letan ki permet zot pou zot kapab dray letan zot isi Sesel.

Me sa i dan 2 konteks, i annan ki vin koman viziter. Me osi i annan dimoun ki vin koman zot vin travay Sesel. Pou

bann dimoun ki vin travay, enn fwa ki zot 3 mwan oubyen 6 mwan i fini zot bezwen *move* lo en *local driving license* pou zot kapab kontinyen dray Sesel pandan peryod letan ki zot pou isi si zot pe travay.

So, lo sa kote, sa pe ganny fer. Lo kote teren nou ankor an diskisyon avek Minister Later pou vwar kote posibilite ki nou kapab ganny teren pou nou kapab fer sa, parey ki nou pe fer lo Praslin. Me en diskisyon i ankor pe *on going*. E mon swete ki nou a kapab sekiriz sa tre byento. Mersi.

MR SPEAKER

Mersi PS. Onorab Arissol.

HON SANDY ARISSOL

Mersi Mr Speaker. En kestyon Minis. anvi ki ou'n koz lo Polisi, zot pe revwar zot Polisi e Sesel pe touzour transformen. Mon ti a kontan demann ou si Gouvernman pe revwar zot Polisi an sa ki konsern bann *driving instructor*, pou zot sorti lo *manual* pou zot al lo *automatic driving* anvi ki tou transpor ki pe antre dan pei ozordi i otomatik? Mersi.

MR SPEAKER

Minis?

MINISTER **ANTONY**
DERJACQUES

Mr Speaker, ti annan en gran, gran deba lo la resaman dan mon Minister. E *PS* ki ti *chair* sa Komite avek bann *policy advisors*. E alor mon a donn loportinite *PS* pou li diskite lo la. Mon ti pe zis *chair*, mon ti pe *observe*. Mersi Mr Speaker.

MR SPEAKER

PS, ou oule eksplike?

PS SLTA PATRICK ANDRE

Mersi Mr Speaker. Bon, parey nou konnen ler ou dray en loto otomatik avek en loto *manual* i totalman diferan, *ok*? E ou bezwen pas atraver en formasyon pou ou kapab mannye tou lede mod transpor ki annan.

Par ler nou i annan en kantite nou ki pe dray en loto otomatik, me nou pa konnen ki nou pe fer. Zis nou met dan drive, ale vini koumsa. Me i annan en kantite konsekans ki al avek.

So, tousala i annan bann preparasyon ki ou bezwen fer. Par ler wi i annan en kantite loto otomatik ki pe antre Sesel, me osi koman en dimoun si ou'n pas atraver en loto *manual* pou ou kapab mannye li i donn ou plis leksperyans, plis kapabilite pou ou kapab

mannevre en loto e osi dan bann sirkonstans ki aport devan nou a nenport ki moman letan.

So, i annan n diferans ant le 2. E nou'n komans diskite avek bann *driving instructors* pou ki i bezwen annan 2 *mode*. E osi dan nou Polisi, i pou antre ladan se ki si demen nou donn ou *license* pou en loto *manual* ou pou zis kapab fer sa. Si ou ganny en *competency* pou loto otomatik, ou pou kapab zis fer sa. So, ou pa pou kapab akòz i 2 keksoz diferan li. I annan en kantite konplikasyon ki al avek, malgre ki nou, nou pa war sa diferans ki annan avek sa 2 *mode* transpor ki annan.

Par ler i annan en kantite nou, nou war poudir nou loto *manual* i ganny afekte vitman me i lafason ki nou pe dray, akòz nou pe zis tir dan drive, met li dan *reverse* oubyen dan *neutral* senp. Me i annan lezot keksoz ki al avek. Me tousala i pou antre dan sa nouvo Polisi, e osi bann enstriker pou ganny osi pli bon formasyon ki mannyer sa i devret pe ganny antreprann. Mersi Mr Speaker.

MR SPEAKER

Mersi. Onorab Monthy.

HON PHILIP MONTHY

Mersi Mr Speaker. Bonzour Minis ek ou delegasyon. Mon pou retourn en pti pe lo sa legzanmen teori Minis, akòz mon annan zabitan ki'n apros mwan kantite fwa. 7 fwa zot in ale, zot in *fail*. Onorab Labonte in pas en pti gin o bor sa kestasyon. Si en dimoun in vini in *fail* 7 fwa, eski zot pe sey vwar en lot mwayen kekfwa pou fer li pas sa legzanmen petet en tes oral, demann li serten kestasyon pou fasilite sa legzanmen pou li ki omwen i kapab ganny en *license*.

Akòz i konn *drive*, ou pou donn li en transpor i pou *drive*, i konn mazorite bann siny lo semen. Me petet serten defayans ki pe fer li fail. 7 fwa zot peye, i koute eski zot pe war serten fason pou ganny sa bann group dimoun ki tonm dan sa kategori pou kekfwa ed zot pas sa legzanmen.

Apre mon'n ganny konplent ki sa liv ki zot pe aprann bann kod semen, ler zot al fer sa legzanmen i pa vreman *in sync* i pa bann keksoz ki zot in aprann dan liv ki zot vwar dan sa papye legzanmen. Petet spekilasyon, me petet si ou kapab koz lo la klarifye sa. Mersi.

MR SPEAKER

Mersi. Minis?

MINISTER

ANTONY

DEJACQUES

Mr Speaker, dan nou Polisi nou'n fer li ase kler, ouswa dan mon larepons mon'n dir ki mon'n fer li ase kler ki prezan nou pe al dan sa dezyenm staz. Nou pe etabli e nou pe pouse pou annan bann *proper theory driving classes* Sesel. Dezyenm nou pe met lenfansiv lo bann *instructors* ki zot pa pe vin zis montre *manual*. Zot bezwen zot osi enstriker dan teori.

Apre limero 3 nou pe kre bann fasilite par egzanp Praslin nou'n fek fer li. E mon krwar ki i pou mas byen.

Lo bann dimoun ki fail ek kwa ki nou kapab fer, mon a les PS Andre koz direktteman akòz se li ki ansarz kot sa *software* i ete. E li ki la toulezour ki vwar sa bann laklas. E li i koz avek sa bann *novice* ki'n *fail* kekfwa i ava donn nou en pli bon konsey lo sa spesifisite ki ou'n demande. Mersi.

MR SPEAKER

PS Andre?

PS SLTA PATRICK ANDRE

Mersi Mr Speaker. Bon, nou, nou annan en kantite antretyen ki nou antretyen avek bann partisipan ki vin fer sa bann legzanmen. E dan mazorite ka

letan ou war menm en partisipan i vin avek son paran, letan ou eksplik zot serten keksoz, aprezan ki zot konsyan e konpran akòz sityasyon i parey ki i ete.

Sa bann kestyon i *multiple choices*. Ou bezwen lir byen ou kestyon, e lir byen ou bann larepons, *ok*? E mon kapab dir malgre ki i annan pe dir pou dir bann kestyon ki pe ganny demande, i pa parey sa ki dan sa *Highway Code*. Kestyon ki nou demande, sa bann kestyon i deza vin plizyè fwa devan nou. Nou annan nou 3 kategori dan sa *Highway Code*.

I komans avek lafason ki ou dray, bann siny e osi laspe *mechanic* ki dernyen parti dan *Highway Code*, i deza ladan. Me nou pa pran nou letan pou nou kapab vreman lir oubyen pas dan nou *Highway Code*. E nou war ki mank preparasyon i lamazòrite ka akòz sa bann *novice drivers* pa pe *success* dan zot legzanmen ki zot pe fer. Ozordi en zenn i kapab mannye en *app* bokou pli byen ki mwan ki pli aze.

So, i pa en keksoz enterpretasyon sa teknoloji li. I plito en enterpretasyon sa ki devan nou, sa bann kestyon lafason ki mannye ki nou, nou lir li, nou konpran li. *Multiple choice question* i *tricky* parey

nou konnen. Nou tou nou'n pas atraver sa kalite formasyon dan lepass o kour nou letid ki nou'n fer.

Me nou, nou'n apresye poudir i annan. Sel *areas* ki ozordi kekfwa ou pou ale, se ki bann non semen ki'n ganny sanze ki pa ankò ganny sanze dan sa bann kestyon ki nou annan. Me la letan nou pe reviz sa bann kestyon, sa bann nouvo non pe anter dan sa bann kestyon ki nou pe revwar e remet li an plas. Mersi Mr Speaker.

MR SPEAKER

Mersi. Mersi *PS*. Nou ava termin la pou sa kestyon. Nou a pran poz e nou a repran 11er. Mersi.

(BREAK)

MR SPEAKER

Byen, nou a repran avek kestyon 132, Onorab Egbert Aglae.

HON EGBERT AGLAE

Mersi Mr Speaker. Mon a dir bonzour Minis. E tou Manm Onorab, e tou dimoun ki lekout. Mr Speaker, dayer mon ti a kontan *formally* proteste lafason ki mon kestyon 129 in ganny tire lo size *West Coast*, san ki mwan mon'n ganny konsilte ki zis Clerk in

enformen. E mon konnen ki ou Speaker, ki annan prerogativ pou tir kestyon anvi ki kestyon ti'n admet lo *Order Paper*. E mon pa'n ganny okenn gran konsiltasyon lo la. E mon oule proteste sa *formally*.

E avek sa Mr Speaker, mon pe evok Lartik *Standing Order* 37(7) pou mwan *withdraw* kestyon 132. Mersi.

MR SPEAKER

Ok.

(APPLAUSE)

MR SPEAKER

Byen, aksepte. Mon oule dir mon'n enform Clerk pou enform Onorab Aglae ki mon'n tir en kestyon ki ti lo peyman bann travay lo *West Coast Projects*. E mon'n eksplik atraver Clerk, ki sa ti aköz dan Lasanble Minis e osi Minister Finans in enform nou ki tou peyman i ganny fer direktman par *donor*, par dimoun ki pe pey pou sa travay direktman avek kontrakter.

E ki sa lenformasyon i pa devret tonm anba responsabilite Minis, tandis ki *Standing Order* kestyon pou Minis i pou bann size ki tonm anba son responsabilite. Byen, ou'n lev ou *point of order* Onorab, mon'n reponn, e ou'n

retir ou kestyon permet mwan nou a kontinyen silvouple.

HON SEBASTIEN PILLAY

(Off-Mic)

MR SPEAKER

Onorab Pillay, ki pwen oule fer ou?

HON SEBASTIEN PILLAY

Mersi Mr Speaker. Mr Speaker, mon annan en *matter of privilege arising out of* sa desizyon ki ou'n pran.

MR SPEAKER

Wi.

HON SEBASTIEN PILLAY

Minis i lo *verbatim* a plizyer repriz pe reponn kestyon lo sa finansman. E menm lo medya pe koz lo sours finansman e finansman. E menm dan Lasanble in konfirman ki se enzenyer ki trouve dan zot Minister ki sertifye bann peyman avan i ganny fer. Alors, ki mannyer ou kapab dir nou ozordi ki sa bann peyman i pa tonm dan *purview* Minis, kan se li ki'n koz lo la, li ki'n anmenn sa size devan Lasanble avan a plizyer repriz.

E i normal pou demann n kestyon lo sa size. *Unless* ou pa oule sa kestyon pas devan Lasanble ki mon krwar sa i leka

ozordi, akòz se sa ki nou bezwen demande. So, i en *matter of privilege* ki ou bezwen adrese. Ou pe vyol privez sa Manm pou demann son kestyon. E ou pa ni menm annan kourtwazi pou enform li apre ki ABC ti'n agree pou ki sa kestyon i ganny admet lo *Order Paper*. Ankor enn fwa ou sanz...

MR SPEAKER

Mersi Onorab. Ou'n dir mwan ou oule *state en matter of privilege*, e ou'n fer li. Mon santi poudir sa desizyon i anba mon lotorite, e mon krwar i zistifye. Mersi. Nou a prosed avek kestyon 133 Onorab Francois Adelaide.

HON FRANCOIS ADELAIDE

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou Manm Lasanble, e tou dimoun a lekout. Mr Speaker, dabor donn mwan 30 segonn pou mwan remersi Minis avek son lekip pou sa travay manifik ki zot pe fer dan *West Coast*.

(APPLAUSE)

HON FRANCOIS ADELAIDE

E zabitan i war sa progre ki zot pe fer. E nou, nou vreman kontan. E se pou sa ki Dimans

met pare nou annan en *motorcade* nou fer letour laba pou montre tou dimoun kote sa larzan in ale.

MR SPEAKER

Pran ou kestyon prezan.

HON FRANCOIS ADELAIDE

Yes, yes, yes. Mr Speaker, mon oule remersi Minis tou pou sa *roundabout* ki in fer pou nou la. Tro bokou letan nou lavi in an danze. E la mon remarke ki keksoz pe ganny fer. E nou remersi ou bokou pou sa led ki ou pe akord Lasanble Nasyonal avek domenn Zidisyer. (Be koriz mwan ou...)

Mr Speaker, mon kestyon pou Minis i eski Minis i kapab enform Lasanble lo demars ki son Minister pe fer pou redwir nwizans lo semen piblik ki souvandfwa koz konzesyon trafik? Mersi.

MR SPEAKER

Mersi. Minis, ou repons.

MINISTER

ANTONY

DERJACQUES

Mersi Mr Speaker. Mr Speaker, nou annan Lalwa ki kontrol nwizans lo semen piblik ki enkli drog, servi Lalkol ouswa si ou pa pe obzerv Lalwa Trafik. Alor, mon pe demande ki Lafors Lapolis i pran aksyon nesaser

avek sa bann ki pe fer bann nwizans. Mr Speaker, dapre nou lobzervasyon, enn bann rezon primer pou konzasyon trafik i drayver. Ki mannyer nou dray, nou mantalite, e nou fason fer ki mank disiplin.

Nou fer en kantite lofans ki kontribye direkteman ver *traffic jams*. Parmi si i arete, ou park dan en landrwa pa apropiye. Par egzanp letan nou aret dan milye semen pou debark en dimoun, al laboutik ouswa fer konversasyon ek dimoun o bor semen san menm pran konsiderasyon pou lezot transpor ki pe vin deryer nou loto.

En kantite drayver i osi park ilegalman lo *double yellow line*, dan semen etrwat ou dan en krwaze semen ki fer ki i annan en lenpak signifikan lo abilite sa semen pou transpor bouze. Pa konn servi en ron pwen. Pa konn servi en ron pwen i en lot problem. Drayver i swa blok lezot *lane* ou pa oule arete pou li transpor pase, ki enteronp mouvman transpor e trafik.

I annan lezot drayver zot, zot aret dan *yellow box* dan bann krwaze ou blok larantre sorti e antre kot bann krwaze kritik pandan *pick hours*. Anor plis nou annan drayver ki park dan bann *bus layby* e dan bann

loading zones. Ankore sa i kre retar e bann blokaz ki pa neseler. Sa bann lofans i merit ganny dil avek anba Lalwa.

E par seksyon *traffic warden* e kot bann lapolis avek zot korperasyon, e aksyon apropiye i devret ganny pran ler i posib. Lo kote transpor lo later, nou pe kontinyen amelyor e met bann lenfrastruktir semen konm *traffic signs, road markings*. Nou osi aktivman pe reviz e gard an zour bann Lalwa Trafik kot i neseler.

Mon pran sa loportinite, pou enplor tou sa ki servi pou respe bann regilasyon bann Lalwa Trafik. E adopte bann prensip bann pratik bann prensip letan nou dray pou ede minimiz konzasyon trafik e ogmant sekirite pou tou dimoun lo semen. Mersi Mr Speaker.

MR SPEAKER

Mersi Minis. Onorab Adelaide, ou siplemanter.

HON FRANCOIS ADELAIDE

Mersi Minister. Mersi, mon konnen ou committed avek ou lekip pou nou kapab seye amelyor sirkilasyon trafik. Me mon annan 3 pti pete pri pwen ki mon oule ou adrese, e petet ki kapab donn lespwar nou bann dimoun ki pe servi larout

piblik. Akoz zisteman semenn pase si zot in war lo medya sosyal, bann dimoun in ganny bloke par zis bann senp pti keksoz in ariv kot zot tar.

E prezan Minis mon a demann ou petet, *in regards* ki ler i ariv en senp ti aksidan lo semen, ki mannyer zot pe travay avek lapolis pou fer sir ki nou pa war sa dele letan kot dimoun i bezwen espere en ta letan pou zis en pti aksidan. Petet zot ti kapab ariv lakour fer bann lezot keksoz. Apre *in regards to* bann *oversize vehicle* ki pe pas pase lo semen, zot osi zot ede pou blok trafik pou fer konzasyon. Mon krwar petet zot ti devret travay avek sa bann lakonpannyen pou petet swazir en ler pou zot kapab travers lo semen.

E mon dernyen pti pwen se sa 2 *lane* la, mon krwar i bezwen annan en leksplikasyon en ledikasyon serye lo la. Akoz i annan dimoun iz si pran sa enn lo kote drwat i pran tou son letan lo la. E sa i ede ankor pou fer bokou konzasyon trafik. E petet mon krwar Minister Transpor lo later i bezwen imedyatman avek lapolis adres sa bann sityasyon ki i bann pti keksoz. E i kapab fer bokou lenpak.

So, mwan mon *plead* pou bann dimoun ki sorti dan Sid

avek dan Les Mahe, nou ganny kontinyelman afekte avek sa problem. Nou oule aksyon i ganny pran pou ki i *ease* en pti gin nou parkour letan nou lo larout piblik. Mersi.

MR SPEAKER

Mersi. Minis, ou kapab adres sa bann pwen?

MINISTER

ANTONY

DERJACQUES

Mersi Mr Speaker. Mon konsyan ki lannen 2024 nou'n ariv 3199 loto ki'n antre dan pei. Mon konsyan ki avan sa, nou ti'n komans lo 12, 14, 1200, apre COVID 1400, apre 2 lannen apre. Apre 2023 ti apepre 2000 veikil. La nou'n mont par apepre 30poursan dan en lannen. Parey mon'n dir avan, Sesel pe vin pli ris. Seselwa pe aste plis loto.

E sa son lenpak i direk lo semen e i direk lo bann *traffic jams*. Plis nou fer semen, plis nou fer *third lane*, plis nou fer *laybys* nou *resurface*. Parey mon'n dir Praslin, nou'n *resurface* apepre 90 semen Praslin, mon ti dir sa 2 semenn pase. E nou pou kontinyen ziska ler nou ariv 100poursan, plis ki dimoun i aste loto aköz zot *enjoy* plis dray lo semen.

Mr Speaker, enn bann pli gran problem alor ki nou

kapab *tackle* koman en nasyon, koman bann drayver koman bann dimoun ki servi semen se nou latitud mannyer nou dray lo semen.

Mon dakor avek ou espesyalman Vandredi pase ti annan en loto ki ti'n ganny ou kapab dir ti arete dan milye semen Pointe Larue. Ti napa personn dan sa semen selman son lalimyer *hazard* ti on. E mwan mon ti pas la apepre kekfwa 6er mwen kar. Ler mon get lo *social media* 7er sa loto ti ankor pe blok trafik, i ti vreman blok trafik en kantite pou pli ski 2erdtan.

Mwan osi mon pas o bor bann aksidan en mon vwar ki prosedir pou *gather*, pou anmas levidans i pran letan, kot bann gard i bezwen ganny kriye. Akoz pou bouz en loto kot in fer aksidan i en lofans. Alor, drayver i bezwen esper la, *fire brigade* ennler i bezwen vini. Lapolis i bezwen vini. Bann *markings* ek *signs* i bezwen ganny mete lo semen, alor i pran letan.

E lapolis li menm i pa fasil avan ki zot anmas sa bann levidans e fer sa bann *sketch plan* pou zot bouz sa bann loto, e met li akote. Alors, i annan *the human factor* ki nou pe koz lo la.

Nou bezwen servi sa bann semen dan en fason pli efikas

posib, akoz zis nou ki kapab ede prezan. Ler en dimoun dan bomaten ler i pe sorti kot li i pe *drive* 22 kilomet par erdtan, deryer li en gran laliny dimoun, e *speed limit* i 40 kilomet par erdtan ouswa 60. Li i pe *enjoy* son *rides* 6er bomaten 22 kilomet par erdtan, i met tou dimoun ki pe dray deryer li zot tou zot ariv a retar. E i fer en blokaz, Akoz? I pe *drive* e get zis devan li, li i pe *enjoy* sa semen. I pa konsyan sa gran problem ki li i pe fer.

Ler nou park o bor en laboutik, o bor laboutik konmela *Planning* konmela pa donnen *license* pou bann nouvo laboutik ekspekte si zot annan *parking*. Nou, nou pa pou al dan sa *parking* nou. Nou pou aret dan en fason kot nou kapab apre *takeoff* o pli vit posibil. Alor, nou pou park o bor semen, nou pa ni regarde si en bout nou loto i lo semen e i blok trafik akoz 2 loto pa pou kapab pase ; bezwen esper enn fini, apre lot i *overtake* selman i annan en *parking* lanmenm la o bor. Konmsi, se nou latitud.

Ler nou *drop* en zanfan olye dir *goodbye* dan loto, ler zanfan i lo trotwar nou fer desann vit e nou dir zot fer bon piti, *goodbye* - ouswa ler nou konnen nou pe al ganny *drop* en landrwa ler en loto in arete, in

ouver laport ki prezan ki nou anmas nou bann kaba. Selman kaba sa madanm ti kapab pare, ti kapab lo li. Ti kapab prezan deswit i sorti dan sa loto i debarke i ale. E in fini dir son *sweetheart goodbye*, i pa bezwen fer desann vit loto prezan pou koze pou dir *goodbye* e ki pou kwi tanto. Non.

Se nou latitud alor ki nou bezwen aranze. Wi, Mr Speaker, PS avek son seksyon ek son departman i ava travay pli byen avek lapolis pou nou gete ki manner nou kapab *speedup* sa bann 2 lane. Wi, nou devret regarde ki manner nou servi li byen. Prezan lo *oversized vehicles*, mon a demann PS pou donn 2 pti mo lo la.

MR SPEAKER

Wi PS, ou annan laparol. Mersi Mr Speaker.

PS SLTA PATRICK ANDRE

Bon, mersi Onorab pou ou keston. An sa ki konsern bann *oversize vehicles* definitivman bann *oversized vehicles* napa privez pou zot *operate* a nenport ki moman letan. I annan bann ler restriksyon sirtou sa ki nou apel *the greater Victoria* ki zot pa kapab sirkile avan 7er bomaten, ziska 8er edmi dan sa bann *peak period*.

E osi depi 11 er edmi ziska 1er, e osi depi 3er edmi ziska 5er. Sa i ganny restrikte pou zot bann *vehicles* ki ganny konsidere koman *oversized* oubyen *slow moving vehicle*. I annan sa bann restriksyon anba Lalwa. Petet sa bann restriksyon pa pe ganny anforse. E mon a pran li lo mwan pou mwan diskit avek *Highway Patrol Unit* e osi avek lapolis, pou nou kapab enplimant en pe plis sa bann nwizans ki nou kapab dir ki bann dimoun pe kas Lalwa. Mersi Mr Speaker.

MR SPEAKER

Mersi. Bon nou a sey fer letan pou enn de siplemanter. Onorab Loze?

HON JOHAN LOZE

Mersi Mr Speaker. Mr Speaker, mon oule komans par felisit Minis pou son lapel pou ki lapolis i ede pran kontrol sa bann sityasyon nwizans lo semen. An menm *instant* Mr Speaker, letan lapolis i met lord avek loto en Minis ki pe fer nwizans dan lale Corgate Estate, polisye i ganny sispann. Alors, eski nou annan en Polisi kler lo ki manner polisye i ganny trete dan fonksyon zot *duties*. Ouswa nou annan separasyon pou bann elite

parey bann Minis ki tap polisye avek loto? Mersi Mr Speaker.

MR SPEAKER

Mersi. Minis, ou kapab adrese?

MINISTER **ANTONY**
DERJACUES

Mr Speaker, sa lensidan Corgate Estate in ganny *investigate*. E si in annan okenn sispann par lapolis sa i swivan en *investigation* par lapolis li menm, ki fer son *internal investigation*. E si i annan okenn disiplin ki'n ganny aplike, mon asire ki lapolis in fer en keksoz ki rezonnab e apropiye. Mersi Mr Speaker.

MR SPEAKER

Mersi. Onorab Roucou.

HON MICHEL ROUCOU

Mersi. Minis, Annefe premyerman mon oule dir ou avek ou lekিপ mersi. Nou war poudir travay in demare anba Mont Fleuri pou kontinyasyon sa dezyenm faz lagrandisman semen. Minis, annefe mon kestyon i zot annan sa seksyon trafik ki nou war bann fiy pe donn direktiv dan bomaten espesyalman dan rezyon lavil. Zot in *extend* en pti pe dan rezyon Mont Fleuri.

Mon pe mazinен eski zot annan lide pou zot pou sa bann

fiy sa group zofisye, pou zot kapab zwenn ansanm avek Lafors Lapolis, pou fer sir i elimin en pti pe sa bann nwizans parey nou war dan bann sou distrik. Parey si ou mont Hermitage ou pou war poudir i annan en bout semen kot pe ganny servi pou fer *mechanic* li menm li. Kot sa i vin en danze pou bann motoris. Eski zot annan plan pou zot kapab pou sa seksyon li menm li dan trafik pou ed lapolis fer sa bann travay dan bann sou distrik? Mersi.

MR SPEAKER

Mersi Onorab. Minis?

MINISTER **ANTONY**
DERJACUES

Mersi Mr Speaker. Kekfwa PS Andre pli tar i ava ganny en pti sans fer en pti komanter osi lo la. Ler mon ti zwenn Minister Transpor, highway patrol ti ankor *Premiere Building*. Zot ti dan en landrwa ki ti vreman enpitwayab, zot bann *computer* ti enn bann vye e tousala ti'n kas kase. Zot *uniform* ti pa apropiye, ti napa *gloves*, ti napa kominikasyon.

E tousala in sanze, zot dan *quadrant* zot bokou pli organize, zot annan plis lekіpman e pli enportan ankor zot in fek ganny en loto nef ki

zot kapab servi pou zot al dray pou anmenn zot pli lwen.

Wi, Mr Speaker, nou pe tir zot kot nou kapab kot nou annan kapasite pou al dan bann lot distrik parey Mont Fleuri. E nou a fer tou posib pou zot travay ankor pli pre avek lapolis pou zot pli efikas. Mr Speaker, eski PS osi i kapab donn en pti...

MR SPEAKER

Yes, PS i kapab azoute wi.

PS SLTA PATRICK ANDRE

Mersi Mr Speaker. Mersi Onorab. Parey ki Minis in fer resorti, seksyon warden dan Departman Transpor i travay an etrwat kolaborasyon avek lapolis. Bann travay ki nou war pe arive, se ki i ganny partaze kote ki lapolis i ale kote ki bann *traffic wardens* i ale pou kapab maksimiz resours ki nou annan pou nou kapab ede dan minimiz e kontrol trafik.

Par kont osi, bann *highway patrol officers*, *traffic wardens* zot mandate anba Lalwa pou zot fer *spot check*, pou zot pran aksyon anba okenn Lalwa Trafik ki egziste. E sa i pe ganny kontinyelman fer, e parey Minis in fer resorti letan nou sityasyon i permet, oubyen letan nou ganny demande nou sorti an deor lavil, nou al fer

bann *spot checks* en pe an deor avek le bi pou nou kapab kontinyen anforsi Lalwa. E osi amelyor sityasyon trafik.

Me par kont ler ou annan en *workforce 11 staff* ou bezwen sey de plway zot pou *the maximum* ki ou kapab. Par ler i vin en pe difisil pou nou kapab bouz bokou an deor lavil. Me plito konsantre bokou kot plis trafik i ete. E nou swete ki dan lefitir parey ki nou pe anvizaze, parey nou konnen bann zofisye Lapolis oubyen *traffic warden* pa pou kapab dan tou landrwa a tou moman letan.

Me an servan teknolozi, avek bann *cameras* pou le fitir, nou a kapab manage e anforsi Lalwa en pe pli byen. Mersi Mr Speaker.

MINISTER

ANTONY

DERJACQUES

Mr Speaker, zis pou azoute pou Onorab Roucou, ki ou bann demann in ganny ekoute. Nou kapab anonse parey CEO si in fini anonse, aköz i ti siny sa lagreman avek *Libyan Embassy*. La kot Lekol *International School* kot i annan en kantite konsesyon *traffic jams* tou le bomaten avek dan 2er edmi, nou'n ganny permisyon e nou pe komans, e kontrakter in fini mobilize pou nou *extend* sa *layby* pou al

ziska sa lekol. Kekfwa nou ava kapab minimiz sa bann konsesyon ek sa bann nwizans lo semen dan ou distrik Mont Fleuri. Mersi Mr Speaker.

MR SPEAKER

Mersi Minis. Nou ava avan sa lo prosen kestyon 134. Onorab Francois Adelaide.

HON FRANCOIS ADELAIDE

Mersi Mr Speaker. Minis, mon kestyon i al koumsa,

Eski Minis i kapab donn detay Lasanble lo bann negosyasyon diskisyon e progresyon avek Lasosyasyon *Motor Racing* lo sa nouvo *racetrack* ki Minis Finans ti fer prononsman lo la, dan deba Bidze lannen pase? *Thank you.*

MR SPEAKER

Mersi. Minis?

MINISTER **ANTONY**
DERJACQUES

Mersi Mr Speaker. Proze nouvo semen Ile Du Port, ti'n fini komans konsevwar. E enplimantasyon ti'n fini komanse letan propozisyon sorti kot *Motor Racing Association (MAS)*, atraver Gouvernman ti ganny soumet pou servi sa menm seksyon semen pou fer *racetrack*. Apre laprouvasyon donnen par

Gouvernman, plan orizinal ti ganny amande - notaman sa lagrandisman semen pou enkli bann konsiderasyon nesese pou antreprann lakours loto.

Apre negosyasyon avek MAS, lagreman se ki zot kontribye anver sa bann keksoz adisyonnèl pou fer sa bann sanzman. E zot in fer serten kontribisyon, materyo pou fer *road base*. E zot in osi fer bann travay sivil, pou elarzi sa semen pou sa nouvo fonksyon adisyonnèl.

An zeneral proze in ganny en pe retar akòz mankman materyo. E sa osi ti en travay pou bouz bann kab, sa ti osi enkli bann travay pou bouz bann kab ki ti pas anba semen.

Me nou kontan pou raport pou dir ki proze aprezan pe progresse tre byen e dapre plan. Sa travay i kapab ganny konplete dan milye Out sa lannen. An milye annee *juillet* sa lannen.

Mr Speaker, i enportan osi ozordi pou mwan souliny ki i annan, si i annan okenn aktivite *racetrack* avan ki i fer dan sa landrwa, fodre ki tou prekosyon nesese i ganny pran par *Motor Racing Association* pou protez lavi e manm piblik ; pou protez spektater, drayver e bann propriyete ki pre avek sa

landrwa enkli stasyon petrol ki pou *SEYPEC*.

Bann kondisyon pou bezwen ganny formalize dan en *MOU*, savedir en lagreman. E dan sa *MOU*, nou pou bezwen annan kondisyon ki enkli avek Minister Lasante, Lafors Lapolis, Stasyon Tenny Dife eksetera.

An plis ki sa nou pou bezwen annan bann lenfrastruktir adisyonnal ki pou bezwen ganny konstrir par *Motor Racing Association*. E dan sa *MOU* nou pou bezwen enkli par egzamp bann *schedule* ek ler ki pou annan *racing*. E ki mannyer nou pou kontrol bann piblik ler i annan *race*, ler i annan bann levennman.

MAS pou pran e pou annan en kantite responsabilite. Nou tou nou konnen ki en veikil i kapab ganny regarde koman en lobze danzere, depandan lo ki mannyer ou dray.

E ler ou fer *motor racing* dan en landrwa, i annan potansyel kot i afekte pas zis drayver, bann ki pe partisipe, me bann manm piblik. Alor, dan 2 semenn se semen pou'n fini ganny konplete. Bann lot lenfrastruktir ki *SLTA* pou mete, pou pran ankor detrwa semenn. Savedir nou kapab dir nou pou'n fini, fini milye Out.

Prezan i pou depan lo *Motor Racing Association*, pou zot vin avek sa bout ki zot responsab pou zot enplimante pou nou kapab anba *Roads Act* Minister, in Gazete e i donn permisyon. Nou bezwen pran konsiderasyon tou bann fakter, enkli menm lasirans. Alor i en keksoz ki pou la premyer fwa. E mon anvì osi fer tou dimoun konnen i en keksoz ki vreman serye. I pou bon pou bann zenn, i pou eksitan, i pou en keksoz nouvo. Solman nou pou bezwen fer li byen, e dan en fason legal. Mersi Mr Speaker.

MR SPEAKER

Mersi Minis. Ou siplemanter Onorab Adelaide.

HON FRANCOIS ADELAIDE

Yes, Mr Speaker. Minis, dabor mon remerci ou ankor avek ou lekip pou gard sa promes, aköz mwan depi ler mon ti zenn, byen zenn mon ti ganny promes avek Gouvernman *SPPF* zanmen nou'n deza gannnen. E la mon kontan, ki avan 2025 i fini zot, zot pe realiz sa proze pou nou zenn. Mon konnen pou dir i annan deor sa, i en keksoz ki popiler.

E byensir i annan son bann lase sekirite. E mon konnen ki bann zenn la deor zot konnen i annan tou sa bann

keksoz ki vin avek. E zot pe debourye pou fer sir ki sa i arive. E Minis, ankor mon dir ou mersi bokou. E petet mon pti kestyon se vi ki lasosyasyon pe dir zot en pe per pou koz avek lotorite, aköz petet i pa vedir zot dominer. Me ou konnen zot serye zot osi *in regards to safety*.

Eski ou pe donn lasirans lasosyasyon ki zot reste en lekip aprosab. E ki zot kapab vini koz ek zot, e zot pare pou pran tou bann pwen antet pou ki nou kapab realiz sa proze avan ki nou remet ankor Ramkalawan *State House*. Mersi.

MR SPEAKER

Mersi.

MINISTER ANTONY DERJACQUES

Mr Speaker, mon'n zwenn Lasosyasyon *Sport Racing*, e *PS* osi in zwenn zot detrwa fwa. Zot osi konnen ki Prezidan in pran en lentere personnel pou ed zot. Par egzanp zot ti al kot sa semen pe ganny fer lanmenm la deor avek Prezidan. E avek mon *CEO* osi ti *attend* avek bann zofisye transpor.

Mon'n osi donn zot en gidans, e zot konnen ki par egzanp zot bezwen afilye avek sa Lasosyasyon Enternasyonal ki osi etabli bann standar. Zot

bann drayver i bezwen ganny idantifye e mentenir en standar dray ki alaoter. Zot loto nou pare pou nou verifiye e teste ler i pare kot *VTS*, stasyon teste zis pou fer sir ki an bonm kondisyon avan sa *race*.

Nou pare pou nou osi ed zot koz avek Minister *Health* pou fer sir ki i annan lanbilans, i annan *medical officers* ler *racing* pe occur. *Fire Brigade* pou bezwen la. *SEYPEC* pou bezwen ganny alerte, aköz i annan sa stasyon petrol o bor. E nou pou bezwen osi ed zot pou zot kapab fer bann pti konstrikasyon neseler avan ki ou kapab fer sa *race*. Konmsi pou bezwen annan landrwa kot bann piblik i debout, ouswa zot ti pe mazin fer en *sort of* peron lot kote semen.

Nou pou bezwen etabli bann dat, par egzanp en zour Dimans e ki ler, aköz i annan bann semen ki pou bezwen fermen. Selman nou annan semen akote, apre nou annan semen English River lo Mahe, alor i pa pou en gran problemm espesyalman pou en dimans. Alor, nou par pou ed zot pou ankadre sa dan sa ki mon apel en proze.

Alor, nou laport i ouver nou'n zwenn en manm lasosyasyon ler nou ti pe ouver *VTS*, i ti pe koz ek Prezidan ek

mwan Praslin. E mon'n dir li egzakteman sa ki mon pe dir la ki mon pe esper li. Mon biro i ouver, e mon ti dir li premye zofisye ki bezwen vin tap nou laport se kot Transpor. Akoz anba *Roads Act* finalman se nou ki donn *gazette*, nou ki donn lord. E nou ki les zot annefe kas *speed limit* lo en semen piblik ki en lofans kriminel.

Alor, nou bezwen donn permisyon legalman anba *Roads Act*. E sa i vin avek bann kondisyon, ek bann ler ek bann dat. Mon krwar kekfw sa ki mon pe dir la, kekfw zot pe ekoute osi. E zot pe komans travay lo zot proze pou koste kot nou e anmenn kot nou. E nou ava ed zot avek zot proze. Mersi Mr Speaker.

MR SPEAKER

Mersi Minis. Onorab Pillay, ou keston?

HON SEBASTIEN PILLAY

Mersi Mr Speaker. Mr speaker, nou tou nou'n ekout sa ki Minis pe dir. keston senp. Ki dernyen fwa ou ti zwenn avek sa lasosyasyon pou donn zot tou sa ki ou pe dir la? Tou sa bann lenformasyon ki ou pe dir, tou sa zafer legal, tou sa bann keksoz la. Ki dernyen fwa ou ti zwenn avek sa bann dimoun, ki

ou ti sonn zot sa an ekrir poudir zot la, la ki ou bezwen fer depi enn, depi A ziska Z ki zot bezwen fer tousala premyerman.

E dezyenmman Mr Speaker, konnen i en move labitid koz lalang ek dimoun Mr Speaker. Ou pa kapab promet en dimoun en keksoz...

MR SPEAKER

Eski ou pe dir Minis pe koz lalang? *Ok*, be i en move labitid. Be akter ou'n mont sa pwen? *Well*, i kapab normal, me selman pa letan i en lakizasyon. Silvouple si ou annan en keston Onorab poz li.

HON SEBASTIEN PILLAY

Mersi Mr Speaker. Mr Speaker, ler premye miting ti ganny fer tou keksoz ti pozitiv e ki sa keksoz pou materyalize dan en fason ase fasil. Apre ki nou'n ekout Minis dan Lasanble la, sa gam birokrasi ki i pe nonmen la i montre nou poudir Gouvernman pa serye avek prononsman ki zot in fer inisyalman. Zot pou fer tou sa bann keksoz, me apre sa bann dimoun pou vwar zot pe *go through* en bann legal *hurdle* avan sa i kapab materyalize.

So, eski nou kapab ganny en lasirans avek Minis la ozordi, donn Lasanble en lasirans,

akoz nou konnen eleksyon pe vini tou keksoz pou al mase la, tou keksoz pou byen la. Apre dimyel pou annan vineg. So, donn nou en lasirans, donn sa Lasanble en lasirans ki sa bann dimoun ki'n pran zot letan, ki pe met akote zot letan, ki pe met zot lenvestisman pou realiz sa proze pou war sa proze materyalize.

E ki sa bann birokasi aköz Onorab in dir li menm, i pa'n fini dir sa bann dimoun i per pou apros zot. Pou ki rezon ki sa bann dimoun pou per pou apros zot, si zot annan diskisyon avek sa bann dimoun Mr Speaker? Savedir i annan en keksoz mansonzèr ki pe ganny dir...

MR SPEAKER

Mersi. Minis, silvouple si ou kapab adrese.

MINISTER **ANTONY DERJACQUES**

Mersi Mr Speaker. Mr Speaker, anefè parey Onorab Adelaide in fer sorti, pou bokou lannen bann zenn ti anvi fer *motor racing* Sesel. Me Gouvènmàn US toultan in anpes, toultan zot in *fail*. E anba en Gouvènmàn LDS nou, nou'n refer e nou'n konstri sa semen ki lanmenm la an deor Lasanble Nasyonal.

E par milye Out, Gouvènmàn a fini fer son par. Sa ki mwan mon'n dir e mon'n repet avek zot e mon oule fer kler avek ou, e kekfwà ou pa konpran aköz ou pa en avoka, se ki pou le moman...

HON SEBASTIEN PILLAY

(Off-Mic)

Mon pa en zavoka.

MINISTER **ANTONY DERJACQUES**

Si ou kas *speed limit* ou pa kapab, ou bezwen permisyon.

2, ler ou komans *racing* ou bezwen en lagremàn ki i annan en lanbilans la.

Trwa, ou bezwen annan *Fire Brigade* an ka i annan en aksidan.

Kat, ou bezwen annan bann prekosyon aköz i annan *SEYPEC* lanmenm la. E i annan petrol avek *gas* ki kekfwà ou pa konnen.

Mr Speaker, i pa en keksoz ki ou kapab pran a lezer. Si i ariv en aksidan, dimoun i kapab ganny dimal. Alor, mon pe dir e mon'n repete ki nou, nou pe fer tou sa i nou kapab e nou pou *accompany* sa bann zenn pou zot kapab fer *motor racing*. Nou pou'n pare lafen Out, dan milye Out. Set aprezan *MAS* pou komans sa bann negosyasyon pou fer sir

avek zot *international partner*, e avek sa bann dimoun ki enkli lapolis, Lasante, Lasirans, avek *Fire Brigade* ki tou keksoz i vin ansanm ler sa aksyon sport i komanse.

Nou osi nou fatigue tande e vwar bann zenn pe fer *racing* minwi lo *highway* Providence, i danzere. I annan parfwa ki poz CEO granmaten i ganny bann *phone call* i bezwen al aranz bann *railings*. I annan dimoun ki'n mor osi dan bann *unlawful racings*. Eski prezan nou pou en Gouvernman ki fasilman nou pou zis ferm 2 bout semen, nou pou dir ale al *race*?

Ler bann loto pou fer konbyen 200 kilomet par erdtan, nou pou dir zot al *race*? Prezan ler zanfandimoun i mor, ki sa *MNA* pou fer li i ou taye i pou al kot li. Be lekel ki pou responsab? Alor, mon repete lenfrastruktir pou'n fini apre milye Out. E la, fodre tou dimoun i vin ansanm, e met sa proze ansanm byen. Mersi Mr Speaker.

MR SPEAKER

Mersi.

(APPLAUSE)

MR SPEAKER

Mon a pran kestyon Onorab Aglae.

HON EGBERT AGLAE

Mersi Mr Speaker. Minis, mwan osi mon enn bann fanatik *motor racing*. Mon anvi demann ou 2 kestyon. Premyerman, eski Zot in fini ganny vi ki semen pe ganny fer semen i ganny *design* par en enzenyer, *ok*. I soumet en plan avek *Planning*. Eski dan sa plan ki pe ganny soumet, bann *additional features* sirtou bann *security features* nou'n fini ganny mete dan sa plan avek laprouvasyon ki *Planning* in donnen, pou kapab parey ou'n dir milye sa mwan la ki sa pou ganny ouver ?

Dezyenmman Minis, i kler ki Minis osi pa pe tro konpran, aköz dan *motor racing* i annan diferan kalite *racing*. Minis, eski zot pou fer bann premye *trial* pou gete fezabilite sa landrwa ? E eski sa landrwa pou reste permanans anvi ki i annan en plan devlopman ki'n ganny *earmark* dan sa landrwa ek tou sa later o tour li ?

Eski zot pe mazin kit li permanan, ouswa pou annan en lot opsyon landrwa ki ava en pe pli permanans ki pou napa sa bann i a ganny servi par zis *motor racers* menm ? Mersi.

MR SPEAKER

Mersi. Minis?

MINISTER **ANTONY**
DERJACQUES

Mr Speaker, sa plan i enkli tou bann features ki nou'n koz lo la. Savedir wi, tou sa bann *additional security measures* i dan sa plan ki'n ganny aprouve, ki bezwen ganny konstrir par MAS - savedir *Motor Racing Association*. Sa semen i en semen *highway* li. I pou reste en *highway*. E ler nou agree ki zour, ki ler, la i ganny fermen e i ganny servi pou *motor racing*.

Si en zour pou annan en lot site pou *motor racing* an permanans, sa nou ava regarde. E i a vin dan en stratezi bokou pli lonterm. Pou le moman avek sa proze ler i vin en sikse dan detrwa mwan nou ava annan *motor racing* isi Sesel. Mersi Mr Speaker.

MR SPEAKER

Mersi Minis. Nou ava avans lo kestyon 135, Onorab Norbert Loizeau.

HON NORBERT LOIZEAU

Mersi Mr Speaker, pou akord mwan letan pou mwan demann mon kestyon koman Manm Elekte pou Bel Air. Mr Speaker, avan mon komanse mon anvi felisit Minis ek son delegasyon, pou tou bann proze ki'n ganny fer e tou bann proze ki pe ganny fer dan distrik Bel Air. E mon

anvi fer resorti osi avan mon demann kestyon, ki sa bann proze pa'n ganny fer aköz i annan kestyon ki vin devan Lasanble.

Proze in ganny fer aköz bon kominikasyon, ki mwan mon annan avek Lotorite Distrik avek SLTA. E osi bann vizit ki'n ganny fer ansanm ek zot menm pandan lannwit, ler US zot, zot pe dormi. Mr Speaker, alors mon pou al lo mon kestyon.

Vi ki premye faz elarzisman Semen Curio Road in fini komanse, eski Minis i kapab enform Lasanble kan ki dezyenm faz pou komanse. E mon anvi...

MR SPEAKER

Mersi.

HON NORBERT LOIZEAU

Napa sirkiler ladan sa.

MR SPEAKER

Mersi. Minis kestyon senp.

MINISTER **ANTONY**
DERJACQUES

Mersi Mr Speaker. Mr Speaker, pa zis pou ou distrik Onorab. Me semen pou ariv Port Glaud sa 5 kilomet pou ariv dan krwaze ki pou ariv Port Glaude in fini komanse. E semen semen Sans Soucis savedir

nou'n fini komans travay lo la depi milye Me.

An sa ki konsern Curio Road Mr Speaker. Malerezman lo sa faz ki pe ganny antreprann an se moman, travay pa pe ganny delivre dapre kontra. Alor nou'n deside termin kontra sa kontrakter.

Sa bann travay ki reste, ki enkli lagrandisman serten lenstriksyon kot *wayleave* in fini ganny donnen ziska krwaze Semen Bel Air pou ganny *retender*. Sa nouvo kontrakter pou ganny sa louvraz apre sa *retender*. E li i pou fini sa proze an antye. Savedir pou konplet sa proze. Mersi Mr Speaker.

MR SPEAKER

Ou siplemanter Onorab Loizeau? Mr Speaker, mon anvi demann Minis, kan eski zot pe mazine fer sa *tender*? E kan ki zot pe mazine ki sa nouvo kontrakter i ava kapab komans sa semen. Akoz pou le moman i en *mess* dan sa landrwa, e en danze pou motoris.

MR SPEAKER

Mersi Mr Speaker. Sa terminasyon sa kontra pou sa kontrakter la, ki nou pa satisfè avek son travay i devan kot Lotorite *POU*. E koman zot aksepte sa *termination*, deswit sa *retender* i ganny pran, i

ganny fer. sa nou pe regard dan sa 2 semenn ki pe vini. Savedir Onorab, i depan en kantite osi lo ki lavites ki sa lotorite kot *tender* avek *POU* i travay.

Selman nou'n fini fer nou travay, prezan nou osi parey ou nou pe esper zot aksepte. Mr Speaker, i pa ti akseptab sa kantite letan ki ti pe pran pou fer sa travay Curio Road. E finalman, pa akoz nou kontan met i vremen nesese ki nou *terminate* sa kontra. E prezan nou bezwen esper prosedir pou *tender* e donn en nouvo kontrakter. Solman pou napa 2 faz, pou vin en sel prezan.

E sa nouvo kontrakter i a fini sa semen, espesyalman kot bann *tender* in ganny donnen. Nou ti ava ankouraz ou osi ler ou pe fer ou *door- to-door*. E mon kontan ou angaze avek nou, nou zwenn ou toultan. Parey ou'n dir dan milye lannwit ou pe travay avek bann zofisye *SLTA*, pou osi ed nou pou ganny tou bann *wayleave*. Savedir ler nou fini, nou fini tou e tou bann *wayleave* i la. E nou kapab konplet sa proze 100 poursan. Mersi Mr Speaker.

MR SPEAKER

Mersi Minis. Nou ava avans lo prosen kestyon, 136 Onorab Georges Romain.

HON GEORGES ROMAIN

Mersi Mr Speaker. Minis, Bonzour ek ou panel. Mon kestyon i al koumsa. Dimoun pe sorti dan Nor pe desann anvil dan bomaten pe fer fas avek bokou konsesyon trafik sirtou dan krwaze Lekol Anse Etoile. Eski Minis i kapab dir nou si Minister Transpor i annan en plan lonterm pou ede rezourd sa problem? Mersi Mr Speaker.

MR SPEAKER

Mersi Onorab. Minis?

**MINISTER ANTONY
DERJACQUES**

Mersi Mr Speaker. *Master plan* pou Nor Mahe i enkli en propozisyon pou en *network* semen lo Ile Aurore ki pou enkli en koneksyon direk avek Mahe dan zanmirant kot *ex laboutik* Mr Pierre Hoareau La Retraite. Sa i ava permet piblik annan en larout alternativ pou evit konsesyon lo semen aktyel depi La Retraite ziska Ile Du Port.

Nou osi note ki letan ki Victoria *bypass* i konplete, li i pou permet motoris evit - savedir pa pas Victoria direkteman. Ansanm sa 2 proze i ekspekte amelyor konsesyon trafik, a adres serten pwen blokaz ki lontan i la lo sa

seksyon semen kle dan rezyon Nor.

Mr Speaker, mon pran sa loportinite pou enform Lasanble ki'n toultan pandan sa dernyen 20an, Polisi e plan tou gouvènmman pou pran, e pou fer en koneksyon direkteman Nor Mahe, avek Sid Mahe atraver en *highway*.

A sa moman, nou pe kontinyen avek konstriksyon sa *highway* kot Ile Du Port lanmenm la an deor Lasanble Nasyonal. I dan plan Gouvènmman, pou kontinyen konstriksyon sa *highway* pou al Sid atraver *Victoria Waterfront Project*. E i nesese pou kontinyen apre *Victoria Waterfront Project* penetre pou ariv kot lavenir Bois de Rose. Mersi Mr Speaker.

MR SPEAKER

Mersi Minis. Onorab Romain, ou siplemanter.

HON GEORGES ROMAIN

Mersi Mr Speaker. Minis, mersi pou larepons. Minis, mon premye kestyon prezan mon ti a voudre kekfw demann ou, mon konnen i pa pou la deswit. Selman si ou ti kapab donn nou en lide baze lo *master plan*. Kan ki ou pe mazin ki sa pou komans materyalize, ki nou kapab komans war travay, anvi

ki deza annan travay pe ganny fer parey *CEO* i okouran ki nou pe fer bann nouvo *pavement*, *pavement* a kote semen kekfwa sa osi pou antre ladan ?

E mon dezyenm kestyon, mon ti a kontan fer Minis okouran ki lo nou kote osi lo kote Lotorite Distrik nou'n fer bokou pou sey ede rezourd sa problemn atraver *CEO* Parinda. Nou'n fer parey nou'n met bann baraz pou protez bann zanfan, aköz avan bann transpor ki pe park lanmwatye lo *pavement*, lanmwatye lo semen sa pe rezourd en pe. Nou'n fer *layby* anndan pou bis *SPTC drop* bann zanfan ki pa dan *main road*. Sa osi in ede.

Me selman mon dezyenm kestyon Minis, atraver ou Mr Speaker, dan letan la espesyalman ler i annan leköl, ler dan vakans byensir napa sa problemn, ki ou Minister vreman i kapab fer pou kapab sey rezourd sa problemn, anvi mon pa konnen si *traffic warden* i ankor tonm anba zot. Aköz ler i annan polisye lo sa semen i ed en kantite.

E alors si nou ti kapab annan en dimoun ki kapab diriz en pti pe la dan sa trafik dan bomaten. Aköz i vreman i ti ava ede en kantite Minis. Mersi Mr Speaker.

MINISTER **ANTONY**
DERJACQUES

Mersi Mr Speaker. Mon krwar nou tou le 3, savedir *PS* Andre, *CEO* Parinda avek mwan menm nou pou antre dan sa larepons. Nou ava komans avek *PS* i ava donn nou en apersi espesyalman lo Ile Aurore, Mr Speaker.

MR SPEAKER

Yes. Wi?

PS SLTA PATRICK ANDRE

Mersi Mr Speaker. Bon lo kote sa *master plan* ki parey in fer mansyon, nou ti annan nou Ile Du Port, Perseverance, avek Ile Aurore. Sa *Master plan* ki *MLH* bann *Land Use Planners* in travay lo la on konsiltasyon avek tou bann partner ki enkli Departman Transpor ki kle ladan, i ankor pe ganny finalize.

Parey nou'n tande dan plizyer repriz poudir keksoz pe bouze, nou pe *reallocate* isi pou laba. Me in deza annan rezerv kote semen ki ou pase, e kote ki i pou ganny konnekte avek La Retraite li menm parey ki Minis in fer resorti, kot in annan sa nouvo konblaz. I annan diskisyon ki'n pran plas avek sa propriyeter ki'n fer sa konblaz li menm, pou gard sa rezerv pou nou annan sa koneksyon.

So, ki i reste se pou nou finaliz *Land Use Plan* lo Ile Aurore, ansanm avek *MLH*. En fwa ki sa in fini, la prezan nou pou dan sa prosesis pou nou fer *final design*, e apre komans son lenplimantasyon avek bann prosedir ki neseler. So, lo sa kote travay i kontinyen avek *MLH*. E nou swete ki tre byento nou a kapab finaliz en plan pou nou kapab komans met bann lenfrastruktir an plas. Mersi Mr Speaker.

MR SPEAKER

Mersi.

PS SLTA PATRICK ANDRE

Mr Speaker, petet lo sa lot kestyon ki ou ti'n demande konsernan pou ede kontrol trafik. Dan distrik i deza annan lapolis ki pe servi ozordi avek Perseverance an menm tan zot ti annan en stasyon ki ti dan Ladministrasyon Distrik, mon pa konnen si i ankor an operasyon oubyen non.

Me zot sipoze pe donn sa lasistans sirtou dan bomaten avek apre midi. Parey mon'n fer masyon pli boner, bann *traffic warden* nou pe an nonm. So, nou pa pou kapab en pe partou. Ler i annan bann problemm spesifik oubyen letan i annan bann levennman, nou kapab

deplas nou bann zofisye pou donn en koudmen.

Me selman mon krwar petet mon demann Onorab pou li annan diskisyon avek Seksyon Lapolis pou ganny led en pe plis. Malgre ki i kapab annan *school warden*, petet i pa sifi par ler pou fer sa bann travay ki annan pou fer. Mersi Mr Speaker.

MR SPEAKER

Mersi. Minis i annan keksoz pou azoute?

MINISTER

ANTONY

DERJACQUES

Yes. Mr Speaker, parey mon'n dir nou pe kontinyen avek sa *highway*. E byento letan nou pou fini sa seksyon ki la o bor Lasanble avek o bor Ankour, nou bezwen ariv kot *junction* kot *IOT*. Kot *junction* kot *IOT* pou ariv kot *Waterfront Project*, i annan permisyon, i annan later. E dan sa *Waterfront Project* i anvizaze e *PS* i kapab donn plis detay si i neseler - I anvizaze ki sa *highway* i kontinyen.

Kot lot kote pou zwenn *highway* menm kot Bois de Rose Avenue, i annan en propriyeter later ki annefe se *US* kot i annan semen. E mon pe *emphasized* ankor *highway* i bezwen pas la, kot sa later ex

Flamboyant. Ou konpran mwan kote i ete.

Akoz i sel fason, e i dan sa plan ki annan plis ki 20an ki *highway* i pas la lo sa later pou fer ki Nor Mahe i zwenn avek South Mahe.

Alor, Gouvernman i annan gran lentansyon pou regarde ki mannyer en rezerv, ouswa sa later i kapab a dispozisyon pou nou kapab fini sa *highway* pou konnekte Nor avek Sid. Mersi Mr Speaker.

MR SPEAKER

Mersi. Nou kapab termin la? Mersi. Nou ava avans lo prosen kestyon, 137 Onorab Audrey Vidot.

HON AUDREY VIDOT

Mersi Mr Speaker. Kestyon i lir konm swivan; Swivan plizyer kominike e rapor ki mwan koman *MNA* Elekte pou distrik Roche Caiman mon'n fer avek Lotorite Distrik ek *SLTA*, pou ki lalimyer semen dan vilaz e dan distrik Roche Caiman an zeneral i ganny ranplase, ouswa nouvo ganny enstale, eski Minis i kapab donn sa Lasanble en kontrandi, ki zistans *Seychelles Land Transport Authority SLTA* in arive avek sa bann lenstalasyon e aköz in annan retar? Mersi.

MR SPEAKER

Mersi. Minis?

MINISTER

ANTONY

DERJACQUES

Mr Speaker, sa dernyen bout aköz i annan retar i pa zis - i pa byen. I annan en kantite travay ki'n fer, e i annan en kantite travay ki pe ganny fer. E en kantite travay pou kontinyen ganny fer. I annan bokou manm piblik, i annan bokou bann Lotorite Distrik, i annan plizyer Manm Lasanble parey Onorab Bistoquet osi ki'n demande e travay pe ganny fer.

Mr Speaker, i annan bokou progre dan sa sityasyon lalimyer semen, sa lannen osi Roche Caiman. En total 40 nouvo lalimyer in ganny enstale, ki konpri 20 lalimyer soler, e 20 lalimyer elektrik. An adisyon 30 ki ti lo laliny in ganny ranplase apre ki zot in swa mal fonksyonnen e zot pa ti pe ekler ase for.

Nou'n osi reponn lapel en kantite rapor irzan sorti kot piblik oubyen Lotorite Distrik, kot lalimyer in bezwen ganny repare apre swa problem lo kab elektrik ou dan serten sikonstans kot nou sispekte ti annan vandalizm. Dan sa bann mwan ki pe vini, nou annan plan pou instal ankor 15 lezot lalimyer pandan ki nou osi

kontinyen avek nou travay *maintenance routine*.

E bann pli gran defi ki nou ti rankontre pandan sa lenplimantasyon, ti en mankman kab souteren lo marse lokal ki'n met serten retar. Me nou annan plezir pou raport avek Lasanble ki i annan en kargezon kab sorti aletranze ki'n ariv dan pei 2 semenn pase, ki pou permet nou avans pli vit avek sa travay ki reste.

Parey tou dimoun i konnen *SLTA* i annan en plan byen sarze pou kontinyen bann travay dan tou distrik, ki enkli lenstalasyon lalimyer. E *SLTA* e Minister Transpor pe fer li dan tou distrik. Mersi Mr Speaker.

MR SPEAKER

Mersi Minis. Siplemanter Onorab Vidot.

HON AUDREY VIDOT

Mersi Mr Speaker. Mersi Minis pou ou larepons. Minis, retar i annan depi le 22 Avril 2025, mon'n ekrir Lazans *SLTA* pou *regarding* lalimyer kot semen Lari Patatran osi avek Lari Lorye, i ankor annan problem lalimyer pa alimen. Alors Minis, pa dir nou poudir napa retar kan i annan retar.

Savedir mon ti ava swete Minis ki sa bann depi le 22 Avril i ganny adrese, i ganny

ranplase. Apre kot Lari Bwa Rouz, vi ki zot in dir nou koumsa ki i annan lekipman ki'n antre dan 2 semenn pase, nou ava swete vwar tre byento kan sa bann lalimyer pou ganny mete.

E mon ti ava fer en rekomandasyon avek *SLTA* pou ensiste ki bann kontrakter letan zot fini sa travay, s lenstalasyon sa bann lalimyer ki zot in komans mete, pou silvouple netway byen pou tir sa bann gravye kot zot in fouy bann trou pou zot fer bann lenstalasyon. Mersi.

MR SPEAKER

Mersi. Minis, okenn komanter?

MINISTER

ANTONY

DERJACQUES

Parey nou'n dir *SLTA* pe fer vini, e in fini antre sa bann kab espesyalman parey kot Patatran ti annan en pti problem kab. Tou sa bann problem pou ganny rezourd. Bann kontrakter ki'n swazir enn bann kondisyon, se osi netway apre zot ler zot in fini sa bann kontra. E nou menm nou, mwan menm mwan ler mon *drive around* mon vwar e *CEO* osi i vreman aktiv. E sey fer sir ki sa bann kontrakter ler zot fini zot aranz keksoz, zot *restore* parey ti ete oparavan ouswa pli

byen, e nou fer travay. Mersi Mr Speaker.

MR SPEAKER

Onorab Bistoquet, ou kestyon.

HON ANNE BISTOQUET

Mersi Mr Speaker. Minis, mon oule remersye zot pou remet sa 2 lalimyer kot *Eden Village* anler, sa semen ki pas kot Mrs. Malbrook ki al kot Roche Caiman *Extension*. Akoz parey nou konnen ti annan en lensidan ki ti'n arive avek en koup la, e ki ti vremen fernwar. E apre ki zot ti'n met sa devan mwan apre 1 semenn edmi koumsa mon ti war sa lalimyer in re ganny mete lo sa poto. Mersi bokou.

Minis, eski ou kapab enform nou si zot pe mazine pou sanz sa bann *solar light* pou remet sa bann lalimyer? Akoz mon'n ganny serten konplent e mon'n menm pase aswar resaman, mon vwar pou dir sa bann *solar light* pe alim mwens ki sa bann ki la sirtou kot *Exceptional School* apre kot Roche Caiman *Extension*. Sa bann lalimyer i vremen, vremen sonm. Eski zot pe mazine pou re sanz sa bann *solar lights*?

E Minis, eski ou kapab dir nou si sa bann lalimyer ti ganny sanze apre ki mon ti pas ek Prezidan dan distrik? E mon ti

fer demars avek bann lezot lotorite konsernen. E sa problem ti ganny rezourd kontrerman avek sa ki'n ganny dir dan bann *video* ki nou'n tande sirkile. Mersi.

MR SPEAKER

Mersi. Minis?

MINISTER **ANTONY**
DERJACQUES

Mr Speaker, mon komanter se mon kontan ou lenerzi Onorab Bistoquet.

(APPLAUSE)

MINISTER **ANTONY**
DERJACQUES

Mon kapab konfirman ki ou vremen aktiv, e ou'n vremen fer en bon travay dan Riche Caiman. Mr Speaker, detanzantan ler bann *solar lights* i komans feb aköz zot pa ase for parey ou'n dir, nou ranplas li avek sa ki pli bon. Savedir nou annan en plan konkret. Nou anvoy bann *inspectors* zot regarde.

Nou annan bann nouvo ki nou *install*. Nou ranplase osi, alor tou sa ki ou'n sizere nou'n pran kont. E nou ava fer sir ki bann *constituents*, bann piblik Roche Caiman i ganny en keksoz o standar. Mersi bokou pou ou kontribisyon. Mersi.

MR SPEAKER

Mersi. Nou a pas lo prosen kestyon 138, Onorab Conrad Gabriel.

HON CONRAD GABRIEL

Mersi Mr Speaker. Mon a dir bonzour, *welcome panel*. Mon kestyon i al koumsa. Eski Minis i kapab donn en kontrandi sa proze *3rd lane* dan Distrik Pointe Larue;

- a)konbyen in depanse atraver sa proze depi ler in komanse?
- b)Kan ki sa proze i ekspekte konplete? Mersi.

MR SPEAKER

Mersi Onorab. Minis?

MINISTER ANTONY DERJACQUES

Mersi Mr Speaker. Mr Speaker, proze Pointe Larue *3rd lane* ti komans avek son premye faz le 18 Desanm 2023. E i ti ganny konplete an Zanvye 2025 a en kou R3.5 milyon.

Dezyenm faz proze i aktyelman an Mars e komans depi kot premye faz ti fini ziska zanmirant *Amalgamated Tobacco*. Pri kontra pou sa seksyon i pou R14.6 milyon. Sa trwazyenm proze, li in komans kot *Amalgamated Tobacco* ziska

kot Ile Soleil. Sa faz proze i dan staz *Design and Build tender*.

An vi ki nou ankor dan milye sa prosedir nou pa pou kapab donn okenn *cost estimate* ki kapab enfliyans sa *tender*. Dapre progresyon nou espekte ki trwazyenm faz pou komans pli tar sa lannen 2025. Si tou i al parey in ganny planifye i pou pran apepre 18 a 24 mwan, savedir *Amalgamated Tobacco* ziska Ile Soleil.

Me selman i enportan note ki sa proze e son dirasyon i depan osi si i posib pou ganny tou bann *wayleave* ki nesesser avek tou bann propriyeter ki la o bor semen. Mr Speaker, mon anvi zis fer en pti komanter lo sa *3rd lane*, 50 mil dimoun i desann tou le maten e 50 mil dimoun ennler zot ariv dan travay an retar ouswa kot zot aswar.

Gouvernman fek donn en pe *latitude*, savedir diskresyon lo sanzman ler travay. Sa i ava ede, solman mon krwar sa *3rd lane* i a permet minimiz sa *traffic jam* ek sa konzesyon. Alor, mon demann ankor enn fwa avek bann ki annan later o bor semen ant *Amalgamated Tobacco* ziska Ile Soleil, pou silvouple *allow* sa *3rd lane* ganny konstrir e les sa *3rd lane* vin ed en porsyon signifikan nou popilasyon. Mersi.

MR SPEAKER

Mersi Minis, Onorab Gabriel, siplemanter.

HON CONRAD GABRIEL

Mersi Mr Speaker. Yes Minis. Minis, mon panse zot pe tay ek bokou proze an menm tan, ou'n fek dir taler la, zafer *track* pou *race* ou'n fek dir ki nou apepre 50 mil dimoun i servi sa semen.

Minis, eski diskisyon in ganny fer avek bann zabitan ek bann biznes pou met azour bann devlopman ? E eski *scope* ki ti annan dan sa *master plan* in sanze? E dernyerman eski *wayleave*, ki kantite *wayleave* apepre i reste *so far* pou nou kapab gannnen? Mersi.

MR SPEAKER

Mersi. Minis?

MINISTER ANTONY DERJACQUES

Mr Speaker, nou pa pou kapab atann e les karavann pase e pa fer proze. Proze i bezwen ganny fer e proze i anmenn devlopman. Parey nou'n fer avek *West Coast* zot ti demann menm keston, eski tou sa bann *wayleave* ki mon ti nonm zot 700 in ganny donnen?

Mon kapab dir ki ler ou komans en proze menn si ou annan 30poursan, 50poursan

wayleave ler ou komanse popilasyon osi i partisipe e prezan *wayleave* i vin plis. Annefe par egzant pou *West Coast* mon kapab dir ou bann landrwa kot nou'n bezwen sote kot i annan en gap par egzant ler ou get kot trotwar.

Trotwar i ariv en bout apre i sote 50 met pli tar i kontinyen. En kantite sa bann propriyeter prezan pe vin devan e pe vin demande si prezan zot kapab donn nou *wayleave*, savedir permisyon.

Savedir mwan, mon leksperyans se nou pa kapab esper par egzant 12 an pou nou komans premye faz Anse La Mouche ziska Baie Lazare parey Gouvernman US ti fer. Nou, nou ti komanse e nou anvi fer sa 17.5 kilomet.

Si nou fini avek 90poursan, prosen Gouvernman ouswa administrasyon pou kontinyen i pou fini sa 10poursan, solman nou bezwen ariv en staz kot nou kapab fer piblik satisfè ki semen pe ganny fer, *resurface* pe ganny fer, *pavement* pe ganny fer, lalimyer pe ganny mete e tou bann sekirite pe ganny met an plas.

Alor, nou pou fer li, nou pou bann kontrakter pe *design and built*. Nou pou lans ansanm avek bann kontrakter pou fer

sir ki tou bann *wayleave* ki neseler i ganny donnen, mon note en kantite landrwa i deza pou Gouvènmman bann later or kot *3rd lane* i bezwen pase, e mon asire ki dan 18 mwan nou pou kapab dir pandan en 18 a 24 mwan ki nou *3rd lane* pou en sikse. Mersi Mr Speaker.

MR SPEAKER

Mersi. Oule klarifye?

HON CONRAD GABRIEL

Yes Mr Speaker. Mersi, i annan sa sityasyon Minis diskisyon ant bann biznes ek bann propriyeter, eski i pe komanse deza oubyen pa ankò komans ditou? Mersi.

MR SPEAKER

Me ek propriyeter, sirman in komanse, mon krwar Minis in adres sa. Minis, ou annan okenn keksoz pou azoute lo la?

MINISTER **ANTONY DERJACQUES**

Mr Speaker, an menn tan fodre mou pa oublie ki ler ou'n *design* e ou konnen egzaktman konbyen later, teren ou bezwen avek en propriyeter, la ou kapab siny en lagreman. Pou le moman zot pe ganny konsyansye par egzantp- e laplipar i pou Gouvènmman, kot *IDC* kot *Lapolis*, kot dan

lanmar, *Pointe Larue*, dan kontour, partou la i pou Gouvènmman.

E ler prezan mon'n spesifikman ki mannyer nou pou kontinyen sa *3rd lane* kot sa laboutik ki pou en msye kote gos ler ou pe monte pe al dan *south* ziska *Ile Soleil* e konbyen later nou bezwen ; par egzantp kot kazern *Pointe Larue*, tousala pou Gouvènmman menm. La nou kapab fer bann sinyatir, bann *wayleaves* prezan i ganny donnen.

Alor, pou le moman nou pe sansibiliz e nou pe *design*, *design* e apre nou ava *build*. E an menm tan parey nou fer avek *West Coast* nou kre en tim ki an egzistans la en kot mon dan *secretariat*, enn kot Departman Transpor e bann kontrakter ou annan zot bann dimoun zot tim osi pou nou kapab fer bann negosyasyon spesifik, baze lo ki kantite teren ki neseler swa pou sa semen ouswa pou son trotwar. Mersi Mr Speaker.

MR SPEAKER

Mersi Minis. Onorab Porice.

HON DOYACE PORICE

Ok, mersi Mr Speaker. Bonn apre midi a tous. Minis, mon pou dir ou en gro mersi ou avek ou lekip, e osi Gouvènmman *LDS*

ki'n kapab fer nou realiz sa stasyon VTS e osi sa premye pyer pou SPTC e kontinyasyon re sirfas nou semen lo Praslin e zabitan Praslin i byen kontan.

(APPLAUSE)

HON DOYACE PORICE

Minis, mon keştyon vi ki mon vwar ki sa keştyon Onorab Gabriel pe vin en pti pe pli souvan dan Lasanble. Minis, ler ou ti pran lofis an 2020 eski ou ti vwar ki ti annan okenn volonte pou materyaliz sa proze 3rd lane, dan distrik Pointe Larue? Mersi.

MR SPEAKER

Ok, mon pa tro apresye sa bann soz ki zis pou sey dir nou pe fer byen pa ti ganny fer. Minis, eski ou annan okenn komanter lo la?

MINISTER **ANTONY DERJACQUES**

Mr Speaker, sel keksoz mon kapab dir se i Polisi Gouvernman pou delivre, e kot nou war en problem mazer parey sa *flooding* Pointe Larue nou antre, nou fer 3rd lane, an menm tan ou pou remarke ki sa semen i en pe *raised*, savedir nou pe sey *tackle* sa *flooding* ki'n la avek nou pou plis ki 43 an.

E nou kapab sey gete si nou pou kapab minimiz sa *flooding* avek sa nouvo sirfas ek nouvo 3rd lane. Mon osi anvi kosyonn nou tou, ki ou pa kapab kontinyen fouy anba aköz son *marsh* i pou vin pli o ki li e *marsh water* pou antre dan rigol.

Alor, nou bezwen en bon pe *skill* avek mon CEO ki la kote drwat - Mr Parinda pou ansanm avek PS ek son bann enzenyer ek *project officers* pou pa zis *decongest traffic*, minimiz son lenpak ek *traffic jam*, me osi nou dil plis ki nou kapab avek sa *flooding* Pointe Larue ki la pandan 43an ki pa'n ganny *dealt with*, dan en fason efikas. Mersi.

MR SPEAKER

Mersi. Onorab Georges.

HON BERNARD GEORGES

Mersi Mr Speaker. Mr Speaker, mon keştyon pou Minis, se Minis, eski etandonnen ki se Gouvernman LDS ki pe fer sa 3rd lane Pointe Larue, e ki ou'n dir ki i pou pran apepre 18 a 24 mwan pou fini.

E an vi ki eleksyon i le 27 Septanm sa lannen, eski ou pe demann avek Onorab Gabriel pou dir avek son detrwa siporter ki reste ki si zot anvi sa 3rd lane i fini zot bezwen vot pou

LDS dan sa eleksyon ki pe vini.
Mersi.

MR SPEAKER

Mersi. Mon krwar sa i en pwen vreman politik e mon pa krwar nou devret al ladan.

Mon a remersye bann Manm pou zot kestyon, nou'n ariv a lafen *Question Time*. Mersi Minis ek ou bann zofisye e pou zot partisipasyon e mon swet zot bon depar e bonn kontinyasyon. Lasanble nou a pran poz e nou a rebran travay 2er. Mersi.

(BREAK)

MR SPEAKER

Bonn apre midi tou dimoun, nou bann Manm, nou bann zofisye e piblik.

Avan nou komanse avek biznes lo *Order Paper* mon oule zis met lo rikord ki mon'n ganny en konplent sorti kot Onorab Anne Bistoquet avek en alegasyon lo en komanter ki i dir Onorab Johan Loze in adres li *off-mic* bomaten. Mon zis dir la ki mon pe *investigate* e mon annan lentansyon adres sa konplent demen bomaten avan nou komans lezot biznes Lasanble. Mersi.

Onorab Loze, mon'n ekrir ou mon pe atann ou repons.

HON JOHAN LOZE

(Off-Mic)

MR SPEAKER

Mon pa pe pran sa la, mon pa pe pran sa la, donn mwan ou repons an prive ; donn mwan ou repons an prive avan apre nou ava adres li. Mersi. Madanm *Hansard* Raporter nou ava apel Vis-Prezidan.

Alor, bonn apre midi Vis-Prezidan Ahmed Afif e bonn apre midi osi Madanm Wendy Didon *Chairperson Electoral Commission*, Mrs Manuela Amesbury *Chief Electoral Officer* Ms Florie Benstrong *Senior Legal Officer* dan *Electoral Commission*, e Mr Srinivasa Rao *Legislative Drafting Consultant* dan *AG's Office*. Bonn apre midi zot tou e byenveni pou partisipasyon dan nou sesyon ki konsern Lalwa.

Parey zot konnen nou annan 3 Prozedlwa devan Lasanble ki lo *Order Paper* e nou deside pou komans avek *Constitution of the Republic of Seychelles (Twelfth Amendment) Bill, 2025*. Donk, pou nou komanse mon a demann Mosyon pou *Second Reading*. Onorab Georges.

HON BERNARD GEORGES

Mersi Mr Speaker. Bonn apre midi Mr Speaker. Bonn apre

midi Vis-Prezidan avek ou delegasyon, tou Manm Onorab e tou bann dimoun ki pe swiv nou.

Mr Speaker, annakor avek *Order 69(2)* nou *Standing Orders*, mon *move* ki *the Constitution of the Republic of Seychelles (Twelfth Amendment) Bill, 2025*, i ganny lir en Dezyenm Fwa. Mersi.

MR SPEAKER

Mersi. Mon a ganny segonnman pou sa Mosyon. Onorab Arissol.

HON SANDY ARISSOL

Mersi Mr Speaker. Bonn apre midi VP avek ou lekip, tou dimoun ki a lekout. Mosyon i ganny segonde. Mersi.

MR SPEAKER

Mersi. Vis-Prezidan avek segonnman sa Mosyon nou apel ou pou ou fer lentrodiksyon *Bill* pou Lasanble.

VICE-PRESIDENT AHMED AFIF

Mersi bokou Mr Speaker. Bonn apre midi Mr Speaker, *Leader Biznes Gouvernman*, *leader-* e tou bann Manm Lasanble e tou dimoun ki pe swiv Lasanble apre midi.

Mr Speaker, i en plezir pou mon prezant avek Lasanble, premye parmi en seri

lamannman dan bann lezislasyon ki annan pou fer avek eleksyon. Sa lamannman dan Konstitisyon i 12enm Lamannman Konstitisyon an zeneral. Les mwan tou dabor fer kler i sa lamannman i vin swivan konsiltasyon ki Komisyon Elektoral in fer avek tou parti prenan konsernen.

Prensipalman, bann parti politik pandan plizyer diskisyon ki zot in annan e ki dayer tou bann parti politik zot in tonm dakor lo la pandan sa bann diskisyon. E swivan sa, byensir sa bann propozisyon in pas kot Biro *Attorney Zeneral* pou fer bann lamannman nesaser. E parey zot pou vwar *Bill* li menm in ganny sinyen par *Attorney Zeneral* e date le 6 Zen, 2025.

Bi sa lamannman dan Konstitisyon, se pou amann 2 seksyon dan nou konstitisyon. Lartik 113 e Lartik 114, avek nou pou senpleman permet tou bann dimoun ki pou ganny 18an dan en lannen kot pou annan eleksyon pou zot kapab vote. Parey nou tou nou konpran pou le moman selman bann dimoun ki'n ganny 18an ki rezis voter i fermen ki ganny drwa anrezistre pou zot kapab vote.

Anba Lalwa aktyel rezis voter i ganny sertifye e fermen 3 mwan avan dat eleksyon, alor

selman dimoun ki'n fini ganny 18an ki kapab anrezistre e swiv tou bann prosedir verifikasyon pou zot non ganny enkli lo rezis.

Lartik 113 nou Konstitisyon, i dir ki tou sitwayen Sesel ki'n anrezistre i annan drwa vote e Lartik 114 li nou konstitisyon i fer en provizyon lo lekel i annan drwa anrezistre pou kapab vote.

Dapre Lartik 113 tou dimoun ki annan 18an zour dat eleksyon i sipoze kapab egzers zot drwa vote, me nou sistenm rezistrasyon aktyel i anpes en dimoun ki ganny 18 an apre ki rezis voter in fermen pou li kapab vote.

Alors, pour ki tou dimoun ki zour dat eleksyon i pou ganny 18 an i kapab vote anliny avek Lartik 113, i nesaser pou amann Konstitisyon ou permet sa.

Rezilta sa lamannman alors, si Lasanble Nasyonal i aprouve, i vedir ki nenport dimoun ki apre ki dat en eleksyon i ganny anonse pou en lannen i konnen ki i pou ganny 18an zour dat eleksyon, i pou kapab al anrezistre li ansanm ek lezot dimoun ki pou pe anrezistre ki pou'n fini ganny 18 an avan rezis voter i fermen.

Alors, sa bann dimoun ki pou ganny 18an zour ouswa apre en dat ki rezis voter in

fermen, ouswa pou kapab vote e menm osi bann ki pou ganny zot laz zour e apre dat premye *round* pou kapab osi vote.

Alor, konsekans sa lamannman se ki lanrezistremman pe ganny parey nou dir an Angle *delink* avek dat ki rezis voter i fermen ler dat eleksyon i ganny anonse. Sa Mr Speaker, i ava donn lefe vre lentansyon Lartik 113 e 14 ki dir ki tou dimoun ki annan 18 an i kapab anrezistre pou vote.

Vwala Mr Speaker, provizyon sa Prozedlwa ki mon pe soumet ek Lasanble Nasyonal pou zot laprouvasyon. Mersi bokou Mr Speaker.

MR SPEAKER

Mersi Vis-Prezidan pou lentrodiksyon. Sa Prozedlwa i devan loanable la, e nou a kapab komans pran deba bann Manm. Onorab Andre.

HON CLIFFORD ANDRE

Mersi Mr Speaker. Mr Speaker, mon pa pou tro long, me selman mon pou eksplik en pti pe enn de bann sityasyon e mon pou osi demann VP pou- an rezilta miting *Bills Committee* nou ti annan, annefe mon krwar i Mr Hill ki la, kekfw letan ou'n fer lentrodiksyon ou'n dir Mr Rao, Speaker. Zis kot *Attorney*

Zeneral zis pou nou klarifye akoz Mr Hill i pli konpran Kreol.

Ok, so, letan nou ti pe diskite VP dan *Bills Committee* e ou lentrodiksyon ou'n dir ki letan en- dan sa lannen ki en eleksyon pe ganny fer e swit a deklarasyon en eleksyon.

So mon mazine letan i deklar en eleksyon i pou bezwen pibliy dan *gazette* konmkwa bann dat, be letan nou ti fer sa diskisyon nou ti propoze oubyen nou ti gete ki ankor i dan sa lamannman i annan zis en lamannman. So sa i enn.

Kot nou ti vwar ki si i an en zanf an ki annan 17an e pandan sa letan sa lannen eleksyon, nou tou nou konnen ki lannen eleksyon, parey la nou konnen i 2025 nou pou konnen 2030 pou annan en eleksyon. So pandan sa lannen eleksyon i *attain* 18an, eski i bezwen esper sa deklarasyon?

Akoz sa deklarasyon in ganny fer mon mazine 3mwan oubyen en pti pe mwens avan eleksyon. Me nou konnen poudir i annan eleksyon sa lannen, so eski nou bezwen, *proposal* ki nou'n mete la se ki nou dir ki poudir "*provided that where an election is to be held*".

So mon mazine sa i donn en pti pe plis latitid. Definitivman i pou an referans

avek letan Komisyon Eleksyon i ouver rezis, me selman i pou sa lannen. So, mon santi kekw sa i en bout kekw nou bezwen gete akoz i vremen enportan.

Akoz si par egzant letan eleksyon i deklare sa zanf an ki ana 17 an i pa dan pei ou byen in tonm malad par egzant ki'n bezwen al trete prezan sa deklarasyon i fer e ler i tournen i tourn zis en semenn avan eleksyon, i pou perdi son drwa pou li vote e se sa ki nou oule anpese.

So, kekw si nou fer sa, pe neserman letan in ganny deklarasyon me sa lannen ki annan eleksyon. So nou ouver sa lalis pou li vote, me selman mwan mon krwar ki i enportan e drwa vote i en drwa kardinal, ki bezwen ganny obzerve e sa lamannman Konstitisyonn mwan mon krwar i enn ki ekselan e i zis en Gouvernman ki proaktiv, ki anvi fer sir ki tou zenn oubyen tou dimoun ki annan drwa vote i egzers sa drwa.

E i annan bokou nou bann zenn dimoun ki eksite la, zot anvi al vote akoz i pou fer premye fwa zot pe al vote e zot anvi fer sir. E bokou dimoun i vin kot mwan personnelman ki mon siny osi lezot MNA in ganny sa kekyon, be si mon zanf an i ganny 18an en semenn

avan eleksyon oubyen 2 semenn avan eleksyon depandan lo ki mannyer sa rezistrasyon i ganny fer so, eski i pou annan drwa vote?

Annefe mwan mon annan enn mon aktivis Anse Aux Pins ki'n demann mwan sa keston. So, mon'n dir li esper lamannman letan i ganny anmennen pou nou kapab gete ki mannyer nou travay avek.

So avek sa 2 mo VP, mwan mon pe dir ki nou bezwen kontinyen avek en Gouvernman ki proaktiv e nou bezwen fer sir ki nou Konstitisyon i vivan e ki i dinamik, e konstaman nou pe gete ki mannyer pou nou fer sir ki nou, nou aplik nou Konstitisyon *à la lettre*, pour ki tou sitwayen Seselwa i ganny sans fer sa ki zot sipoze fer.

Avek sa detrwa mo, VP mon oule reasir ou ki mon pou donn ou mon sipor an referans avek sa lamannman konstitisyonnel ki'n anmennen ozordi. Mersi.

MR SPEAKER

Mersi Onorab. *Yes, point of order.*

HON JOHAN LOZE

Mr Speaker, mon pe *raise* en *point of order*, mon oule en leklersisman lo en *matter* ki'n *arise* la. Nou'n ganny dir poudir

lamannman in ganny anmennen par en Gouvernman proaktiv e ki nou bezwen kontinyen avek sa Gouvernman proaktiv.

Mon ti anba lenpresyon i lamannman pe ganny anmennen par Komisyon Eleksyon endepandan. Mon ti a kontan ganny en leklersisman avan nou'n *proceed* avek sa travay.

Si Gouvernman proaktiv LDS ouswa si Komisyon Eleksyon endepandaman ki'n anmenn zot lamannman ki nou tou nou'n agree lo la. Mersi Mr Speaker.

MR SPEAKER

Non, mersi. Dapre sa ki mon konpran, *Electoral Commission* i prepar Lezislasyon ki koncern li, parey tou lezot antite me selman se Gouvernman ki anmenn Lezislasyon devan Lasanble, sa mon krwar i o kler.

Selman antretan mon a met a latansyon bann Manm, nou lo bann size sansib, politik byensir. Mon ti ava apresye si bann komanter politik ti a ganny evite. Mon pa anvi limit drwa koze. Byensir bann dimoun i annan drwa e bann kote politik, *statement* politik i ganny fer toultan dan Lasanble en kote oubyen lot.

Me avek sa lensidan zot a realize poudir sa bann pwen i sansib e sa i kapab detourn nou diskisyon lo sa *Bill*. So pou nou reste lo sa *Bill*, annou fer sir ki nou evite en pe sa bann stetment politik. Zot pe lev lanmen pou adrese? Onorab Lemiel, *yes*.

HON SYLVANNE LEMIEL

Mersi Mr Speaker. Bonn apre midi *VP*, Bann dimoun sorti kot Komisyon Eleksyon, enkli Mr Hill ki la avek nou. Mr Speaker, ozordi nou vwar *VP* in vin adres nou e in soumet en 12enm lamannman dan nou Konstitisyon.

E sa lamannman i tous presizeman sapit 7 dan nou Konstitisyon, e i pli presizeman Lartik 113 e Lartik 114 ki koz lo kalifikasyon pou ou anrezistre pou ou vote, kalifikasyon kot ou anrezistre pou vin en voter.

E nou tou nou konnen poudir ozordi laz 18an ler ou'n ganny ou 18an, ou desann ou ale, ou al anrezistre pou ou kapab vote, pou ou kapab pran desizyon lo lekel ki ou koman sa dimoun, sa endividi ki'n anrezistre pou vote, lekel sa dimoun ki ou krwar i kapab diri ou distrik, diriz ou pei.

E sa mon pou dir Mr Speaker, i en drwa tre fondamantal. I en drwa sivik

pou tou dimoun kapab al egzers son drwa pou li vote. Ozordi nou tann Biro Eleksyon i vin devan, nou annan Madanm *Legal Officer*, mon war li lo televizyon pe fer sansibilizasyon kot pe dir bann dimoun vini, desann, vini, vin anrezistre pou ou kapab egzers ou drwa fondamantal, pou ou gete lekel ki ou pou met devan pou diriz ou pei.

Mr Speaker, mon'n tous lo la mon'n dir ki vote i en drwa tou dimoun, e i ou devwar osi pou ou desann pou ou vote.

Ozordi letan nou pe regarde i annan bokou zenn ki sa Lalwa pa aplik pou zot, sa lamannman, zot pou pe ganny zot 18an depi ki mon'n tann dir le 11 Zilyet i paret ki rezis voter pou fermen mon pa siny, petet Madanm kot Komisyon Eleksyon i ava kapab fer nou konpran lo la.

So, si anrezistremen voter i fermen pou tou dimoun ki ti'n fini ganny son 18an avan le 11 Zilyet i pou fermen petet la sa bann letan i pe bezwen pou li fer en *count*, gete lekel bann dimoun ki'n anrezistre. E apre sa petet mon mazine letan sa Lalwa in pase kot i pou bezwen annan en peryod letan ki i pou ouver pour ki bann zenn ki pou ganny 18an apre le 11 Zilyet ziska zour eleksyon le 27

Septanm, petet mon pe mazine ki Mrs Amesbury i ava eksplik nou pli byen petet dan zot *right of reply* Mr Vice-President ki i pou annan en dele letan ki petet zot pou donn sa bann zenn ki pou ganny 18an apre ki lalis voter in fermen la, ziska mon pa konnen kan zot pou donner ki pou dir bann zenn ki ganny zot loz ziska zour vote, ziska zour eleksyon le 26 Septanm alors desann vini, vin anrezistre. Mr Speaker, sa i tre, tre, tre enportan.

Ozordi mon krwar letan nou pe pran laparol Mr Speaker, i en letan kot pou nou osi kapab koz avek sa bann zenn voter ; sa bann zenn ki pe al ganny sa laz 18 an ki pou nou eksplik zot aköz ou devret vote, apard ki i ou drwa e ou devwar, ki lezot keksoz ki ou benefisye ou aköz ki ou devret ale al vote?

Vote - ou konnen ou ganny sa sans tou le 5an pou ou kapab swazir en dirizan ; enn en *leader* ou distrik dezyenmman en *leader* pei, en Prezidan. E ki 2 pozisyon ki nou pou dir Mr Speaker, i vremen enportan aköz e i pe diriz ou desten letan ou gete kot ou pou bezwen balanse vwar parmi tou sa bann kandida lekel ki ou santi i pli kapab anmenn ou aspirasyon, lekel ki pli kapab

anmenn ou rev ki ou annan pli devan.

So, se sa ki ou ganny sa drwa tou le 5an *therefore* pou ou kapab vini, *tick* dan bwat sa dimoun kot ou, ou santi i kapab fer sa pou ou, e la ou kapab dir ki ou'n egzers ou drwa e ou'n fer ou devwar.

Letan nou annan laparol ozordi, se sa ki nou pou rann lapel avek nou bann zenn. Ou bezwen letan ou tann i kriye ou ganny ou laz ozordi, ou ganny ou laz demen, ou desann ou ale ou al la Mont Fleuri kot Biro eleksyon - Komisyon Eleksyon ou ale ou al anrezistre pou ou vote le 27 Septanm.

Arive ou pou ganny ou laz apre ki lalis voter in fermen, ekout byen letan Komisyon Eleksyon i dir ou vin anrezistre ou desann ou ale ou al anrezistre. Sa eleksyon ki pe vini Mr Speaker, i en eleksyon ki pou mwan mon pou dir i tre desiziv. I en eleksyon ki bann zenn sirtou letan ou gete bann zenn ki pou desid sa eleksyon.

Alors, i tre enportan ki bann zenn i desann e zot al egzers zot drwa. Ou pa kapab dir demen letan eleksyon i fini pase en tel dirizan ki'n gannyen ou pou dir poudir ar, mon pa ti anvi sa dimoun gannyen me la in gannyen e ou bezwen sibir le

konsekans ki lezot dimoun in fer.

En dimoun i anvi desann i *tick* pou Mr Ramkalawan i dir i anvi kit li lanmenm parey zot dir, en lot i desann i dir ou li i oule vot pou Patrick Herminie akòz *US* i sel opsyon pou Sesel, alors, sa dimoun i desann i tock dan bwat Patrick Herminie. E li sa lot *-(come on annou be tolerant)-*

MR SPEAKER

Onorab, kontinyen adres Mosyon.

HON SYLVANNE LEMIEL

Non, Mr Speaker, *but it's disturbing!* Mon pou kontinyen mwan, me selman mon krwar nou tou nou pou ganny nou sans koze.

MR SPEAKER

Egzakteman wi.

HON SYLVANNE LEMIEL

So, i fer ki Mr Speaker, e menm parey dan bann distrik i kapab i annan ki pou dir ou be li i anvi desann pou li vot pou Mr Bijoux, Onorab Bijoux i kapab i annan ki dir non Onorab Bijoux pa bon nou oule kit Sylvanne Lemiel lanmenm.

Tousala i annan Mr Speaker, e sa i pou depan lo nou bann zenn dan bann

distrik. E sa ki mon pe dir zis legzanp ki mon'n donner, sa i aplik pou nou tou, depi kot *LDS*, kote *US* ki pe debout koman bann kandida dan prosen eleksyon.

Onorab Porice, ou kapab dir be kan atraver ou Mr Speaker, ou kapab dir be kan si oule, me selman mon pe zis donn serten legzanp i kapab aplik pou ou osi ki bann dimoun i dir Onorab Porice non mersi, nou oule Onorab Gill ki sel opsyon Baie Sainte Anne.

So, therefore zenn i bezwen rann sa lapel letan Komisyon Eleksyon i dir desann, vini, vin anrezistre, zot ale zot anrezistre. I annan en kestyon ki'n leve Mr Speaker, ki petet sa Komisyon Eleksyon i kapab eksplik en pti pe apre pou eksplik bann dimoun ki deor ki pe anvoy mesaz ki pe dir demande, *ok*.

Nou annan bann dimoun ki pe dir eleksyon pe vini, sa zenn in fini anrezistre li, *ok*, me i pe bezwen al *study*. I pe bezwen al etidye e i annan ki sa bann zenn zot menm petet pe demande nou pe al *study by* le 15 Septanm, nou ti anvi vote pa kapab fer provizyon ki nou, nou vote? Nou'n fini anrezistre.

Sa mon pe kit li avek Biro Komisyon Eleksyon ki pou reponn *or VP* i ava reponn nou.

Sa i keston ki dimoun, sa bann zenn an deor ki pe demande e VP ou a fer zot konpran apre posibilite, napa posibilite, avek sa Lalwa ki pe vini la i ava fer nou konpran.

Mr Speaker, avek sa Lalwa osi nou pe gete la nou pe dir *first time* pou ou anrezistre ou bezwen vin an person. Me apre mon pe mazine petet san pou *preempt* deba lo Lalwa eleksyon li menm ki pou pe vini ankor, kot petet i pou pli fasil pou sa bann zenn kot pou anrezistre *online*.

E sa ti pou fer li pli fasil pou zot. Nou ti annan sa sistenm avan, *online registration*, ki apre ti fer sanze, ti dir pa bon, nou'n fer sanze. E la mon pe mazine avek sa, petet mon pe mazine kekfw i pou kapab retournen letan nou pou pe koz lo Lalwa eleksyon, sa nou ava konnen pli tar.

So, *therefore* Mr Speaker, pou mwan konklir, mon pou relans lapel ankor, mon pou dir ki sa lamannman i byen in vini. Wi, in annan konsiltasyon, i bon in ganny anmennen. Mon ti a kontan ki leklersisman sa bann zenn ki'n demann sa bann keston i ganny reponn.

E an menm tan nou pou relans lapel ankor avek sa bann zenn ki annan 18 an e ki pou ganny 18an ziska le 27

Septanm, pou silvouple ekout byen letan Biro Komisyon Eleksyon i dir zot desann pou vin anrezistre, e fer zot devwar, fer li zot devwar e fer li- egzers zot drwa premyerman enn, e fer li zot devwar pou zot anrezistre e pou zot vote le 27 Septanm. Mersi Mr Speaker.

MR SPEAKER

Mersi Onorab. Onorab Naidu ou kapab pran laparol.

HON SATHYA NAIDU

Mersi Mr Speaker. Bonn apre midi VP ek ou delegasyon. Si ou pe al *tick* pou Wavel Ramkalawan e apre ou pe al *tick* pou Herminie savedir ou'n gat ou vot, zis *tick* pou Wavel Ramkalawan 2025.

An relasyon avek Prozedlwa ki devan nou, i fer 12enm Lamannman mon rapel onzyenm nou ti'n etabli dat *fixed* ki monte poudir ki nou annan en Gouvernman, wi, i en Gouvernman ki pe met an plas bann provizyon legal ki avans nou la demokrasi.

E sa provizyon ki devan i permet bann zenn, bann adilt ki'n ganny 18an sa loportinite pou partisip dan sa prosesis demokratik ki ganny fer en fwa tou le 5an. E pou sa bann zenn i enportan ki zot konpran

lenportans sa prosesis elektoral.

Wi, byensir Komisyon Eleksyon i dir vote i drwa- i ou responsabilite. Ou bezwen realize poudir sa drwa i en drwa ki pa tou dimoun atraver lemonn i annan sa drwa pou zot kapab partisip dan en tel prosesis elektoral. E ozordi pou Sesel ariv kot in arive, in annan bann lavansman ki'n arive tou dilon nou la demokrasi pou fer sir ki ou annan sa drwa pou nou kapab egzerse pou partisip dan sa prosesis.

E i ou responsabilite aköz tou sa ki arive avek pei i konsern ou e i pou enpakte ou lavi baze lo desizyon ki nou koman bann politisyen, bann MNAs ki pe al partisip dan sa eleksyon e menm lo latet Egzekitiv Prezidan avek kandida Vis-Prezidansyel i partisipe kot se bann *decision-makers* ki pou kapab avans lavenir nou pei pandan en dirasyon 5an.

5an i en kantite letan dan lavi en pei en pep e i enportan ki zot pran bann desizyon ki byen. I enportan ki zot realize parey Onorab Lemiel in met devan ki ou pa ou kapab konplent si ou pa'n partisip dan en prosesis elektoral vizavi konsekans ki atase avek rezilta

en eleksyon. Alors, i enportan ki ou angaz ou dan sa legzersis.

Mon rapel en bon pe letan pase kantmenm ou pa' ti'n ganny 18an ou non ti'n ganny met dan rezis voter e nou konnen listwar i la koman laprev kot nou'n war labi.

E alors, lo sa baz ki'n annan en lamannman, ki'n anpes Komisyon Eleksyon parey dan lepase non ti'n ganny mete otomatikman kot ozordi nou oule promouvwar en sans responsabilite parmi bann zenn, pou realize poudir le moman ki mon'n ganny 18an atraver sa lamannman ki nou, nou pe avanse, kot ou pou bezwen desann se ou koman sa endividi ki pou bezwen desann kot ou bezwen fer lanrezistremman kot biro eleksyon pou ou kapab partisipe.

Otan ki ou non i aparet lo rezis, ou pou dan en pozisyon pou ou kapab vini pou vin deservi ou drwa pou ou kapab annan en *say* dan sa prosesis elektoral. Byensir, a en serten pwen - 3 mwan avan eleksyon rezis ti'n fermen e kantmenm ou ti'n ganny 18an ou ti napa sa drwa pou partisipe e se sa lenzistis dan en serten fason ki nou ozordi nou pe korize.

E byensir, Onorab in demande ki pou arive le 15

Septanm si an ka i annan bann zelev ki al aletranze eski zot pou annan drwa pou vote? Mon rapel poudir ki ti'n annan en prosesis kot sityasyon a en serten pwen ki ti'n ganny fer lo nivo Egzekitiv avek Komisyon Eleksyon, kot nou ti pe sey etabli eski i ti pou an posibilite pou met bann stasyon vote atraver bann diferan Lanbasad.

E mon rapel poudir ti annan en leokri lo kote Lopozisyon pou dir nou pe al vol eleksyon. Eski nou, sa parti ki pou vol eleksyon? Sa parti ki'n debout pou la demokrasi, pou avans la demokrasi. Mwan mon rapel akòz nou ti dir “Gappy out !”, mwan mon rapel ler ti annan ka Ankour kot nou ti pe anpes Perseverance, bann zabitan Perseverance vot 2 fwa dan eleksyon.

Mwan mon rapel lalit ki nou, nou'n anmennen pou fer sir ki nou annan en rezis voter elektronik, e mon rapel sa kantite lalit ki nou nou'n fer pou fer sir ki nou annan en laplenn ki nivo, akòz an 2011 ler mon ti form par *SNP* nou ti'n *boycott* akòz sa letan Lalwa eleksyon pa ti zis.

E *fast forward to 2025* nou annan en *playing field* ki zis, kot tou bann parti prenan k pe partisip dan sa prosesis demokratik i annan menm

loportinite pou zot kapab avans zot zanfan pou partisip dan eleksyon e ozordi lo sa lot kote, sa lot parti prenan i sa voter i osi i annan sa drwa.

Alors, vizavi konsern ki'n ganny soumet nou konnen poudir ti'n annan en propozisyon. Byensir lozistik e lezot ankor i vin koman bann defi pou kapab enplimant sa prosesis lo sa antyerte.

So, an zeneral, mwan mon panse poudir ki sa lamannman i en lamannman ki en *good step forward* pou la demokrasi. Mon konsyan poudir pou annan lamannman vizavi *Elections Act* ki pou tous lo sa lamannman ki nou pe fer dan Konstitisyon.

E mon pou profit sa moman pou mwan kapab ganny en dialog dan en serten sans avek nou bann *first time voters* vizavi sa responsabilite ki tre serye. Mersi.

MR SPEAKER

Mersi Onorab. Laparol mon a donn Onorab Aglae.

HON EGBERT AGLAE

Mersi Mr Speaker. Mon a dir bonn apre midi *VP* e *panel Electoral Commission* e reprezantan AG.

Mr Speaker, sa lamannman ki devan nou la lo nou Konstitisyon 12enm

annefe, i enn ki i enportan an menm tan i enn ki mon pou dir la, moderniz en pti gin lo sistenm elektoral lo bann fason fer, lo bann prosedir avan eleksyon.

E nou tou nou konnen pou ou al dan en eleksyon ou bezwen annan en lalis ki kredib, ki'n ganny sertifye e la ou kapab dir ou'n pare pou antre dan eleksyon.

Sa ki mon kapab dir la ozordi, se ki sa lalis pa ankor konplet byensir aköz i annan bann voter ki pa ankor anrezistre e osi i annan bann lezot sanzman ki arive kot lalis voter baze lo ou *constituency* distrik kot ou reste, ouswa si i annan bann sanzman dan ou sinyatir non ou al kot Komisyon pou al fer sa bann koreksyon.

E, taler i annan en Onorab in koz avan mwan Mr Speaker, in koz lo zot pti lager pou la demokrasi, pti me ozordi zot per sa menm demokrasi ki zot ti lager letan zot kanmarad pe rod la demokrasi.

Komisyon Eleksyon i sipoze en antite endepandan, *ok*, e mon dakor ek ou Mr Speaker, *for once* ki ou'n met laliny drwat taler letan en Onorab in komans dir Gouvernman ki'n anmenn sa pou sa, aköz ou menm ou, ou ti dir Mr Speaker, letan nou ti

anvi anmenn kestyon ou Komisyon Eleksyon vin reponn ou ti dir i en Antite endepandan.

Alor nou gard li son lendepandans pou li fer son travay ekose sa ki ti ganny lager dan lepase pou ki Komisyon Eleksyon i fer son travay dan en fason *fair* e ki *in the end* son *end* prodwi li se i kapab delivre en *free and fair election* ki tou dimoun ki annan son drwa vote, tou bann kandida ki pou debout dan bann eleksyon i ava satisfè. Se sa ki nou ti a kontan vwar nou, *ok*?

Si mon pou retourn lo sa lamannman ki devan nou, wi, ti pou napa sa lamannman si nou ti gard sa provizyon dan Lalwa kot *automatic registration* ti été, *ok*? me dan lepase sa bann letan *SNP*, ti kont sa prensip ki i annan *automatic registration* letan ou vin ganny laz 18an. *Ok*, zot ti lager kont sa.

Aprè zot in anmenn en bann lager asarnen, Gappy *out*, lot, lot e la nou'n ariv lo en pwen ozordi, kot nou bezwen vwar lafason ki bann zenn ki'n ganny 18 an e ki pou ganny 18an avan dat eleksyon le 27 Septanm zot a ganny sans anrezistre e vote.

Me mon annan en pe konsern ki mon anvi met devan - e mon konnen pou annan serten Lalwa ki ou ganny

amande osi ki pou *tie in* avek sa lamannman konstitisyonnel me selman nou bezwen pran kont *the level of preparedness* ki Komisyon Eleksyon i bezwen annan pou kapab *cope and manage* sa bann sanzman ki nou pe prese la ozordi ki'n vin devan nou koman bann lamannman.

Enn premyerman letan nou pe dir ki ou pou ganny eleksyon, ou pou ganny sans pou anrezistre letan ou ganny 18an avan, menm si lalis pou fermen dan en sans. Premyerman, sa ki mon ti a kontan klarifye, *ok*, eski nou pou an en lalis final baze lo serten lasonpsyon mon kapab dir, aköz tou le 5an ou pou annan ou anviron 6 mil a 7 mil bann *first time voters* ki nou apele *ok*.

E si ou kas li an 25 distrik nou pe koz apepre 250, 240 a 250 par distrik, e la ladan menm baze lo dernyen lalis voter ki nou ti al nou dernyen eleksyon avek par bann distrik, e nou tou nou konn apepre *the norm* ki nou lalis voter savedir la kantite dimoun, pran kont osi bann lanmor ki'n pase petet bann mouvman osi ki'n arive ou pou annan en pti *fluctuation* dan ou lalis byensir.

Me selman ou pran kont osi poudir ou pou annan bann

add up ki pou vini baze lo bann *first time voters*. *Ok*, so, nou koman bann kandida sirtou la ki pe debout nou pa pou konn en lalis final pou nou distrik nou, *ok*, nou pou konn en lalis preliminar ziska ler ou ferm sa lalis, be apre ou konnen poudir i riske annan serten norm *voters* ki pou antre lo ou lalis ankor.

So, ki fer ki travay kanpanny li menm li i vin dan diferan dimansyon la, ou aköz ou bezwen konn ou lalis vote, e osi ou anvi konnen ou lalis final petet ler ou'n *plus* konbyen mon pe al gannyen lo mon.

So, se sa ki i enportan pou nou osi- in annan bann diskisyon avek ban parti politik ki ankor *ongoing* i annan ankor ne kantite leklersisman ki bann parti politik pe rode avek Komisyon Eleksyon pou nou konnen egzaktman *where does it end* e ki kantite ki nou espekte kapab vwar.

Aköz la kantite osi pou reflekte lo kantite *ballot papers* ki sak distrik pou bezwen annan, zour *on election day*, prenon kont ki pou annan bann zour ki pou vot avan me selman nou konnen dan sak distrik si ou pe anvoy 200 kot mon ankor mon pou konnen petet mon pou bezwen annan mwan apepre 2200.

Plus, avek bann *contingency* si i annan bann vot gate ouswa bann keksoz ki pou bezwen i arive dan eleksyon, so sa i bann konsern ki mon krwar i bezwen ganny adrese dan bann *interview* ki Komisyon Eleksyon ti fer, zot ti nonm *abundant lists* ouswa en *annex*.

Nou ti a kontan en pe leklersisman lo ki mannyer sa osi pou marse si zot pa ankor, petet pa tou keksoz ki pou bezwen dir mon la aköz zot bezwen retourn ek parti politik pou al pas serten lenformasyon zot pa pou anvi devwal tou keksoz, me sa ki zot kapab eklersi mon krwar i enportan pou eklersi li la *ok*. Dan sa *Elections Act* la.

Apre zot in fer en mansyon osi dan bann lamannman *residents* ki- bann Seselwa ki viv aletranze. E mon konnen i annan legzersis ki'n ganny fer, sirtou atraver *Foreign Affairs*, kot i konsern *diaspora*, *ok*. E zot pe *issue* bann *ID card* aletranze Gouvernman pe fer sa e *passport* osi, *ok*.

Now, wi, wi- letan mon pe regard sa ki zot koman Komisyon Eleksyon byensir i annan desizyon ki'n ganny pran ki pou napa okenn stasyon aletranze ki'n dabor petet a lavenir nou pa konnen sistenm i modernize, ki pou mwan i en

direksyon ki mon krwar nou pa ankor pare pou al dan en direksyon parey.

Letan en zenn in anrezistre apre ki lalis in fermen, dizon i ganny laz le 10 Septanm, sa zenn i ale i al anrezistre aköz ou'n dir ziska dat eleksyon dat eleksyon i le 27, mon pa konnen si zot pou pran sa 3 zour 25, 26, 27 mon ti a kontan zot eklersi sa, si i pou konpri 25, 26, 27 ouswa Lalwa i spesifik lo 27?

Eski zot pou pare pou al fer sa bann verifikasyon? Aköz menm si Lalwa i dir ou, ou pou anrezistre be selman ou lanrezistremman in fini letan sa dimoun ki sorti kot biro eleksyon i vini i sertifye ou dan sa landrwa e la ki i final la i fini, zot konsider ou apre zot fer zot bann *due diligence*.

Eski zot pou annan tou sa letan pou al fer sa pandan sa peryod letan, letan in ariv pre eleksyon? *Ok*? Sa i bann konsern ki nou bezwen demande ki zot kapab fer li *ok*. E an terminan Mr Speaker, en kantite zenn la deor e atraver ou Onorab Lemiel in lans lapel, pou bann zenn ki pa ankor anrezistre.

Aküz ozordi i an zenn k pa enterese ditou avek politik li, me selman nou konnen poudir en eleksyon i determin

direksyon e lavenir ki en pei i pran e letan nou pe koz en pei lavi son sitwayen osi i an kestryon.

Pa vote i en fason protestasyon vote li menm li, *ok*, me selman letan ou pa vote mon pa krwar poudir malgre ou ti pe proteste dan en fason letan ou war keksoz pa pe al dan ou faver byensir lozikman, mwan pou mwan i koumsa mwan, eski pou mwan sa kestryon, a demande eski ou pou annan drwa pou ou anmenn bann konplent asarnen isi laba ?

Me selman Konstitisyon i garanti ou koman en Seselwa pou ou annan bann diferan drwa li enkli drwa vote, *ok* ? So sa lapel mon krwar ki enportan ki lanse se ki nou ban zenn i bezwen sezi loportinite enn fwa pour tou avan en eleksyon al anrezistre *ok* ?

Nou ti swete ki sa *online registration* i a kapab materyalize, desito ou ede osi avek bann mouvman aköz nou santi ki bann legzersis ki Komisyon Eleksyon i fer avek bann diferan rezyon distrik, i byen li, me nou santi petet i pa ase. Aköz *timing* parfwa ki letan zot fer sa bann legzersis, i annan ki pe travay, i annan ki dan bann lezot keksoz i fer ki zot pa kapab akse.

E parey to annan bann sant rezyonal parey Anse Boileau ti annan, petet sa i devret konsidere e retourn li parey met bann sant dan rezyon ki a pli fasil pou sa bann zenn *move* al fer zot *registration*. E sa i ava ede osi ogmant li *in the end* poursantaz ki nou apel bann voter ki pou al vote.

So, avek sa Mr Speaker, mon konnen poudir bokou zenn pe *look forward* e bokou zen pe al donn Dr Patrick Herminie zot vot...

(APPLAUSE)

HON EGBERT AGLAE

...sa in dir klerman. E mwan mon konnen poudir mon konvenki ki si napa okenn lenterferans dan travay Komisyon Eleksyon e dan bann deroulman eleksyon e nou pou bezwen *monitor* sa fer sir ki sa bann keksoz pa arive - nou a ganny sans - Sesel i ava annan li en *free ek fair election* apre le 27 Septanm e mon tann dir laba ti napa, me selman mon demann mon lekor be ki mannyer zot ti ganny eleksyon si ti napa en *free and fair election*? So, Mr Speaker, mon pou aret lanmenm. Mersi.

MR SPEAKER

Mersi Onorab. Laparol, pou Onorab Samynadin.

HON KELLY SAMYNADIN

Mersi Mr Speaker. Bonn apre midi Mr Speaker, *VP, panel* e tou dimoun ki a lekout.

Mr Speaker, mon santi ki i vreman enportan pou mon eksprim mon sipor pou sa 12enm Lamannman Konstitisyon Larepublik Sesel e pou komann klarite ensi ki Kler Wayans ki ganny reflekte dan rezondet sa *Bill*.

Le sel lobzektif mazer i pou koriz en prosedir ek sirveyans konstitisyonnèl ki'n la pandan lontan, pou akord drwa vote sa bann sitwayen Sesel ki ganny laz 18an lo dat en eleksyon. Sa i pa en zes politik me ki en zes- e i en nesesite demokratik. Mr Speaker, i enportan ki nou defann drwa vote koman en prensip fondamantal.

Nou Konstitisyon i zisteman rekonnet ki enn fwa ki en Seselwa i ariv laz 18an, zot ganny akorde avek bann drwa konplet sitwayennte ki enkli drwa pou partisip dan fasonnman gouvènanans nou pei atraver prosesis elektoral.

Sepandan parey in ganny klerman eksplike, i annan bann lenkonsistans prosedir dan *Elections Act* ensi ki dan

timeline lanrezistremman voter ki annan en lefe in entansyonnèl pou refiz sa drwa a en pti group signifikan ki bann zenn voter ilizib.

Eski i zis ki en sitwayen ki ganny 18an lavey oubyen zour eleksyon pa kapab vote senpleman akòz son laniverser i tonm an deor vitrin lanrezistremman? Sa lamannman i definitivman reponn sa kestyon, non, i pa zis. E i pe sers pou remède en lenzistis dan en fason zis, lezitim e konstitisyonnèl.

Mr Speaker, sa gap dan prosesis elektoral i bezwen ganny fermen. Parey in ganny klerman eksplike anba provizyon aktyel Lalwa eleksyon *Cap 262* ek Lartik 114 nou Konstitisyon, rezis voter i fermen 3 mwan avan eleksyon, sa i inevitableman ekskli bann ki ganny 18 an pandan sa peryod.

Mon pa pe koz lo bann ka ipotetik, sa i en realite, e i priv bann zenn Seselwa ki ilizib pou egzers zot drwa koman voter. Lensersyon en nouvo provizyon dan Lartik 114 e atraver lamannman dan Lartik 113 nou Konstitisyon, sa *Bill* i permet bann tel endividi pou anrezistre e vote a kondisyon ler zot ariv laz kalifye lo zour aktyel eleksyon. Sa i en reform ki

pratik, targete e fonde lo prensip.

Mr Speaker, sa lamannman i konsern plis ki en prosedir, i koz lo enklisivite, *youth empowerment* e i favoriz en kiltir langazman sivik. Plizyer *first time voters* pe antisipe pou partisip dan fasonnman zot lavenir.

Par permet zot vote le moman ki zot ariv laz matirite pa en mwan pli tar ni dan prosen eleksyon. Nou pe anvoy en mesaz nasyonal tre for zot lavwa i enportan e zot drwa pou vote pou ganny proteze le moman ki i vin valid konstitisyonnelman.

Mr Speaker, sa lamannman pou mars dan sa kad legal ki deza an egzistans an armoni avek Seksyon 5 a 13 Lalwa Eleksyon, Komisyon Elektoral i deza annan bann mekanizm pou gazet, sertifye e *update* lanrezistremman bann voter.

Sa lamannman pe senpleman prolonz bann mekanizm pou akomod en group klerman defini, bann nouvo sitwayen ki admisib. I napa okenn menas lo lentegrite oubyen sekirite nou prosedir elektoral. Annefe, i pe amelyor konfyans dan sa sistenm an demontran son abilite pou

adapte e akte dan en fason ki zis.

An konklizyon Mr Speaker, sa 12enm Lamannman i en propozisyon *modest* avek en lenpak demokratik ki profon. I pe asire ki sak Seselwa *admissible* pe enport kan ki zot ganny zot 18 an pandan peryod eleksyon, i kapab partisip dan nou demokrasi san retar oubyen diskriminasyon.

I met an alinyman lespri ensi ki let nou Konstitisyon, e i afirmen ki Sesel i en repiblik modern, enklizif e zis. Mon pe demann avek mon bann koleg pou siport sa *Bill* e debout ansanm avek nou bann zenn pou zot drwa pou vote, pou zot plas dan nou demokrasi, e pou lentegrite dan nou Konstitisyon.

Avek sa Mr Speaker, mon konfirm mon sipor pou sa 12enm Lamannman nou Konstitisyon. Mersi.

MR SPEAKER

Mersi Onorab. Pas laparol Onorab Uranie.

HON ROCKY URANIE

Mersi Mr Speaker. Bonn apre midi *panel*, bonn apre midi tou koleg Onorab. E byensir en bonn apre midi pou tou zabitan Zil Pros ki a lekout. E tou bann

zenn ki pa ankor anrezistre e pour bann ki'n fini anrezistre osi.

Mr Speaker, sa i 12enm Lamannman nou Konstitisyon Sesel e sa lamannman pe fer provizyon pour ki tou bann zenn ki'n ganny 18an sa lannen e bann ki pou fanny 18an sa lannen, zot kapab anrezistre ou zot vote dan sa lannen ki annan eleksyon e osi dan lezot eleksyon a lavenir.

Lartik 14 nou Konstitisyon i fer ki pou kalifye en sitwayen Seselwa pou vote, fodre i annan 18 an e i vin anrezistre koman en voter aköz sa i son drwa. Eskiz mwan, Lartik 114 Mr Speaker. Me par kont malgre ou annan sa drwa pou anrezistre, koman en voter, i osi annan- ou kapab osi ganny diskalifye koman en voter.

Sa i dan bann fason par egzantp si ou ganny konsidere konmkwa ou annan en probleman mantal, ou bann akt kriminel petet ou dan prizon, sa osi ou perdi ou drwa, e osi kantmenm ou en Seselwa me si ou pa pe reste Sesel sa osi i kapab diskalifye ou dan en serten fason pou ou pa vote.

Pandan lannen ki annan en eleksyon prezidansyel, oubyen parلمانter ki ganny fer, normalman rezis voter ki'n ganny sertifye ti ganny fermen

3mwan avan sa dat eleksyon e ki nou ti vwar ki ti annan plizyer bann zenn ki ti ganny 18an apre dat ki rezis ti'n fermen ek dat ki eleksyon i ganny fer ki pa ti kapab vote dan eleksyon pou egzers zot drwa.

E alors, la, sa lamannman pe fer ki sa bann zen ki dan sa group i kapab egzers zot drwa zot osi. Mr Speaker, fodre nou fer kler ki- ek tou zenn la ki si ou annan 17an an montan e ki ou konn ou laz byen, dat nesans byen e ki ou asire ou pe ganny 18 an fodre ou al anrezistre e ou pa zwe avek.

Akoz mon dir sa, aköz i annan bann zenn ki ou demann zot- mwan koman en edikater, mon zwen sa dan lekol e mon'n zwenn sa. Kantmenm nou zwenn zot ennler i ana ki pa kon zot dat *birthday*, e sa i vre Mr Speaker, i en fakt, mwan mon'n zwenn sa dan lekol.

So, i enportan ki nou *être* realis pou fer konpran nou ban zenn ki zot bezwen get byen bann dat aköz i annan zantfan ki dapre li zantmen in deza ganny en selebrasyon en *birthday* oubyen en kado son laz pou *remind* li son laz. I annan Sesel, i annan ki pas ladan, i annan Sesel mon'n rankontre sa.

Alors Mr Speaker, la prezan tou bann zenn ki pou ganny sa- ki annan 17an ki pe al ganny 18an provizyon in ganny fer pou zot al anrezistre pou zot kapab fer zot drwa e zot devwar koman en voter. Me par kont, ki nou bezwen fer kler ek bann zenn, ki pa aköz sa lamannman pe vini e i pou pase ki ou, ou pou tatonnen pou ou al anrezistre aköz i pou bezwen annan en dat.

Komisyon i a fer kler ek nou, i pou bezwen an en dat ki zot pou dernyen dat pou zot kapab vin an *register* pou zot kapab vote sirtou parey dan sa eleksyon ki pe vini, ou pa pou kapab vini le 18 Septanm dir ou pe vin anrezistre pou ou vote.

Mon krwar i pou'n bezwen annan en dat, so alor ou pou bezwen bouz boner pou ou al anrezistre pou ou vote pou evit dezapwentman.

Mr Speaker, Konstitisyon i Lalwa Siprenm, pei e bokou dimoun i kontan dir ou nou, nou annan nou drwa anba Konstitisyon, nou annan nou drwa anba Konstitisyon koman en keksoz i arive.

Me selman ler i annan pou fer avek eleksyon nou'n remarke se ki bokou dimoun, bokou dimoun menm bann ki deza adilt ki'n depas 18an byen lontan e nou bann zenn ki'n

ganny 18 an zot pa oule al anrezistre, zot pa oule vin vote. Me sa i vedir pou mwan dan en serten fason ou menm ou, ou pe vyol ou prop drwa Konstitisyon e ou devwar.

So, ou bezwen pe mazin lo la, ki ou vot konte e alor pou ou fer sir ki ou prezerv tou ou drwa anba Konstitisyon i enportan ki ou desann ou anrezistre koman en voter pou, ou fer ou drwa e ou devwar.

Mr Speaker., en pe refleksyon apre tou sa koze ki nou'n koze, Onorab Aglae in tous en pe lo la. Eski petet manm piblik pou demande eski petet pa ti a pi bin retourn anrezistremen otomatik ankor? E sa mon a les avek Komisyon petet pou koz lo la.

Mr Speaker, mwan osi mon pou zwenn avek Onorab Lemiel pou lans lapel, pou lans lapel la deor avek nou bann zenn, aköz zot ki pou fer e diferans dan sa eleksyon ki pe vini le 27 Septanm sa lannen. E se zot ki bezwen desann anrezistre fer zot drwa e zot devwar konte.

Fer sa vin zot responsabilite, desan pou vin vote e byensir pou vot Patrick Herminie koman Prezidan Sesel e Rocky Uranie koman kandida pou Zil Pros. Mersi Mr Speaker.

MR SPEAKER

Mersi Onorab. Laparol pou Onorab Sandy Arissol.

HON SANDY ARISSOL

Mersi Mr Speaker. Bonn apre midi VP ankor enn fwa avek ou lekip.

Mr Speaker, mon ti a kontan zis dir poudir mon war en pe drol ki en dimoun pa konn son laz oubyen son dat nesans, parske normalman letan en pti baba i ne, son paran i anmenn li kot Biro Deklarasyon *Civil Status* e zot fer bann nesaser pou li ganny en serti- sa ki nou apel en sertifika nesans.

E Lakour si mon pa tronpe dan Lalwa i donn en peryod letan pou ou kapab deklar sa zanfan, e alor sa bann paran e fer sa. E avek sa sertifika nesans ou kapab osi ganny en Kart Idantite.

E pou en zanfan son Kart Idantite napa en portre parey nou dir, ziska ler i ganny son 18an, la i al sanz son Kart Idantite e i ganny enn ki annan son zoli figir lo la.

E pa bliye letan sa paran i anmenn sa zanfan batize, i fer sir ki sa zanfan i annan en paren ek en marenn, ki vin manz son gato bwar son limonnad ki i osi konnen ki dat son fiyel ti ne.

Alor i en pe difisil pou mon aksepte poudir ou'n annan dimoun lo La Digue, ki mon pa tro *happy* parske mon konn en bon pe dimoun La Digue mwan - ki pa konn vreman zot dat nesans. En pe drol parske tanzantan en dimoun i vin ek son Kart Idantite, “sef mon laniverser ozordi, gete donn mwan en keksoz ek ou”.

Alors sa zafer blanm dimoun La Digue zot pa konn zot dat nesans, mon pa pou dakor, mon pa pou asire, mon pa pou dakor ek sa, mwan mon krwar i en *statement* ki'n mal donner e pe mank respe pou bann Digwa.

(APPLAUSE)

HON SANDY ARISSOL

Mr Speaker, ou konnen, mwan mon anvi felisit *Electoral Commission*, ou konnen aköz mon anvi felisit *Electoral Commission*?

Parske *Electoral Commission* premyerman zot in fer konsiltasyon, zot in fer konsiltasyon avek tou bann parti politik kot zot in kapab vin devan, fer bann propozisyon, met bann sizesyon, rode ki manner nou kapab aksepte bann propozisyon pou asire ki sa *playing field* i kontinyen reste nivo Mr Speaker.

Dezyenmman, mon anvi felisit *Electoral Commission*, parske pou sa zefor an plis ki zot in fer, ki zefor mon pe koz la? Zot in nobou sorti dan zot biro e vin rod nou dan nou distrik. I annan bann dat spesifik, bann zour spesifik ki zot donnen pou sa zenn, pa menm zenn, menm lezot dimoun osi kapab fer serten sanzman an relasyon ki zot anvi, an relasyon avek rezis voter, ki mon krwar i en zefor ekselan ki zot in fer e mwan mon bezwen felisit zot pou sa travay.

Mr Speaker, lamannman ki pe anmennen devan nou ki i pe fer, se i pe donn posibilite ankor tou dimoun pou ganny sans pou vote ki mon toutafe dakor. E mon kontan ozordi parske mon rapel an 2011 letan nou sa letan *SNP* nou pa ti pran par dan eleksyon sete pou en rezon, pou nou travay lo *electoral reform*.

E mon *happy* ozordi rezilta ki in anmennen parske mwan mon enn bann ki ti dakor pou nou antre dan electoral reform Mr Speaker. E ozordi in aport fri. Ki fri ki in aporte? Ozordi, dat eleksyon i ganny anonse, dat eleksyon Sesel i ganny anonse.

So, tou Seselwa ki vote i konnen ki dat eleksyon pou li

plan son vakans, pou li konn son *birthday* premyerman pou li kapab kan mon bezwen al anrezistre konnen poudir la mon ganny 18an mon bezwen al anrezistre, sa i en pwen enportan, kardinal Mr Speaker.

Apre dezyenmman, rezis voter i reste ouver ozordi, lontan rezis voter ti ouver 3mwan apre i fermen, so si ou'n ganny ou laniverser oubyen ou pa konn ou laniverser oubyen ou konn ou laniverser ou pa ti kapab al anrezistre parske rezis ti fermen, la rezis i reste ouver pou ou kapab al anrezistre.

Trwazyenmman *digital copy*, lontan *Electoral Commission* ti kit sa kart o bor zot lestoman, zanmen zot ti donn nou, zot ti donn nou *hard copy*, *soft copy* zot ti kit avek zot, pour ki rezon mon pa konnen. Be ozordi, *Electoral Commission* avek reform ki'n anmenn nou ganny *digital copy*.

Rimann pa ti ganny sans vote alors en zour, e ozordi atraver reform ki'n arive bann dimoun ki rimann e pa ankor ganny son santans, i osi kapab pas atraver sa prosesis pou li desann e vot pou sa ki i anvi vote.

Mr Speaker, sa ki enteresan an relasyon avek vote, toultan letan nou koz lo bann voter mwan mon ti anvi

rod sa ki annan pou fer ek mwan, Sandy John Arissol, koman, e mwan mon konn mon dat laniverser Mr Speaker.

Lartik 80 nou Konstitisyon; Lartik 80 nou Konstitisyon i dir en dimoun i kalifye pou ganny elekte koman en Manm Lasanble Nasyonal si sa dimoun i kalifye pou vote dan eleksyon prezidansyel ouswa Lasanble Nasyonal anba sa Konstitisyon.

Sa i fer ki ozordi Sandy John Arissol, ki ti ne le 8 Me, 1977, ki mon konn mon paren ek mon marenn, mon papa ek mon manman, sa manrmay ki Onorab Lemiel pe dir Mr Speaker, in kas rikord, kas rikord sa manrmay la, sa i fer mon katriyenm manda ki mon pe al ladan Au Cap, mon katriyenm manda.

Mon'n fer 2 manda, St Louis, enn Bel Ombre e tou le 3 elekte, e la mon pe al Au Cap avek en bi pou mon *win* pli gran mazorite ki mon'n deza gannyen dan okenn eleksyon Sesel. Alor, sa pti manrmay la, ki pe vini in fer kontribisyon ekselan pou son pei.

Akoz mon'n al lo Lartik 80 Mr Speaker? Parske ozordi koman en Manm Lasanble Nasyonal e la dan Konstitisyon i dir en Manm Lasanble Nasyonal i pa dir en Manm tel

distrik. Letan ou en Manm Lasanble Nasyonal ou kapab, ou lib pou ou parti gete kote i anvi anvoy ou pou al debout avek bi pou ou kapab *win* eleksyon e *win* sa distrik Mr Speaker.

Lot Lartik ki mon ti a kontan pas lo la Mr Speaker, se Lartik 114 ki Onorab Rocky Uranie in pas lo la letan in dir bann dimoun pa konn son dat nesans La Digue, i Lartik 114.

HON ROCKY URANIE

(Off-Mic)

HON SANDY ARISSOL

(I ankor pe rod en *point of order* pou li al demann leskiz, pardon)-.

Mr Speaker, Lartik 114 i dir en dimoun ki en sitwayen Sesel e ki'n ariv laz 18 an, mon mazine i konn son dat nesans sa enn, i annan drwa anrezistre koman en voter amwen ki sa dimoun i diskalifye pou lanrezistrem anba sa Lalwa pou bann rezon swivan; -

Mon kalifye koman en Manm- pou mon pran par danm eleksyon koman en Manm Lasanble Nasyonal anba Lartik 80 aköz mon kapab, mon lo rezis voter e mon kapab vote pou Lasanble e osi pou prezidansyel. E la i dir letan en dimoun i ganny 18an Mr

Speaker, i kapab anrezistre san; -

(a) sa dimoun napa en maladi mantal, mwan ziska prezan mon pa'n zanmen ganny asiste oubyen ganny admet ou okenn maladi mantal, mon pa'n sey zanmen al ver delo sale, mon pa'n sey zanmen tay ek personn ek en gran kouto, mon'n sey konport mon tre byen mersi. An relasyon avek konstitisyon lartik 114.

E dezyenmman i dir krim; krim mon mazine mon pa'n pran gran kouto pou mon tay ek personn dan milye semen.

E trwazyenmman, i dir rezidan an deor Sesel, mwan toultan mon'n reste Sesel e mon kontan mon zoli pei e la prezan a mon pe reste *chez* mon anler O Niole parey mon'n ganny dir Mr Speaker.

Alor, mon krwar i enportan letan nou pe get bann *first time voters* pou nou osi get osi nou lekor parey mon kontan fer, fer sir ki mwan mon annord avan, avan mon pe sey rod vot avek lezot zenn.

Me par kont lamannman pe fer provizyon pour ki tou dimoun i ganny posibilite pou li partisip dan eleksyon pou li kapab vote Mr Speaker. E koman sa zenn e tou bann distrik ozordi, bann zenn pe vin devan pou anrezistre. Kantite

zenn pe pozitiv bokou vin devan ou anrezistre.

Swa *Electoral Commission* i al zwenn zot pli pre lo nivo distrik, swa zot menm zot annan zot desann e zot al kot biro. Zis dan lakour kot mwan mon annan 3 vot, nouvo vot Mr Speaker, ki definitivman i pa pou al pou en dimoun ki latet pa bon, me i pa al vot pou Prezidan Ramkalawan.

(APPLAUSE)

HON SANDY ARISSOL

Tou dimoun ki nou koz avek ozordi Mr Speaker, an relasyon avek lanrezistremman zot tou parey Onorab Rocky Uranie in *remind* nou, poudir sa bann dimoun pa pe al vot pour Patrick Herminie parey in dir e zot pe al vot pour Prezidan Ramkalawan.

E mwan mon krwar Mr Speaker, mon konvenki ki bann lamannman ki'n ganny propoze ozordi la ki nou, nou pe al vot an faver parske nou krwar ladan, nou krwar dan transformasyon nou krwar dan sanzman e kot nou pe ale ozordi pei i dan bon semen. I annan konsiltasyon avek *Electoral Commission* avek tou ban parti politik en keksoz ki pa ti neseserman annan dan lepase.

Tousala i bann sanzman ki'n arive e mwan mon krwar tou bann zenn ki pe ekout ankor e tou dimoun ki pe swiv nou zot vwar kot pei pe ale, pei i lo bon semen Mr Speaker, an relasyon avek lamannman ki pe anmennen e tou dimoun pou desann e pou al kit *LDS* lanmenm e nou pe dir *no turning back*, kit li lanmenm e *LDS* Sesel !

E VP mon ti a kontan dir ek ou poudir lamannman ki'n ganny propoze par *Electoral Commission* i annord avek touletan nou, nou'n pas lo la nou'n gete e nou, nou pe dir nou pou donn ou *full* sipor avek ou lekip pou sa.

E mon ti a kontan dir bann zenn laba deor, sirtou bann ki lo La Digue ki'n ganny dir zot pa konn zot dat nesans mon krwar i mal mon pa dakor avek sa. Mersi bokou Mr Speaker.

(APPLAUSE)

MR SPEAKER

Wi, Onorab Uranie?

HON ROCKY URANIE

Mersi Mr Speaker. Mon krwar Onorab Arissol i pa'n zanmen vremen en ansennyan kalifye in manz zis *ice cake*. Si i ti *teach* parey mwan, i ti edike i ti koz ek

zanfan, i ti swiv zanfan, menm bann ki ti dan S4, S5 i ti pou realize poudir i annan ki vremen pa konn zot dat nesans aköz menm la ziska la i annan ki ankor pe ganny difikilte pa kapab lir avek ekirir.

So, Onorab alors mon pa'n zanmen di La Digue parey ou'n dir - mon dir an zeneral bann zenn ki nou koz avek. E alors Onorab mwan, mon krwar ou pe per Onorab Larsen pou donn ou en dans Au Cap. Mersi Mr Speaker.

MR SPEAKER

Mersi. Mon pa krwar i annan okenn privez ki'n ganny met an kestyon, ou annan en lopinyon, Onorab lot kote i annan en lot lopinyon, mon krwar sa i ariv toultan nou a kontinyen. Onorab Larsen, ou annan laparol.

HON CELINE LARSEN

Mersi Mr Speaker. Bonn apre midi a tous. Mon apresye ki mon ganny sa loportinite pou pran laparol lo sa lamannman enportan ki pe ganny propoze lo Lalwa eleksyon. Mon pou donn mon sipor pou lamannman sa Lalwa ki dan son mazorite i fer en gran pa annavans pou asire ki plis Seselwa i ganny sans egzers zot drwa demokratik.

Sirtou nou bann zenn ki pe antre dan laz vote.

Nou tou nou konnen ki demokrasi i baze lo prensip e partisipasyon zis, alor lamannman ki pe permet bann zenn ki pou ganny 18an zour eleksyon pou zot kapab vote i en keksoz ki mon siport avek tou mon leker. I fer sans e i al dan direksyon donn bann zenn zot lavwa.

Mr Speaker, lezot lamannman dan sa *Bill* osi i al dan bon direksyon, sirtou avek inovasyon dan teknolozi, enkorporasyon bann nouvo form i dan idantifikasyon e lezot mezir aksesib e efikas. I byen ki nou pe adapte avek realite modern e bezwen nou pep. Koman en pei nou bezwen gard en komitman ferm pou avan nou demokrasi.

Alors, i tre enportan pou demokratiz akse avek vot- vote, sirtou pou nou bann zenn. Me egalman nou zenn i bezwen sipor e ledikasyon pou ed zot konpran aköz ki zot partisipasyon dan sa prosesis vote i tre enportan. Egalman lo lot kote, ou annan lefe ki tou provizyon Konstitisyon i bezwen ganny lavi atraver en Lalwa.

Ozordi nou pe fer en morso sa travay ki lamannman Konstitisyon me tre byento nou pou bezwen donn li lavi atraver

lamannman Lalwa. Menm si napa bokou letan ki reste avan eleksyon mon krwar ki i enportan ki nou zenn e nou elektora an zeneral i ganny enformen e ganny garde azour lo sa bann diferan prosesis lezislatif ki antre pou fer marse sa masin ki i apel nou demokrasi.

Mon reste angaze pou travay pou en demokrasi avek vizyon pli ouver e pli zis. E mon ti a kontan dernyen parol dir bonn sans Onorab Arissol, me Au Cap ou pou pike ou pa pou anbarke ! Mersi Mr Speaker.

(APPLAUSE)

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Bonn apre midi Mr Speaker. Mr Speaker, i enteresan ki mannyer en pti lamannman ki nou tou nou pou vot an faver i anmenn tel politik dan nou Lasanble.

E sa i normal, aköz nou en Lasanble politik nou 3 mwan avan en eleksyon e natirelman nou bezwen nou tou ki isi e nou pou al debout dan en eleksyon nou bezwen esey asire ki bann dimoun laba deor i ekout nou, e sey fer en pti pe politik pou nou

parti respektif e nou kandidatir. Sa i toutafe normal.

E fenomenn ki mon anvi koz lo la apre midi Mr Speaker, i en fenomenn ki mon krwar pa bokou Manm in tous lo la apre midi i sa se aköz ki nou pe koz lo zenn al vote?

E nou bezwen kler lo la, ziska resaman e kekfw menm la kot nou ete in annan en retisans par bann zenn pou al anrezistre pou vote e sa nou tou lede kote latab nou konnen aköz nou mars dan nou distrik e bokou zenn i di nou zot pa pou al vote, poz apre enterese pou al vote, eksetera.

Mon pa en filozof, e malgre ki mon pe al *stand* pou mon setyenm fwa dan en eleksyon 2 Plaisance, 4 Les Mamelles e la 5enm Les Mamelles - mon pa pretann ki mon annan tou repons, me mon ti a kontan sizere ki zenn kekfw pa ti mobilize pou desann pou al anrezistre, swa aköz nou demokrasi in ariv e en tel nivo ki zot pa vwar nesesite pou zot fer en kontribisyon, swa nou demokrasi i sitan pov ki zot pa war nesesite pou desann pou al fer en kontribisyon.

E mon'n dir mon pa en filozof, me nou bezwen sey konpran aköz bann zenn, pa tou *obviously* aköz nou tou nou annan dan sakenn nou ban

distrik respektif en group zenn aktivis motive. Me nou tou nou osi konekte dan sakenn nou distrik i annan en group zenn ki pirman pa enterese pou zot desann e nou bezwen motiv zot.

E sakenn parmi nou ki'n koze la apre midi dan nou fason nou'n fer en fason pou motiv zenn pou desann e sa i byen. Mwan personnelman Mr Speaker, mon dir avek bann zenn pa dir mwan pou lekel zot pe al vote, lenportans i pa ki zot vot pou mwan oubyen ki zot vot kot mwan, lenportans se ki zot desann e ki zot anrezistre pou zot fer zot devwar sivik.

E mon krwar sa set en lenstriksyon e en ledikasyon ki nou devret antan ki bann Manm Onorab donn avek bann zenn dan nou distrik. Motiv zot e en pe parey nou'n fer al apre midi - motiv zot pou pran zot responsabilite aköz i zot devwar sivik pou zot ede elekte sa dirizan pou zot pei, oubyen sa dirizan pou zot distrik ki zot ti a kontan war.

Pa les lezot dimoun fer sa desizyon pou zot, pran zot desten dan zot lanmen e zot osi desann e fer zot swa. E i enportan Mr Speaker, ki nou regard sa - nou devwar egzakteman koman en devwar. Nou tou nou'n koz lo i en loblighasyon nou, nou fer marse

nou pei, i en drwa fondamantal pou vote, pou partisip dan devlopman nou pei, pou partisip dan politik nou pei, pou swazir nou bann dirizan e tousala nou vre, i tousala.

Me, an plis ki tousala Mr Speaker, bann zenn i bezwen konsyan ki sa ki pe arive dan zot pei i pa desizyon lezot dimoun. I desizyon zot osi, aköz se zot ki pou pran nou plas demen, se zot ki pou vin zis asiz dan sa Lasanble oubyen devan *panel* oubyen dan ou sez Mr Speaker, oubyen *State House*.

E donk, nou bezwen edik zot dan meyer fason posib, san sey met tro politik dan zot lavi aköz politik annan de fwa i atir zenn me annan de fwa i fer zenn farous.

Nou bezwen konnen ki mannyer nou, nou antreprann bann zenn e mwan mon'n donn mon legzanp, mon dir zot desann aköz i zot devwar i zot responsabilite, mon pa pe dir zot fer li pou mwan, mon pa pe dir zot fer li kont mwan, me mon dir zot fer li pou zot, aköz e zot pei ki zot pou pe viv ladan demen.

E donk, avek sa detrwa mon lentrodiksyon, sa lamannman konstitisyonnel ki vin devan nou ozordi i ariv a en bon moman. E i ariv a en moman natirelman aköz i

annan en eleksyon ki pe vini byento. Me i osi souliny sa ki nou tou nou fek dir, se ki en Konstitisyon i bezwen *enable* i bezwen ed sakenn son sitwayen pou trouv son plas. Olye fer li difisil pou en dimoun egzers son drwa i devret fer li fasil.

E sa ki nou pe fer la ozordi lo tou lede kote latap, se fasilite lazenes ou pran zot responsabilite e pou fer zot devwar. E donk, pou sa rezon se pa pou okenn lezot rezon sa lamannman apre midi i vin a en bon moman e i merit nou sipor.

Mr Speaker, mon pa anvi fer politik apre midi e mon pa pou, me mon bezwen adres en pwen, aköz i en pwen enportan, aköz kestyon in ganny demande e avek en sou *text* en pe negatif, aköz ki *automatic registration* ti ganny retire e la prezan i pe re antre?

Lo nou kote latap nou'n dir ki ti bezwen annan reform elektoral, e nou tou ki ti dan politik dan Lopozisyon sa letan an 2010 avek 2011, ler nou ti deside pa pran par dan en eleksyon konplet retourn se mon pou 5an olye partisip dan en sistenm ki ti anpant e ki kot zot gol ti anba e pou nou ti anler konsakre nou lekor pou anmenn re-form elektoral.

E reform elektoral i parey tou reform Lalwa zanmen i fini

li, la ozordi mon pe fer en lot pa. Me kisisa ki'n anmenn nou a sa moman, pran sa desizyon? E i ti en desizyon Mr Speaker, kouraze aköz nou i pe sorti lo lasemenn politik pou re antre pli tar avek bi ki antretan nou ti pou egaliz laplenn e ki tou dimoun enkli nou, nou ti pou annan menm dans dan en prosen eleksyon.

E i marse, aköz nou konn rezilta, ler nou'n re antre, nou'n re antre 15 lo 10 epi nou'n re antre avek en mazorite. Alor, reform elektoral i enportan Mr Speaker, e menm ler i vin a ou detriman. E mwan mon ava donn- mon ava dir zot ki nou, nou pa'n zis asize e koze. Depi Prezidan Ramkalawan ou menm, nou tou ki ti angaze nou ti fer nou par pou fer sa reform arrive.

E dan mon ka, mon ti menm ekrir en liv ki apel "*Democracy Delayed*" e ki ti etal tou bann problem ki nou ti annan e ti ganny servi par Komisyon Eleksyon, pou zot vwar ki bann pwen ki nou ti pe met devan ki ti merit ganny sanze. Me pa selman sa, nou ti osi al Ankour, mwan mon ti anmenn 2 *case* Ankour aköz lafason ki sistenm elektoral ki ti pe mars kont Lopoziyon.

E enn sa bann dimoun ki mon'n anmenn son *case*

Ankour i ozordi mon sekreter dan mon biro osi ki ti reste dan bann flat Brilliant e ki li i ti reste anba lo *ground floor* e en aktivis mon mazine i ti Lepep sa lepok or *SPPF I don't know*, i ti reste par lao li tou le de ti'n anrezistre ou vot Les Mamelles aköz bann flat Brilliant parey nou konnen ti konsevwar pou dan distrik Les Mamelles apre in tonm dan distrik Cascade.

Me avan eleksyon aktivis US in reste anrezistre Les Mamelles me aktivis SNP sa lepok mon sekreter ozordi, li san i konnen in ganny anvoy Glacis. Aköz? Zis pou li pa vot Les Mamelles, zis pou li pa vot Les Mamelles. Ou vwar se sa bann keksoz mon bann zanmi mon pa pe blanm okenn zot, zot pa- me mon pe blanm sa sistenm ki ti egziste a sa moman e ki'n anmenn nou fer sa bann reform elektoral.

E ki ozordi nou tou nou kapab fyer ki nou annan en Komisyon Elektoral endepandan, ki pa melanz li avek politik ; ki fer travay byen *comme il faut* e ki ozordi parey in ganny dir par zot lot kote latab, sa proze pe vin devan aköz in annan konsiltasyon e tou lede kote in tonm dakor se koumsa ki nou devret pe ale san ki nou bezwen pe al Ankour, san ki nou bezwen pe

ekrir en liv, sa ki nou bezwen *boycott* en eleksyon.

Alor Mr Speaker, mon'n pran laparol apre midi pou eksplik en pti pe konteks dan lekel nou pe antre dan sa prosesis reform, oubyen nou pe kontinyen sa prosesis reform ki pou kontinyen apre nou e i pou kontinyen ankor.

E dan sa ka se pou ankouraz e fer lavi fasil nou bann zwenn ki kekfw pa enterese avek politik. E pa zis isi Sesel, sa fenomenn i dan lemonn antye pou ankouraz zot fer zot devwar e ankouraz zot desann al vote.

Pa pou Wavel Ramkalawan ganny elekte oubyen pa pou Dr Patrick Herminie ganny elekte, sa i ava en konklizyon. Nou pa enterese ek konfizyon la, nou enterese avek prosesis ed sa bann zenn kapab egzers zot drwa e pran par dan zot fitir.

Alor Mr Speaker, mon vin prezan apre sa detrwa mo lentrodiksyon briyevman lo enn de komanter lo sa Lalwa li menm e ou ava permet mwan Mr Speaker, pou bann dimoun ki pe ekout nou deor e enn de bann nouvo Manm dan Lasanble Nasyonal, permet mwan fer zis 2 refleksyon legal.

Premye se kestyon in ganny demande aköz se pa

Komisyon Eleksyon ki'n anmenn sa Lalwa apre midi. Repons i kler, i dan nou Konstitisyon e i dan Lartik 94 nou Konstitisyon ki dir, ki i annan zis 3 kategori dimoun ki kapab anmenn en Lalwa devan Lasanble Nasyonal e sa se Vis-Prezidan ki pe fer li, en Minis ki nou vwar, oubyen en Manm Lasanble Nasyonal ki nou ti vwar 1 ou 2 semenn pase. Donk, sa i reponn sa kestyon.

Dezyenn keksoz ki mon ti a kontan fer sorti ozordi e avek ou permisyon e sa se pou edik bann nouvo Manm e zot ava vwar ki *the long title* avek sa *Bill* ozordi se “*an Act to amend the Constitution of the Republic of Seychelles*”.

I pa parey normalman ou ti a ekspekte “*an Act to ensure that persons reaching the age of 18 years in the year of an election are eligible to vote*”, i pa'n dir sa i dir “*an Act to amend the Constitution of the Republic of Seychelles*”.

E sa i enportan, aköz ankor enn fwa nou Konstitisyon Lartik 91(2) i dir ki ler i annan en Lalwa ki amann en Konstitisyon i bezwen spesifikman dir sa pour ki Vis-Prezidan, en Minis oubyen en Manm Lasanble pa kapab an misouk, an misouk anmenn en lamannman Konstitisyon san

dir ki i pe al amann sa Konstitisyon.

Alor premye keksoz ki ou war ler pou lir sa Lalwa se “*an Act to amend the Constitution*”. Alor, nou konnen ki ler nou pe fer sa, nou pe fer en travay pli enportan ki en travay zis pas en Lalwa avek mazorite. Annefe, nou pou bezwen taler pas sa Lalwa avek en mazorite 2 tyer, me mon krwar sa in garanti aköz i pou- dapre sa ki mon konpran i pou en Lalwa inanim.

E finalman Mr Speaker, mon vin lo son lamannman li menm pou mon zis fer 2 komanter. E i 2 komanter ki kekfwa nou pa'n realize me ki enportan pou soulinyen.

Premye komanter se ki ler nou regard *clause 4*, ek sa *proviso* aköz se sa *proviso* li menm li ki enportan, “*provided that where an election is to be held in a particular year, a citizen of Seychelles will attain the age of 18 years in that year*”.

Alor i pa zis bann dimoun ki annan 17an ki pou ganny 18an avan eleksyon ki pou kapab vin anrezistre, i tou dimoun ki annan 17an e i pou ganny 18an an 2025, so menm bann ki pou ganny 18 an, an Novanm an Oktob pou kapab vin anrezistre zot pa pou kapab vote aköz anba Lartik 114 zot napa drwa me aköz zot pa

ankor ganny 18an me sa i permet.

E mon krwar VP in donn en soupson aköz sa i leka, aköz nou pa pou kapab dir li avan eleksyon aköz si en eleksyon i al dan dezyenm *round* i pou bezwen *extend* pou kouver bann dimoun ki pou ganny 18an ant premye avek dezyenm *round*.

Donk, bann dimoun ki'n drafte sa Lalwa in drafte li avek lespri, avek lentelizans me kekfwa nou, nou pa vwar sa. So, *anybody* ki pou ganny 18an an 2025 i kapab desann e al anrezistre, me selman bann ki pou ganny 18an avan eleksyon ki pou ganny drwa vote.

E dernyen pwen, e sa se plito en kestyon me mon krwar sa kestyon i ganny reponn li menm li dan sa Konstitisyon. *What about* en dimoun ki pa'n anrezistre? I napa, i en dimoun 30an, 40an pa'n anrezistre aköz kekfwa i pa ti li isi, me ki retournen dan en peryod plis ki 3 mwan avan eleksyon, eski i kapab li osi servi lefet ki rezis in ouver en pe pli tar pou li osi kapab anrezistre.

E mon'n dir ki mon krwar ki sa i pa ganny kouver par sa lamannman, me i tre probab ki i kapab anba Lartik 113 aköz anba Lartik 113 i dir ou si ou'n anrezistre ou pa kapab vote,

alors si ou annan posibilite anrezistre natirelman ou pou kapab vote.

E mon'n fer sorti sa 2 pwen pa pou fer krwar mon pli malen ki tou dimoun, me pou ranforsi sa pwen ki mon ti pe dir, se ki en Lalwa ki permet dimoun vote i bezwen ganny enterprete dan en fason ki larz posib. Ou bezwen donn plis lespas olye restrikte lespas. E dan sa ka anba sa kriter, sa lamannman ki pe anmennen apre midi i reponn konpletman a sa legzisans.

E donk se pour sa rezon Mr Speaker, ki mon pou zwenn avek tou bann Manm Onorab apre midi pou felisit Komisyon Elektoral e Minis ki ansarz sa *Bill*, VP pou'n fer sa lamannman pou anmenn li devan nou apre midi, pou fer ki nou pe donn plis pouvwar a nou pep pou zot egzers enn zot drwa ki tre enportan sirtou dan sa lannen eleksyon. Mersi Mr Speaker.

MR SPEAKER

Mersi Onorab. Nou a kapab pran poz la, zis pou verifie non ki mon annan la, se Onorab Vidot, Onorab Loze e Onorab Woodcock, an ka zis pou verifie ki mon pa'n mank personn.

Ou pa in adrese ou? Onorab Gabriel ok. Ki ou pe dir

mon Onorab? Ou kapab pran mikro.

HON SYLVANNE LEMIEL

Mersi Mr Speaker. Mr Speaker, mon pe regarde lo kote *LOTO* etandonnen ki ler i ti vin kot ou i ti dir ou i *wish* pou koze i pou retournen, eski ler i a vini i a met son non *because he's on his way now*.

MR SPEAKER

Si deba pa ankor fini nou kapab pran li, si deba in fini nou pa pou kapab.

HON SYLVANNE LEMIEL

Ok. Mersi Mr Speaker.

MR SPEAKER

Mon azout Onorab Labonte e Onorab Loizeau. Mersi. Nou a pran poz nou a rebran 4er. Mersi.

(BREAK)

MR SPEAKER

Nou a rebran lo deba. Laparol pou Onorab Audrey Vidot.

HON AUDREY VIDOT

Mersi Mr Speaker. Bonn apre midi Vis-Prezidan ek ou *panel*, tou Manm Onorab, tou dimoun ki a lekout e en bonn apre midi spesyal ankor enn fwa pou zabitan Roche Caiman.

Mr Speaker, 12enm lamannman dan nou Konstitisyon i enn ki senp parey in ganny dir, me avek ou ko lenportans e ki i annan son merit mon met lo rikord ki dan mon 2 manda ki mon'n la koman Manm Lasanble letan i annan lamannman lo nou Konstitisyon kot i byen parey ozordi dan leka mon'n dir i annan son merit.

E kot i annan konsern mon'n fer ki mon devwar koman- kot neser pou vot kont, mon'n vot kont me pou ozordi sa enn lamannman ki devan nou Lasanble byensir mon pou aport mon sipor.

Pour ki rezon, se aköz i en lamannman ki parey mon'n dir i annan son lenportans, nou pe koz lo drwa nou bann zenn sitwayen ki pou permet zot kapab al anrezistre zot non pou zot kapab vote lo dat ki dan en lannen ki pou annan eleksyon.

E parey bann enterven an avan mwan in koze, lenportans aköz ki nou bann zenn i bezwen al egzers zot drwa vote menm si ozordi nou pe fer en lot pa, pou nou anrisir nou la demokrasi pou nou ranforsi nou travay pou asire ki nou annan en Konstitisyon ki dan lentere pep Seselwa pe enport ki fanmir oubyen ki kote dan kous pei Sesel ou ete me ou annan ou

drwa anba sa Konstitisyon e i annan son lenportans.

Nou bann zenn ozordi bokou fwa i pa zis Sesel, mon parkour koman en zenn parلمانter in permet mwan ganny sans enterakte avek bokou zenn pa zis Seselwa, me ou konn en pe zot lopinyon dan bann diferan pei lo laspe aköz ki zot retisan pou zot al anrezistre pou zour al vote aköz petet zot pa pe war sa lenportans.

E nou koman bann politisyen bann dirizan bann *leaders* i enportan aköz ki nou bezwen gid nou bann zenes lo lenportans al anrezistre zot non lo lalis voter pou permet zot kapab egzers zot drwa pou elekte en dirizan. Swa en dirizan pei oubyen en reprezantan dan zot distrik respektif pou zot kapab lack pouvwar e obzerve ki travay e byensir sa bann dimoun ki zot elekte i egzers zot drwa dan sa 5an.

E zot ava annan sa swa pou dir ki apre 5an si zot ti fer e bon swa oubyen si zot in fer en move swa, si zot anvi al revwar zot swa, oubyen si zot anvi kontinyelman vot pou zot kandida ki zot ti vote dan dernyen eleksyon.

E dan ka ozordi lamannman ki parey nou'n dir pe anmennen pe donn sans

bann ki pa ankor ganny 18an me dan sa lannen 2025 eleksyon in prononse pou le 27 Septanm, i ava zot swa zot pou zot kapab al vote, me ankor i egzize ki zot bezwen anrezistre zot non lo lalis voter.

Bokou zenn parfwa zot pa realiz lenportans letan ou pe montre ou lapartenans anver distrik kot ou reste, ou distrik elektoral i enportan letan ou al demann okenn servis pe enport ki Gouvernman ki egziste zot bezwen fer serten swivi e zot bann parkour, bann servis oubyen bann sipor ki zot pou bezwen rode atraver bann diferan lotorite.

E byensir i annan ki bezwen reflekte dan zot distrik pou refer zot *case* e i enportan ki zot apartenans avek en distrik. Alors, i enportan ki bann zenn i pa zis regard li lo laspe egzers zot drwa vote ler zot al anrezistre i enportan ki zot montre zot lapartenans anver zot distrik.

E nou koman bann dirizan nou la pou nou gid zot, nou la pou nou montre zot bann loportinite ki egziste e aköz i enportan ki menm si ou annan ou drwa ou annan serten responsabilite komanse zenn ou menm ki ou bezwen fer.

I annan bokou keksoz ki bann Manm in fer resorti, i

annan ki'n al en pri pe dan lepase, i annan ki pe koz ver serten refleksyon lo ozordi. Me lesansyel se ki koman bann Parlmanter, koman bann Manm Parlman i nou responsabilite pou nou vwar kot nou war i annan keksoz pou nou amelyore.

2 pwen for ki Vis-Prezidan in fer sorti dan son lentervansyon, se kot in dir ki pe koz- li menm li kon fer resorti kote dezyenm *round*, so i enportan ki Biro Elektoral i fer sir ki bann komunikasyon i ganny fer dan en fason zis e kler pour ki bann zenn oubyen bann paran ki pe ankouraz zot osi zot zanfand dan sa prosesis pou al anrezistre pou zot egzers zot drwa vote pou zot ganny byen lenformasyon ki kredib.

Pour ki zot kapab anrezistre boner dan bann moman ki petet letan lalis pou, la si i ou frenmen parey in ganny demande apre le 11 e kan i pou ganny reouver ankor pou permet sa bann ki byen sir letan Lalwa i ganny *ascent* ki i permet zot bann zenn ki pe al ganny 18an dan en lannen pou eleksyon zot kapab egzers zot drwa vote.

E i enportan osi, mon'n dir pli biner kot letan nou koman bann politisyen nou pe ankouraz bann zenn pou al

vote. I enportan ki bann zenn byensir sa enn eleksyon nou, nou konn byen poudir en eleksyon ki la i pou enn ki byen sir ankor i pou annan bokou diferans konpare avek dernyen eleksyon.

Nou pou annan plizyer parti politik ki'n montre lentere pou zot partisip dan sa enn eleksyon, pou annan diferan kandida ki'n montre zot lentere pou zot debout. E mon asire mwan koman en zenn pa zis lo laspe koman en politisyen ki sorti dan parti *United Seychelles*.

Me zeneralman mon konnen i annan en kantite zenn la deor, en kantite Seselwa la deor zot swa ki zot pou fer zot pa pou zis baz li lo laspe partizan.

Me mon krwar dan sa 5an Seselwa in obzerv en kantite e zot lo vreman vwar lekel bann ki'n akote zot lekel bann ki'n donn zot sipor, dan zot moman difisil, lekel ki la dan zot kote letan zot dan bann moman kot byen sir zot pa'n kapab gard serten sa bann traka pou zot tousel zot i partaz avek serten zot bann dirizan e byensir zot ava fer zot swa pou sa eleksyon ki pe vini.

E byensir parey mon abitye dir avek mon bann zenn dan mon distrik Roche Caiman,

Roche Caiman 2 manda ki mon'n servi koman en zenn mon'n la akote zot e mon'n toultan la pe enport si i annan ki ti fer serten promes ek zot ki apre pa'n zanmen war zot ankor, i annan ankor ki pe vini ou vin fer parey ankor ek zot, e zot konnen poudir Audrey Vidot in sa enn ki'n toultan la ek zot, enn zot menm ki'n grandi dan zot kominote ansanm ek zot ki konn zot tre byen e ki pa pou zanmen, zanmen, zanmen perdi sa koneksyon avek zot i ankor la.

Mr Speaker, nou san dout parey mon'n dir mon pou aport mon soutyen pou sa enn lamannman ki'n annan ki pe ganny anmennen ozordi dan nou Konstitisyon.

Parey mon'n dir kot i byen nou siporte, menm si i annan keksoz ki nou vwar parfwa i vin devan atraver Egzekitiv ki pa neserman anliny avek nou Konstitisyon zis parey nou pe vwar la kot bann kandida ki sorti travay dan Gouvernman pe ganny serten presyon, legzizans lo zot ki zot legzizans lo zot ki pou mwan mon krwar sa i kont prensip lespri nou Konstitisyon.

Zot bezwen libreman kapab debout e byensir annan serten prose parey ti egzize avan ki permet zot kapab si zot

sans pou zot debout i la, zot ganny sans elekte zot ava debout sinon zot pa perdi donn loportinite pou zot kontinyen travay e kontribye anver zot pei.

Mr Speaker, lo sa not, mwan mon pou ankouraz tou bann zenn ki pe swiv nou deba, bann paran osi pou fer sir ki zot swiv byen sa prose, eleksyon pa reste bokou letan. I zot drwa e responsabilite pou zot egzers zot drwa vote, fer sir ki nou bann zenn zot tou otan posib anrezistre e pli tar ou ava annan sa swa, si ou anvi desann.

E nou, nou pou ankouraz zot ki i enportan pou ou form par dan la demokrasi ou pei, i enportan ki sa enn eleksyon ou al egzers ou drwa vote pou ou elekte en dirizan. Byensir nou ou nou lo kote *United Seychelles* san dout sel opsyon se Patrick Herminie byensir nou bann kandida *United Seychelles*. Mersi Mr Speaker.

MR SPEAKER

Mersi Onorab. Onorab Woodcock.

HON WAVEL WOODCOCK

Mersi Mr Speaker. Mr Speaker, drwa vote i enn nou drwa pli fondamantal dan en pei demokratik. E se Lepep ki pou swazir lekel ki pou reprezant

zot, personn dezormen pa pou ganny forse lo zot parey in arive dan lepase, dan nou pei Sesel.

San la demokrasi Mr Speaker napa stabilite, san la demokrasi napa lazistis, san la demokrasi napa lape dan en pei, pou annan vyolasyon Drwa Imen, pou annan lenzistis, e san la demokrasi Mr Speaker, pou annan persekisyon.

Mr Speaker, atraver ou pli boner ler Onorab Aglae ti pe fer son entervansyon, i annan en keksoz ki in dir, in dir ki nou kote latah nou'n anmenn sa pti lager pou la demokrasi Mr Speaker. Mr Speaker, mon krwar sa i en lensilt pou tou ban ki'n lite pou la demokrasi retourn dan nou pei Sesel, bann parey ou menm.

E zisteman Mr Speaker, lalit pou lademokrasi in kout lavi plizyer nou bann frer ek ser Sesel. E zisteman le 29 Zen wikenn pase, nou'n vwar inogirasyon 2 moniman vremen, vremen enportan ki montre lanpler lalit ki bokou Seselwa in anmennen.

Nou'n war inogirasyon moniman Union Vale kot bokou nou bann frer, plis ki 200 nou bann frer ti ganny kondannen san zize Mr Speaker, ti ganny deteni Mr Speaker, e malerezman ti napa okenn

reprezantan US ki ti la pou inogirasyon sa 2 moniman.

E nou'n osi war inogirasyon en lot moniman enportan kot *Peace Park*, kot bokou nou bann frer ek ser Mr Speaker, ti ganny touye Mr Speaker, pou ler zot ti pe anmenn sa lalit pou liber nou pei pou anmenn la demokrasi Sesel e zot in pas- e bokou nou bann frer in pas dan bokou soufrans Mr Speaker, dan zot lalit pou anmenn la demokrasi dan nou pei.

Sa lamannman Mr Speaker, pe koriz en lenzistis kot bokou nou bann zenn Mr Speaker, ti ganny *disenfranchise* dan lepase kot zot pa'n kapab vote menm si zot ti ganny 18an, 18an avan dat eleksyon e sa in leka pou bokou e pou bokou, bokou eleksyon e *currently* Mr Speaker, anba annou Konstitisyon parey i ete fodre ou an 18an pou ou kapab anrezistre pou vote.

E se pou sa rezon Mr Speaker ki ozordi *Electoral Commission* apre bokou konsiltasyon avek tou bann parti politik, tou bann parti prenan ou pe vwar en lamannman ki'n arive devan nou Lasanble kot prezan dezormen Mr Speaker, sa zenn Mr Speaker pou kapab *register* si i pou ganny 18an zour

eleksyon, avan ki *voters register* i fermen, sa petet *Electoral Commission* a kapab dir nou taler kan ki *voters*- si *voters register* pou fermen e kan ki i pou fermen Mr Speaker.

Mr Speaker, i enportan pou nou konn listwar reform elektoral Sesel. E bokou bann entervenan sirtou nou kote latatab ki'n pran laparol avan mwan parey Onorab Naidu, Onorab LGB e Onorab Arissol zot in koz en pe lo sa lalit, lo sa lager pou anmenn reform elektoral dan nou pei Sesel.

E si i annan en dimoun Mr Speaker, ki'n lager pou reform elektoral se pa lot ki Prezidan Wavel Ramkalawan. Lopozisyon Mr Speaker, parey bann entervenan avan mwan in dir lo nou kote latatab ti *boycott* eleksyon an 2011 sa sete *SNP* ansanm avek *NDP* sa letan *New Democratic Party*, zot ti Mr Speaker, *boycott* eleksyon an 2011, aköz Mr Speaker? Aköz sa letan anba ladministrasyon *SPPF*, *PL*, *US* zot ti pe refize enplimant reform elektoral Mr Speaker.

Me ler ou get ozordi Mr Speaker, ki nou war, nou war *Electoral Commissioner-Electoral Commission* Mr Speaker, zot pe konsilte avek tou parti politik, enkli *US*. E zot in anmenn Mr Speaker, zot

lamannman kot Gouvernman kot *Cabinet* e ozordi sanmenm sa rezon ki ou war *VP* koman Minis i devan Lasanble koz e Minis Mr Speaker, ki anmenn Lalwa devan nou Lasanble pou laprouvasyon.

Fodre pa oubliye Mr Speaker, dan lepase ki *Electoral Commission* pa ti endepandan. Annou pa bliy bann ka Mr Speaker, lenstans kot Lopozisyon ti bezwen Mr Speaker, anmenn ka devan Lakour pou nou kapab ganny en kopi en *digital copy* en *soft copy voters register*. Bann lenzistis ki ti egziste dan lepase ki ozordi in ganny dil avek Mr Speaker.

Ti napa limit lo *campaign funding* Mr Speaker, kot nou konnen ki kantite larzan de milyon e de milyon ki *SPPF*, *US*, Parti Lepep in depanse dan lepase lo bann eleksyon. Nou ti war *misuse of State resources* kot *apparatus* Leta ti ganny servi, kot biro Lazans Proteksyon Sosyal, laliny depi Ocean Gate House ziska kot lorloz Mr Speaker, zis pou ganny bann lavantaz politik.

State media SBC ti ganny servi Mr Speaker, e ozordi konpare avek lontan tou parti politik ki annan akse avek *SBC* pou fer zot bann program

politik san okenn persekisyon, san okenn lafreder Mr Speaker.

Nou nepli war kot *SPTC*, bis *SPTC* pe ganny servi zour eleksyon pou savoy dimoun pou al vote, i nepli annan sa bann labi bann *State apparatus*. Pa ti en *level playing field* Mr Speaker, e aköz bann lager pou reform elektoral ozordi nou vwar ki mannyer nou pei in transformen e la demokrasi in vibran dan nou pei. Nou pa pe war dimoun mor pe vot ankor Mr Speaker, parey in leka dan lepase.

Ti annan bokou parti ki ilegal, aste *ID*, kot bann sef dan bann biro Gouvernman ti *threaten* zot bann travayer fer zot per Mr Speaker, tousala in egziste dan larme, nou, nou vwar sa dan bann, dan lekol Mr Speaker, e tou sa bann keksoz ozordi i bann keksoz ki nou'n dil avek atraver bann reform elektoral nou nepli pe vwar sa bann keksoz dan nou pei.

Sa i gras a lalit ki bokou nou bann frer ek ser in anmennen, pou anmenn la vre demokrasi dan nou pei Sesel ozordi.

MR SPEAKER

Ou pa ankor ariv lo lamannman.

HON WAVEL WOODCOCK

Nou Gouvernman Mr Speaker, i krwar dan la demokrasi e *LDS* nou krwar dan la demokrasi, nou krwar dan e Komisyon Elektoral ki endepandan ki leka ozordi Mr Speaker, nou krwar dan *rule of law*.

E nou pa krwar Mr Speaker, parey *US* pe sey fer krwar mon pa krwar dan vol eleksyon nou'n prouve dan 2 eleksyon Mr Speaker, san ki nou bezwen aste eleksyon nou'n *win* 2 eleksyon 2016, nou'n *win* an 2020 e ankor an 2025 Mr Speaker, sa lannen le 27 Septanm nou pe al *win* en lot eleksyon ankor en gran mazorite Mr Speaker.

Alor Mr Speaker, mon pou profit sa lokazyon pou mwan ankouraz tou bann zenn, sirtou bann zenn dan distrik Grand Anse Praslin ki pou ganny 18an avan le 27 Septanm e bann ki pa ankor anrezistre pou al devan, al anrezistre, i zot drwa pou zot vote e se zot ki pou deside ki direksyon ki nou pei pou ale.

Mr Speaker, avek sa 2 mo, mon pou siport sa lamannman ki devan nou aköz mon sa ki mon krwar e sa ki lamazorite nou Seselwa i krwar Mr Speaker, nou pa pou retourn an aryer, *no turning back* nou pou kit li lanmenm e nou dir *LDS* Sesel. Mersi bokou Mr Speaker.

MR SPEAKER

Mersi Onorab. Onorab Loze.

HON JOHAN LOZE

Mersi Mr Speaker. Mr Speaker, annou komans avek sa ki pli enportan. E sa ki pli enportan devan nou ozordi se nou bann zenn ki nou pe fer zot loner avek en lamannman konstitisyonnèl dedye zis pou zot.

E nou fer zot a sa loner aköz i montre ou lenportans lafors lazenes dan nou pei. Be wi, Mr Speaker, pli boner mon ti demande lekel ki'n anmenn lamannman konstitisyonnèl siu Komisyon Eleksyon endepandan swa si Gouvernman. Wi, mon'n poz sa keksyon aköz i enportan rekonnèt ki Komisyon Eleksyon in fer sa travay konzwentman avek tou parti politik.

Me tou parti politik ki ti egziste a lepok ki zot in fer konsiltasyon aköz byensir i annan bann nouvo ki pe antre i annan bann kandida endepandan ki pe vini e zot, zot ava sot lo *bandwagon*, zot a *join the process* o firamezir ki i deroule. Demen menm mon krwar i pou annan ankor konsiltasyon, Komisyon Eleksyon mon krwar i ava konfirm avek nou.

So, in annan en travay ki Komisyon Eleksyon in fer e en travay enportan e signifikan, me sa prezan i port e lev en kestyon. Si in annan tou sa lenvestisman, si in annan tou sa travay, e si nou annan tou sa bann travay mazer, konsekan e enportan devan nou ozordi, akoz ki Komisyon Eleksyon in vin devan Lasanble Nasyonal eleksyon mwen senk avek *Bill* ki gouvern eleksyon?

Koman reprezantan en parti politik, en keksoz ki mon konnen se ki konsiltasyon, diskisyon, deba ti'n terminen depi lannen pase, *by* Novanm, Desanm ti'n fini diskite sa bann keksoz. Kwa ki'n aport sa retar? Akoz ki la o dernyen moman eleksyon mwen senk ki *Bill* i travers devan nou?

Eski i lafot Komisyon Eleksyon? Eski i lafot Gouvernman? Kote retar in ganny mete? Mon poz sa kestyon Mr Speaker, pa akoz mon anvi met personn montre ledwa lo personn, be Onorab Georges in fer serten refleksyon letan i ti pe fer son *speech* boner, in koz lo lafason ki *Bill* i ganny anmennen dan Lasanble.

Be mon krwar i annan bann pli gran refleksyon ki nou bezwen fer lo nou demokrasi *going forward*. En lenstitisyon

sitan enportan parey Komisyon Eleksyon, eski nou pa bezwen annan en lamannman konstitisyonnel ki vini evantyelman ki permet zot anmenn zot prop *Bill* devan Lasanble Nasyonal?

Ki permet zot *shepherd* zot lezislasyon depi komansman ziska finisyon zot menm, dan plas al kot Gouvernman e vin devan Lasanble par en zofisye Gouvernman. E konpran mon byen silvouple, mon pa pe koz pou Gouvernman *LDS* ouswa pou Vis-Prezidan la, mon pe koz en *way forward* - en *roadmap* ki a vin pou tou Gouvernman e lefitir ki vini, en nouvo fason fer.

Akoz nou pe koz nou demokrasi e lavansman nou demokrasi. Prezan mon oule kontinyen lo sa term ki Madanm Lemiel in komanse konsernan nou bann zenn ki bezwen al anrezistre zot pou vote. Akoz ki en zenn i bezwen la anrezistre li pou vote? Akoz ki son partisipasyon i konte e i enportan? I senp. Nou bezwen ou pou protez e prezerv la demokrasi.

Onorab Woodcock letan in koze van mwan in dir ou li akoz ou bezwen protez e prezerv la demokrasi, in dir ou, malgre in dir ou petet dan en fason negativ ki'n vin avek lakizasyon

lo lepase ki i toultan fer, aköz in pri dan 43an pase.

Be letan nou pe koz- (Mr Speaker ou tande ou bann Manm?)- Mr Speaker, letan nou pe koz avek nou zenn, sa ki enportan se ki nou donn zot en direksyon e en vizyon pou le fitir. Nou pa kapab enspir nou zenn avek 43an pase, ouswa fer li per en loulou ki'n fini ganny 43an, sa nou pe zis fer zenn per nanm ki nepli egziste ozordi.

Be alors, akfer eski nou bezwen ou pou protez la demokrasi? Sa form demokrasi ki nou Sesel nou'n agree ansanm pou nou annan, nou tou ansanm, pa zis *LDS* nou tou ansanm nou'n agree, parske *LDS* ki ti *SNP* an 93 ti en parti minoriter li- pa konnen si i ti parti Seselwa, in fatigue sanz son non li.

I ti en parti minoriter, i ti vini pou vin fer bann prezantasyon mon rapel Minis Ferrari, Onorab Ferrari sa lepok pe kriye dan, devan Komisyon Konstitisyon "*we want it all, we want it now, we want it today*". Zot ti fer zot partisipasyon be nou'n agree ansanm ti vote par plis ki 60poursan pou nou annan sa konstitisyon, be si nou'n agree savedir nou demokrasi ki nou'n swazir i esansyel.

Pa pour ouswa kont parti Lepep, *United Seychelles*, *SPPF* parey zot dir be i pa ni pour e kont parti Seselwa, *SNP*, mon pa konnen ki mannyer zot apele ozordi. Koman en zenn -(Mr Speaker, ou tande la?)- menm parol ki ou Sekreter Zeneral ti dir mwan lotrozour *on mic*. *I bring it to you* lakizasyon ki zot fer kont mwan, lensilt ki zot fer kont mwan *off- mic*.

MR SPEAKER

Onorab, adres ou, ou...

HON JOHAN LOZE

Mr Speaker, mon pe adres ou ki i annan en lensilt in ganny fer kont mwan.

MR SPEAKER

Fer en konplent silvouple apre.

HON JOHAN LOZE

Mon'n fer, lala mon'n fer. Aköz i *ongoing* sa.

MR SPEAKER

Retourn lo ou diskour *please*.

HON JOHAN LOZE

Mr Speaker, koman en zenn ou bezwen realize ki la demokrasi i *empower* sitwayen. I *empower* ou koman en zenn, i *empower* ou paran ki travay e lager ou pou ou, e i protez ou bann drwa koman en sitwayen.

I annan en keksoz pli enportan ki la demokrasi par model ki nou, nou'n swazir pou fer pou annan Sesel, i promot rezolisyon konfli dan en fason sivilize trankil e pezib.

Lot keksoz ki sa demokrasi i fer nou kado, i anmenn avek li en klima rann kont, en klima rann kont kot ler nou annan en proze semen nou bezwen rann kont reponn kestyon lo ki mannyer pe ganny peye, konbyen in koute, ler Minister Finans in dir nou koumsa poudir i ou anmenn resi i pou donn Lasanble Nasyonal bann resi lo konbyen sa proze pe koute apre i pa donner, rann kont Mr Speaker.

To be accountable, accountability.

MR SPEAKER

Onorab Woodcock, mon tann ou tro bokou e osi Onorab Porice. Mon pa konnen ki zot pe sey prouve, annou reste trankil silvouple nou a les deba prosede. Mersi.

HON JOHAN LOZE

Mr Speaker, i asire la demokrasi par model ki nou, nou'n swazir ozordi, pa tou model demokratik sa be par model ki nou Sesel nou'n swazir.

E ou ava rapel Mr Speaker, Onorab Georges in toulta dir nou poudir nou annan enn bann meyer Konstitisyon ki li in deza vwar dan lemonn, i asire ki nou annan en sosyete ki pli zis e ekitab posib kot i kapab annan en lapartaz si pa egal me ekitab nou resours.

Me pwen ki nou oule fer ek bann zenn la demokrasi i prioritiz lavwa lepep. Ou demokrasi la, i donn ou en fondasyon soutenab pou devlopman Drwa Imen pou devlopman imen pou grandi, dekouver e devlop ou lekor. E ou annan ou *empowerment* atraver ou partisipasyon, se ou partisipasyon ki konte koman en zenn, ou vin devan ou partisipe e ou vote.

Se la kot ou kont plis dan sa pti 18an ki ou'n gannyen la. Demokrasi ki nou annan sa demokrasi popiler la, i baze lo en prensip la souvrennte popiler e sa i senpleman ki la gouvrenans ou Gouvernman i ganny son pouvwar atraver Lepep. Se Lepep ki donn la direksyon, la gouvrenans Gouvernman son pouvwar pou fer sa bann desizyon ki i fer.

Be koz ou koman en zenn ou devret konsernen? Demokrasi i permet ou enpakte e desid bann Polisi ki pe vini, i

permet ou avek ou vot gide si ou pou annan ou en Gouvernman ki pandan 43an in *fund* letid *overseas* dan kof Gouvernman, ouswa si ou pou annan ou en Gouvernman ki vini i dir ou mon a *fund* en pe larestan pran *loan*. Pran ou *loan* pey ou letid lo ou menm sa bann Polisi ki ou bezwen deside si ou pou annan ouswa non.

E ou desizyon ki ou fer dan bwat vote i enpakte sa bann Polisi zisteman. Ou konnen Mr Speaker, lemonn an deor Sesel li i pe dousman, dousman anmenn ansanm sa ki zot pe apel en *AI economy*, lekonomi lentelizans.

Be, la i en moman kot ou balans larzan avek ledikasyon aköz ou bezwen maksimonm ou pep posibil sirtou zenn posibil, sirtou ou zenn edike pou zot fer fas avek sa lemonn ki pe vini. Ou solisyon se plis letid, plis ledikasyon.

Pa al pran *loan* la, aköz nou pou *fail* fas avek sa *monde*, be se sa bann keksoz koumsa ki ou vot i permet ou fer, ou vot i permet ou desid lo sa Polisi lo si ou ganny en *scholarship* demen ouswa si ou al pran en *loan* pou ganny en *scholarship*.

Ou vot i permet ou deside ant en Gouvernman ki pou pran ka avek en fanmir ki travay, e la mon re mete travay-

repete travay e ki bezwen led e lasistans atraver sosyal avek avek en lot ki li sak fwa ou nonm li sosyal i dir ou zot pe donn bal Mr Speaker.

Sak fwa ou nonm zot pran ka avek son pep sa dimoun ki'n vote pou met nou asiz dan sa bann sez i dir ou donn bal, la larzan in anta in gannnen pou donn bal. Selman letan zot pe demann pli gro *jeep* pou mars ladan i pa apel donn bal.

So, nou bezwen, nou bezwen nou zenn, vin devan, partisipe, vote, protez e *secure* la demokrasi ki nou, nou'n agree lo la koman en pep. E sa demokrasi ki nou'n agree lo la, sa Konstitisyon ki nou pe amande ozordi ki nou pe koz lo la, i annan en ta keksoz ladan sa Mr Speaker, en kantite keksoz i annan ladan.

Parey *PNQ* devan Lasanble Nasyonal, i enn li, selman nou, nou angaz nou dan sa ki nou anvi, e nou blok sa ki nou pa anvi. I annan keksoz ki dan Konstitisyon ki nou pa kontan ki nou bloke nou anpes pase be lezot keksoz ki nou kontan nou les roule. E se sa lafason ki nou bann zenn pou bezwen vin deside ki pou annan e ki pou napa dan sa pei.

Mr Speaker, en pei i bezwen li en devlopman son demokrasi ki soutenab, i

bezwen en pep ki aktiv e angaze, i bezwen en lazenes ki aktiv e angaze avek son vwa demokratik.

Mwan personnelman i mon santiman ki sa *Bill* ki devan nou lamannman konstitisyon telkel mon pa vwar okenn problem avek parey i ete. Be la ankor, i pou ganny manifeste atraver Lalwa, sa i a von en lot deba, me selman travay ki devan nou ozordi i lamannman konstitisyon.

E sa mon pa war okenn gran devan pou nou fer avek parske pou permet bann zenn ki pe ganny 18an dan lannen ki ana eleksyon pou vote partisip dan eleksyon mwan mon krwar en keksoz ki nob, in en travay ki'n ganny fer ki'n ganny agree par Komisyon Eleksyon e bann parti politik.

E mon remersi e felisit tou bann parti politik ki'n partisip dan sa travay e mon remersi e felisit Komisyon Eleksyon ki'n angaz zot dan sa proses depi in komanse ziske in abouti ariv devan nou la ozordi.

Be mon keston i reste Mr Speaker, ant lannen pase kot sa morso travay ti'n fini agree, ti'n tonm dakor, ti'n fini pare ek ozordi ki'n ariv devan nou eleksyon mwen senk kot ti'n pri, dan ki kolin ti'n pri, ki nenk

prezan la ozordi ki nou war li travers devan nou.

Mr Speaker, fodre pa nou per nou zenn vote, parske sa mazorite zenn ki ou annan Sesel ozordi pe vin vote pou elekte Patrick Herminie aköz i sel opsyon pou Sesel. Mersi Mr Speaker.

MR SPEAKER

Mersi Onorab. Onorab Labonte.

HON ANDY LABONTE

Mersi Mr Speaker. Mr Speaker, pou mwan mon santi mon i en privez pou mon fer mon lentervansyon lo sa lamannman ki nou pe diskite ozordi.

E rezon i senp, ou konnen sa Onorab ki'n koze avan mwan in fer bokou referans, *in regards to* nou lazenes me selman in mal eksplik nou zenn, me petet la mon ti a kontan dir avek nou zenn se Gouvernman *LDS* ki ti pran desizyon ler nou ti reouver nou *Airport* e nou ti anvoy nou plis ki en *cohort* manrmay al etidye aletranze kan ler zot, zot pa ti'n kapab fer li.

Savedir lazenes Seselwa i bezwen war poudir se *LDS* nou ladministrasyon se nou ki annan zot aker e lentere. E sa lenzistis ki ti annan avan kot nou zenn ki ti ganny 18an pa ti pe kapab vote e sa ti pandan zot

letan e nou, nou pe koriz sa ozordi. E i annan plis, plizyer lenzistis ki'n kontinyen arive Mr Speaker, dan sa pei.

So, i enportan osi pou nou fer nou zenn konpran poudir nou listwar i esansyel, i esansyel pou zot konnen aköz en peryod letan nou ti annan nou en Gouvernman, en parti politik ki ti o pouvwar kot parey Onorab Woodcock i fek fer resorti nou bann dimoun ti ganny tortiye, e i annan plizyer nou bann zenn ki zot pa ni'n kapab konnen kote zot papa oubyen zot manman in mor.

E sa 2 moniman ki nou fek inogire le 29 Zen i laprev pou montre e ti vreman fer lapenn Mr Speaker, ler sa imsyè ti fer son lentervansyon Mr Fostel kot i ti fer konpran poudir menm zot ti ganny manze ki sanpye ti ladan, moutouk, ou konnen so, i enportan pou ler nou pe koze nou konnen ki nou koze.

So, annou pa zis fer krwar nou bann zenn poudir Gouvernman avan ti annan zot aker oubyen en lentere, non.

Alors, sa lamannman ki nou, nou pe anmennen la ki pe anmenn la Mr Speaker, mon ou sipòte, mon ou sipòte aköz mon anvi ki nou zenn i pran kont poudir ler zot al vote parey tou bann Onorab ki'n koze avan, mwan in fer resorti serten

keksoz se ki i enportan, i enportan zot vot e ler zot al vote i enportan pou zot kit Wavel John Charles Ramkalawan *State House*, aköz sa travay ki i pe fer i pe fer li dan lentere pei e konpare avek avan kot ti annan "ek nou, pa ek nou" menm i annan plizyer zenn i ler zot ti pe rod en travay Mr Speaker, zot pa ti gannyen senpleman aköz, aköz zot afilyasyon politik.

E nou, nou pe fer li tou lekontrer, aköz i enportan ki lazenes si war poudir bann lamannman ki nou kontinyen anmenn nou pe anmenn li senpleman, aköz nou war zot valer e nou fer sir ki nou pran zot kont, nou pran zot kont aköz i vreman enportan.

E non pa petet ki finalman zot pou ganny war anba en pon aköz senpleman aköz? Aköz zot pa sipòte sa se zot kandida prezidansyel Dr Patrick Herminie ki ti dir be ki mannyer nou pou kapab fer kandida en zonm koumsa? Nou pa pou kapab Mr Speaker e mon Larivyer Anglez mon pou dirizan, e mon pou dir for tou zabitan Larivyer Anglez nou konn li sa zonm, e nou pa ou kapab fer li konfyans, *ok*.

So, nou pou fer konfyans Wavel John Charles Ramkalawan, e mwan Andy,

Michel Labonte mon pou retourn ankor dan Lasanble avek en pli gran, gran mazorite vot e mon pou montre zot poudir mon travay ki mon pe fer, zabitan e lazenes i deryer mon e i apresye ki mon pe fer e nou pou kontinyen fer li.

Mr Speaker, so, avek sa 2 mo mon pou dir se ki nou zenn i bezwen pran kont ki sa Gouvernman ki la, i en Gouvernman ki met zot de lavan, i en Gouvernman ki pran kont ki ekout zot e nou siport zot, e nou anvi ki zot partisipe dan sa legzersis, si ou'n ganny 18 an i ou drwa e i ou responsabilite alor i enportan ki zot vote.

E mwan mon enn ki pe anmenn en bon pe anrezistre mon pou dir, e mon pou dir zot mon pou kontinyen anmenn. E ler mon anmenn mon pa ni donn R500 parey parti US i fer ler i anmenn bann zenn anrezistre, senpleman mon pe donn zot sa sipor, mon pe ed zot pou zot fer sir ki zot partisip dan sa eleksyon ki pe arive.

Alor Mr Speaker, avek sa 2 mo mon pou dir mon pou siport sa lamannman e mon pou dir nou pou kit li lanmenm, LDS Sesel e *no turning back*. Mersi Mr Speaker.

MR SPEAKER

Mersi Onorab. Onorab Gabriel.

HON CONRAD GABRIEL

Mersi Mr Speaker. Mon dir bonn apre midi tou dimoun a lekout, bonn apre midi *panel*. Mr Speaker, sa *Bill* pe fer referans ek bann dimoun espesyalman bann zenn ki'n ganny 18an e ki pou ganny 18an *up to* dat ki eleksyon in fikse pou al anrezistre.

Nou pou realize ki sa enn eleksyon i vreman enportan pou tou Seselwa, i enportan dan le sans ki nou pou finalman desid vre direksyon nou pei e i bezwen merit- nou pei i bezwen e ki nou merit pran.

Ma profit lokazyon pou ankouraz tou dimoun espesyalman bann zenn Pointe Larue ki annan laz vote pou fer li o pli vit posib al anrezistre. Akoz sa eleksyon pou desid lavenir nou bann zannfan, nou bezwen koriz sa lerer ki'n ganny komet 2020.

Nou pou dir lerer akoz senpleman Seselwa pa'n ganny sa ki zot ti pe rode e sa ki zot ti anvi, nou'n pli mizer ki mizer Mr Speaker. Mr Speaker, normalman rezis voter to fermen 3 mwan avan eleksyon e ti napa ankor nouvo non lo lalis be la i ouver, *that's a plus* e profite bann zenn pou fer zot lavwa tande,

Alors, i enportan pou nou partisip libreman e fer sa vre sanzman ki Sesel i merite, byento, nou pou fer sorti nou *manifesto* kot zot pou ganny en pli bon apersi ki vreman *United Seychelles* i annan pou ofer tou Seselwa.

Nou pou montre ki ou fer pou apel Sesel pou tou son zanfan, *LDS* in kit bokou Seselwa ater atraver sa sistenm “ek nou, pa ek nou”. Mr Speaker, mon pe met bokou lanfaz ek bann zenn pou fer li zot devwar pou al anrezistre e donn en koudmen *United Seychelles* pou fer Sesel fyer ankor.

Zot vot pou donn mwan sans kontinyen sa travay ki mon'n komanse depi byen lontan menm avan 2020 dan distrik. Pointe Larue i pou remet *US* e napa personn pou vin fer nou per.

Mr Speaker, finalman mon a enplor bann paran pou senpleman silvouple ankouraz zot bann zanfan pou al anrezistre pou en meyer Sesel kot nou a reganny sa zwa de viv ki ti egziste.

An pasan mon'n tann en Onorab dir byen for ki li i pe vin fer listwar, in ganny St Louis 2 fwa, in ganny Bel Ombre e la prezan i pe vin pran Au Cap. Tasyon Onorab, koz pe gard pe,

akoz sa pti madanm malgre i mens, mens pa pou file ! Mersi.

(APPLAUSE)

MR SPEAKER

Mon kapab enplor bann Manm ki reste pou koze pou retourn lo size amannman silvouple, mon santi poudir pli ale nou pe al dan bann *speech* kanpanny e fotespere nou kapab fer en pe pli byen. Onorab Loizeau ou annan laparol.

HON NORBERT LOIZEAU

Mersi Mr Speaker. Bonzour tou dimoun a lekout. Bonzour *panel* devan. Mr Speaker ozordi pour mwan, ki en dimoun ki ti antre dan politik tre zenn. Pour mwan i enportan mon krwar pour mwan dir de parol lo sa lamannman ki devan nou.

Ler mon pe get an zeneral pei, mon vwar ki nou bann – nou pe evolve, nou pe evolve koman en pei. Sirtou ler i konsern *electoral reform*. Mr Speaker, mon rapel a en tre zenn az an 2007.

Ler mon ti premye antre dan Lasanble Mr Speaker, I pa ti fasil. Parey ou konnen laplenn pa ti nivo, e nou koman en *Caucus* sa letan ti annan 11 nou anba direksyon Prezidan Ramkalawan, nou ti ensiste - sa mon rapel ti dan bann lannen

2008-2009 an montan ki si lo azanda Lasanble, sa letan ki ti dirize par *Leader* zot parti Patrick Herminie, si napa okenn travay ki annan pour fer avek *electoral reform*, nou, nou pa pour partisipe.

Mr Speaker nou ti ganny pouse, nou ti *walk out*, nou ti retournen e nou ti *stick* lo nou desizyon, pour ki *electoral reform* i vin premye lo azanda.

E en keksoz ki nou, nou ti trouve Mr Speaker, ki fodre pa ki zis en dimoun tousel ki ansarz eleksyon dan pei. E sa letan ti Mr Gappy, zot ti rapel zot tou sa bann letan ki nou ti fer bann lamars kont Mr Gappy.

Nou ti dir, "*Gappy Out* " akoz Mr Speaker, nou, nou ti demande ki olye annan zis en dimoun ki pe ansarz eleksyon.

Kot i ava annan en *Electoral Commission* kot i ava annan plizyer *commissioner*, ki ava kapab fer en travay enn pti pe pli, pli serye e pli byen.

E ozordi Mr Speaker, sa in arive, akoz travay ki nou koman en Lopozisyon nou'n fer. E ozordi nou vwar ki nou annan en *Electoral Commission* ki endepandan. Malgre i ganny *funded* par Gouvernman, me selman zot endepandan lo lafason ki zot fer e mon anvi felisit nou bann profesyonnel

ozordi ki pe travay kot *Electoral Commission*.

Malgre ki zot pe ganny, zot pe ganny tou sord kalite parol konmkwa zot letid serten ti ganny finanse, gara zot ozordi. Akoz zot pe war petet ki sa bann dimoun, i tro fay pour zot. E mwan mon anvi dir zot, ki nou dan *LDS*, nou pa pour fer sa ek zot nou.

Nou pour les zot fer zot travay endepandaman. Pour ki nou bann Lalwa Eleksyon i reste byen e i reste azour avek lafason ki pei pe ale.

Me ozordi Mr Speaker sa lamannman in montre nou en pa, en pa dan en nouvo direksyon Mr Speaker.

Kot menm si en zenn i ganny son laz zour eleksyon, i pour kapab anrezistre e vote. Kot ti napa sa avan Mr Speaker. Parey Onorab Arissol ti dir, rezis ti fermen. Ti ouver tou le 3 mwan, 3 mwan avan eleksyon e ozordi rezis i ouver tou dilon lannen.

Mr Speaker, ek sa ki pe arive la i en keksoz ki anliny avek nou Konstitisyon. Akoz dan nou Konstitisyon, mon annan en Konstitisyon an Kreol Lartik 21(1), i dir nou, "A mwen ki sa Konstitisyon i endik otreman sak sitwayen Sesel ki'n atann laz 18an, i annan drwa al pran par dan bann zafer politik

direkteman ouswa par en reprezantan ki in swazir libreman.

Ganny anrezistre koman en voter, pour vot par *ballot* sekre dan bann eleksyon politik anba sifraz iniversel e egal” Mr Speaker, i kontinyen. E la mon anvi dir avek tou bann zenn Mr Speaker, ki vote i zot drwa e zot devwar.

E pour zot fer sa Mr Speaker, i enportan, mon'n tann en ta koze, selman mon bezwen pas en pe dan bann largiman ki'n ganny fer. Mwan mon dir ek bann zenn pa bliy zot listwar. Nou listwar pour ed zot kapab fer en meyer swa dan sa eleksyon ki pe vini. E la mon mazin parol enn mon zanmi James Elizabeth ki ti fer en diskour son temwannayaz, kot i ti dir, ‘bann ki vye edik nou bann zenn lo ki'n arive avek nou pei pandan plizyer lannen’.

La mon anvi dir ek bann zenn, parey serten nou in dir la ozordi, al vizit *Peace Park* avek Union Vale. Zot ava trouve Mr Speaker, ki kantite zenn, sa letan ki ti ganny arase zot drwa vote zis aköz zot lopinyon politik.

Zot ava trouve Mr Speaker, ki lamazorite sa bann dimoun ler nou pe koz lo zenn, ki zot non in ganny grave lo sa

bann plak. Zot ti bann zenn laz 22an, 23an.

E menm ti annan en fiy, enn mon zanmi Ghislaine Lau-Tee, laz 17 i ti ganny anmase met dan prizon aköz son lopinyon politik.

I enportan Mr Speaker, ki bann zenn i konpran listwar sa i normal sa. Parey sa msye ti dir eski ozordi nou pour efas zistwar dan Labib, kot *Pontius Pilate* ler Zezi ti ganny demande par pour krisifye.

Eski nou pour efas sa? Non. Dan Labib sa i ete, nou pa pour kapab efase aköz sa i nou listwar. E mon'n tande dir ler nou pe koz lo la, i annan in koz lo 43an, mwan mon pe koz lo sa bann keksoz ki'n arive ki annan lo *Peace Park*.

I annan in dir ki nou pe koz lo en vye loulou 43an. Mr Speaker, wi, i en vye loulou 43an. Be mwan ler mon tann *LOTO* dir li zot pa ti la, 43an zot pa konnen ki'n arive, me selman Mr Speaker zot Kandida Prezidansyel Mr Patrick Herminie li i pe glorifye 43an. Mon pa ganny en konpran ek sa de zans. Enn in dir zot pa ti la, enn pe glorifye.

Parey Mr Fostel ti dir Mr Speaker, dan en *speech* byen *powerful*, ki zot pe fit en vye sab rouye. Mr Patrick Herminie li i pe fit en vye sab rouye. Me

selman *LOTO*, *LOTO* li i pe dir zot pa ti la.

An terminan Mr Speaker, mon konnen ou pe dir mwan sorti lo sa bann zafer. Solman i enportan ki nou pas lo la. Mon anvi dir avek tou zenn, al anrezistre. Akoz sa pei Mr Speaker, i parey, i apel pour zot.

Nou, nou pe vye. Mwan ler mon ti antre dan politik mon ti annan 36an. Ozordi mon pe vye Mr Speaker, mon'n fini antre dan mon 50.

Nou bezwen annan larelev. Mon'n fini sot 50. Nou bezwen annan larelev, pour ki nou pei. Si zot pa anrezistre pour vote, lekel ki pour anmenn nou pei pli devan?

E mwan mon pa pe dir zot anrezistre pour vin vot pour *LDS*, or *US*. Mr Speaker, mon dir zot anrezistre akoz i zot drwa dan Konstitisyon. I zot drwa.

E ler nou, Mr Speaker, ler nou'n dan politik, dan Lopoziyon, tou sa bann keksoz ki nou'n fer la. Reform, bann reform zot, zot pa ti le. Zot pa ti pe fer li - Toultan mon dir sa, zis pour nou sa letan ki ti dan Lopoziyon. Nou ti pe fer li pour ki tou lezot dimoun ki pour dan Lopoziyon a lavenir. Ozordi i annan plizyer parti.

Ou pa konnen lekel ki pour dan Lopoziyon. Akoz nou,

nou pour reste dan Gouvernman ziska 2035, e pli lwen ki sa. Pour zot kapab ganny en sans zot osi, kot ki ava annan en eleksyon ki lib e zis e ki pa pour fer faver okenn parti. Mersi Mr Speaker.

MR SPEAKER

Mersi Onorab. Onorab Pillay, mon a donn ou laparol. E mon a donn ou 15 minit maksimonm.

HON SEBASTIEN PILLAY

Mersi Mr Speaker. Bonn apre midi Mr Speaker. Bonn apre midi tou koleg Onorab. E tou dimoun ki pe swiv deba dan Lasanble. Mr Speaker, sa lamannman ki nou pe fer i enn ki ekstrememan enportan.

E mon'n ganny sans an retournan osi ekout bann diferan lentervansyon osi, bann lentervansyon ki'n ganny fer la, la resaman la.

Premyerman Mr Speaker, si ou a permet mwan, mon pour zis pran de minit mon letan pour adres serten size. Ou konnen nou'n ariv en staz Sesel, kot tou dimoun ki pe debout koman en kandida prezidansyel. i annan drwa debout koman en kandida prezidansyel. E *let the best man win*. Nou pe, nou pe atak bann dimoun ki napa okenn pozisyon

delivery dan Gouvernman. Par egzantp nou atak Dokter Patrick Herminie akòz i Dirizan US.

E mon bezwen dir atraver ou Mr Speaker, avek Onorab Labonte, ki Onorab Labonte pa pour kapab atak Dokter Herminie akòz sa ki li in fer dan son lofis, i en keksoz ki degelas Mr Speaker. E pa devret arive.

E anba en Gouvernman ki serye, en zofisye piblik ki fer sa kalite aksyon i devret ganny, i devret ganny *deal* avek. Li i pa ganny *deal* avek e sa i en problem.

Dezyenmman Mr Speaker, permet mwan pour dir avek Onorab Loizeau se Lartik 24 ki i pe fer referans avek. Apre 3 manda dan Lasanble, i pa konn diferans ant Lartik 21 e Lartik 24.

Konmsi pour mwan i montre ou poudir, ou konnen nou bezwen vin la anndan serye, pour nou koz lo en deba. E sa ki nou pe war ozordi Mr Speaker, ler nou pe koz lo en Komisyon endepandan, mon pa pe dout lendepandans Komisyon. Be mon pe doute lekel ki. Eski Komisyon i santi li pe *practice* son lendepandans oubyen eski i annan lezot akter ki deside pran sa lendepandans ek li?

Par egzantp Mr Speaker, nou'n fer en legzersis lo delimitasyon *boundary*. Nou kote latap, nou'n fer tou pour nou ganny *include* dan sa proses. I annan larzan ki'n ganny mete, oli legzersis?

Nanryen pa ankor zanmen ariv devan Lasanble, nanryen ni en rapor pa'n ganny fer. Nanryen pa'n montre nou ki'n arive. Me selman nou ti ganny kritike par Vis-Prezidan sa letan ki ti anmenn bann ki ti pe fer reponn bann kestyon lo sa size, ki sa i normal i bezwen ganny fer. E Onorab Georges ti koz lo ki mannyer sa bann proses i bezwen ganny fer e Onorab Georges ti koz lo ki mannyer sa bann proses i bezwen ganny fer, san ki ozordi ou pa tann okenn keksoz ki Onorab Georges pe dir, pou li dir ou koumsa poudir parey i ti pe dir taler poudir i normal pour VP vin reprezant Komisyon Eleksyon. Ki'n arive avek legzersis limitasyon *boundary*? Piblik pa ankor tann nanryen lo la.

Dezyenmman Mr Speaker, nou tann en Prezidan ki sorti e dir ek nou koumsa poudir. Be nou pe al komans *practice* e vwar en evalyasyon pour bann voter aletranze vote. I pa Komisyon Eleksyon ki ti dir. Se Prezidan.

So mon napa dout lo abilite bann profesyonnel ki travay Komisyon Eleksyon. Me eski Prezidan Larepiblik oubyen *Cabinet* i le pran lendepandans Komisyon ler i *suit* zot? E zot ki deside ki pour fer serten keksoz?

E apre si konsekaman Komisyon in vin devan, e *denounce* sa ki pe ganny dir. So nou bezwen regard larealite an fas ki dan nou pei.

Larealite i se ki nou annan nou en Gouvernman ki pe dir nou poudir i pe deplor 43an pase me i pe fer egzakteman parey keksoz ti ganny fer dan sa 43an. Egzakteman, otokratik le desid tou keksoz e ou le kontrol tou keksoz. Se sa ki e arive Mr Speaker. E la mon pour donn ou en legzanp Mr Speaker, kot en keksoz en mansonz pe ganny akonte devan Lasanble.

An 2010 alors *LDS* ti refize partisip dan eleksyon - *SNP* sa letan ti refize partisip dan eleksyon. Akoz ek son Lasanble, akoz ti napa lamannman dan Lalwa Eleksyon.

Pa korek Mr Speaker, pour bann zenn ki pe ekout nou la deor, se akoz zot ti ganny en bate bef, dan Eleksyon Prezidansyel.

Akoz? Akoz zot popilarite koman *SNP* ti'n desann. E sa ti ganny prouve an 2015, kot zot ti ganny mwens vot ankor dan Eleksyon 2015. Mwens vot ankor.

Sel keksoz ki'n ed zot antre *State House*, se Patrick Pillay. E ankor enn fwa se en Patrick ek en Pillay ki pour tir zot *State House* Mr Speaker!

Ou konnen nou'n ariv en staz dan sa pei kot nou le re-entrant listwar. Par egzanp Mr Speaker, par egzanp. Nou pe koz lo bann *fallen heroes*. Oule dir mwan ou bliye met non en *fallen hero* apre ki ou'n fer tou sa preparasyon lo en plak ki ou pe fer?

Ki pli – konmsi ki pli – ki keksoz ki mank plis respe ki ou pe sey fer. Zis akoz ou ti le ganny en *limelight*, ou le servi sa koman en propagann politik Mr Speaker. Se sa ki pe arive.

E la ozordi kot nou ete, *SNP* la i dan menm pozisyon ki ti ete 2010. In vin menm kalite parti ki ti ete an 2010. Zot in ganny pouvwar, zot in sou ek pouvwar, zot pe *enjoy* zot lekor. E finalman la zot komans realize poudir zot bezwen piblik.

Ziska la ou pe tande prezan ki zot komans atak kanmarad, ki mannyer zot pe dir en bann ti tay ek gran kouto laba sepa ki bor. Akoz sa fiy al

debout Au Cap, akòz i ti dir koumsa poudir i pa kapab, i pa kapab swiv zot *party line*.

Ozordi zot vir lo zot prop kanmarad, ki'n ede met zot la. E la mon adres zot avek tou sa bann dimoun ki siport zot. Konbyen fwa ou pe ganny trete ou pe ganny bloke? Akòz? Akòz sa bann dimoun ki ou'n met zot la.

E dernyen pwen lo sa size, mon dir de minit Mr Speaker. La lo La Digue ki zot pe fer Mr Speaker?

Lo La Digue zot vire zot vin promet dimoun tou keksoz. Mon a donn ou *license pickup*. Mon a donn ou, ou *license* bisiklet. Vot pour nou selman. Be ou kapab ganny en Prezidan ki abiz resours Leta koumsa Mr Speaker.

Zot ariv en staz, kot zot nepli annan okenn keksoz pour zot dir. Okenn keksoz pour zot fer. E se zis sey bat latet dimoun. Abiz lo resours Leta.

Lontan ti mal pour Prezidan, bann Prezidan ki ti dan US, SPPF. Pran bann transpor *State House* al vizit distrik. Ozordi i byen pour Mr Ramkalawan e bann Vis-Prezidan e lezot fer parey.

Nou menm annan nou la ozordi en sityasyon Mr Speaker, kot nou annan en sirkiler e nou pe koz Konstitisyon. Nou annan

nou en sirkiler ki dir avek en travayer servis piblik, *resign* dan ou pozisyon, si ou pe al pran par dan politik zour nominasyon. Enteresan. LDS i fer son Konvansyon le 10, sirkiler pa sorti le 10 li. US pe fer Konvansyon le 21, Sirkiler i sorti le 20.

Mr Speaker, konmsi eski sa i pa montre poudir ou annan en Gouvernman ki'n fel ki napa en sou, en sou nosyon ki pe arive ?

E sa ki enteresan Mr Speaker. Nou pe koz Konstitisyon, *empowerment*. Tou dimoun i annan proteksyon legal anba Lalwa. Anba sa Sirkiler, Prezidan ki *the highest public servant*, Vis-Prezidan ki *the highest public servant*, bann Minis ki pe *campaign* dan politik tou sa bann dimoun pour gard zot pozisyon, pandan letan ki zot pe fer kanpanny. Akòz zot in fini ganny nominen koman zot, koman bann dimoun pe fer.

MNAs pour *still* gard zot saler. Be ou sa travayer servis piblik ki deside al debout dan eleksyon ou bezwen rann ou saler e *re-apply* pour ou louvraz e ou pa garanti ou pour regannyen. Se sa ki sa sirkiler i dir ou. *Theres no guaranteed* ou pe ganny ou louvraz. Sa i apel labi Konstitisyon Mr Speaker.

Prezan zot in dir '*no turning back*' e zot in *turn back* lo sa Sirkiler. Sa i en *turn back* ki zot in fer. E la ankor lo sa Lalwa Eleksyon, i en *turn back*.

Mon a eksplike aköz Mr Speaker. Nou, nou ti napa sa problem avek zenn anrezistre nou. Aköz? Ti annan en prosedir ki otomatikman koman en zenn i ganny 18an, i ti antre lo lalis voter. I ti antre lo lalis voter.

Ou bann zenn ki pe ekout mwan la deor, ou konn en rezon aköz ou pe ale vini esper vizit esper laba? Se aköz LDS ek SNP. Se zot ki ti fer e lager anmenn en lager asarnen. Finalman Gouvernman dizour ti bezwen *give in* e donn zot sa ki zot ti oule.

Retir lanrezistremman otomatik, en zenn ler i ganny 18an. E la nou pe koz *enfranchisement*, be annou al pli lwen Mr Speaker annou prouve ki mannyer nou pe go back, nou pe *turn back the clock*.

Mon annan devan mwan la Mr Speaker, Lalwa Eleksyon. Lamannman ki ti ganny fer an 2014, baze lo lefe ki LDS pa ti pran par dan eleksyon.

Ki ti dir, non-bann dimoun ki pour *otherwise* kalifye pour vin *registered*, pour anrezistre as en voter, ki pour

ganny 18an. Okenn zour apre *fifteen months next following 1st January*.

Savedir i ti pe dir ou sa bann zenn ki pour ganny 18an dan sa lannen eleksyon, pour anrezistre. Sa ti ganny tire lo zot demann, devan Komisyon Eleksyon sa letan. Lala mon annan sa lamannman devan mwan la.

Fast forward. 2025 zot pe koz *no turning back*. Zot *turn back* e la entrodwir en provizyon, mwan mon dakor avek, i fer sans aköz pour sa bann zenn ganny *empowered* pour vote. Pour fer sa bann zenn vote.

So kestyon fondamantal nou bezwen demann nou lekor. Lo ki premiz nou pe baz largiman ki nou pe fer ozordi? Lartik 24 Konstitisyon i dir tou dimoun i annan drwa vote. I byen. Lartik 113 i prekoniz serten keksoz, Lartik 114 i prekoniz serten keksoz. I byen. Sa ki nou pe fer se zis empower dimoun pour vote. Se zis *empower* dimoun pour vote *enfranchise* zot pour vote.

Annou al - *let's go all the way*. *Let's go all the way*. Zot le sey anmenn rezis voter deor aletranze pour fer dimoun vote. Be aköz pa *go all the way*.

Zis dir poudir okenn zenn ki pe *reside* Sesel, zour i ganny

18an antre lo lalis voter. Sa manrmay pa ni bezwen ale fer vizit ale vini, ale fer isi laba. Parey ti ete oparavan. Sel keksoz bezwen al fer. Al konfirm son non lo son lalis voter.

Ou konnen akòz Mr Speaker problem ki'n arive. Se akòz zot la, zot in toultan *cry wolf*, toultan konplent, toultan dir isi, toultan dir laba. Finalman zot realize poudir se zot ki'n fer en dezord total dan striktir demokratik sa pei. Total.

Ozordi ou annan en sityasyon kot ou annan ou en Lasanble Nasyonal, ki ou pa kapab demann kestyon Komisyon Eleksyon. Me selman Komisyon Eleksyon i kapab vin devan Lasanble, e en VP ki pour eksplik son Lalwa.

E pour reponn kestyon taler dan *Committee Stage*, si i annan lo lamannman Lalwa. Mon pa ganny en konpran, kwa egzakteman ki nou le sey fer. Konmsi nou, nou pa ganny en konpran poudir sa moman kot nou get keksoz lo baz 43an e lo baz ozordi, in fini.

In fini Mr Speaker. Mr Speaker si nou le koz lo 43an, i annan dimoun ki'n lo tou le de parti la. In la pandan sa 43an. Zot in la. I annan dimoun in milisya, in vey lakaz dimoun, in al ekout lakaz dimoun, i tir fizi

lo tron koko. Napa ki zot pa'n fer.

So Mr Speaker in ariv en moman kot nou, kot nou, nou bouz devan. E toultan nou servi non serten fanmir pour nou met devan e fer krwar poudir nou pe zwe dan sa boubou.

Ki dernyen fwa Onorab Loizeau in koz ek lafanmir Lau-Tee? Ki dernyen fwa in koz ek lafanmir Hoareau? Ki dernyen fwa in koz ek lafanmir Betsy? Lafanmir Monnaie?

Konnen zis zot vini zot nonm non sa bann dimoun, *as if* zot le servi - zot servi souvan sa bann dimoun. Nou nou'n dir - nou nou'n dir e nou dir kler ankor.

'Nou pour onor bann Rekomandasyon *TRNUC*'. Senp! Zot fer parey! Zot fer parey! Fer parey Mr Speaker. Dir zot fer parey!

Zot anmenn Mosyon dan Lasanble, zot in fer zot ta tralilala - napa ki zot pa'n fer, napa ki zot pa'n dir. Be akòz zot pa kapab onor sa bann Rekomandasyon?

Prezan Mr Speaker sa ki enteresan. Aparaman moniman i ganny *design* par dimoun ki'n ganny *identified* koman *perpetrator*. Konmsi i, i, i koresponn sa? I *click* sa? Labous - lespri pe *text* labous ler pe koze Mr Speaker?

Mr Speaker, mwan kot mon debout mon ti form par dan sa bann diskisyon. E mon konpran klerman ki Komisyon Eleksyon i le fer.

Sa provizyon konstitisyonnel i bezwen ganny amande pour permet Komisyon Eleksyon zisteman kapab anmenn sa bout prosedir.

Enn, ki ki'n sa *online registration*. E mon *hope* platform in fini pare, nou a ganny dir taler si platform in fini pare.

Ede pour nou *enfranchise* bann zenn ozordi ki mark parey, dapre lenformasyon ki Komisyon Eleksyon ti *provide* avek nou dernyen fwa. Nou pa ankor ni menm ariv 70poursan, zenn ki kapab vote ki'n anrezistre. Ki ti ava meyer pour nou annan. Akoz se pei demen pour dan zot lanmen e enportan ki zot komans partisip dan aktivite politik oubyen gouvrenans zot pei.

E i ava zot swa pour vot ki swa pour *LDS*, ki swa pour *US*. Me selman mon krwar gran mazorite zot pour vot pour *US* safwasi Mr Speaker.

So se sa ki nou annan devan nou, nou annan nou en premiz enportan. E ozordi apremidi Lasanble pour pas sa Lalwa la linanimite, Linanimite.

Me selman i annan pese ki zot, san ki nou, nou bezwen fer polemik e ou pa'n anpes zot fer. San ki nou, nou bezwen anpes zot fer pour fer okenn polemik lo – mon'n ekout nou bann Manm pa'n fer sa polemik.

Ki zot bezwen al dan sa bann kalite politik, zis pour zot kapab skor pwen lo 43an. Be la mon annan en mesaz pour sa zenn la deor. Eski ou, ou pour ou se 43an ki pli enportan?

Oubyen se eski ganny en louvraz, kapab komans kontribye pour ou lakaz, aret ganny dir poudir ou bezwen leksperyans pour antre dan en louvraz. Eski se sa ki pli enportan pour ou? Me si sa ki pli enportan pour ou, arete ekout sa bann dimoun ki laba.

Mr Speaker, i kler poudir ozordi, si i annan en parti ki napa okenn, okenn abilite pour ofer zenn Seselwa okenn keksoz ki nouvo, se sa parti ki o pouvwar, se *LDS*.

Zot in fatigue avek pouvwar, apre menm 5an. Akoz? Akoz zot in *indulge* ladan. Zot pe ganny maloker ek pouvwar akoz i pe donn zot en dizesyon.

Zot pa kapab anmenn in donn zot pour anmenn, zot pa'n kapab anmenn. Prezan in ariv ler pour zot sed laplas.

Aret konplent, aret dispit. Aksepte larealite. Seselwa an gran mazorite i nepli anvi zot la. E bokou zot in sitan dekonekte avek zot bann dimoun ki aprezan ki zot pe vin devan nou Mr Speaker.

An konklizyon Mr Speaker, mon ti a kontan demann Komisyon Eleksyon fer en pledwari avek zot. *Ok* nou pe amann sa Lalwa, aköz i annan, nou'n ariv avek en nesesite ozordi. Prenon kont en legzizans ki pe arive anba Lalwa.

E prosedir ki eleksyon pe *provide* pour nou ozordi. Me aköz en travay pli larz pa ganny fer, pour nou vwar ki mannyer nou kapab fer *enfranchisement* Seselwa ki kapab vote pli larz.

Permet tou zenn Seselwa, ki ganny 18an vote dan eleksyon. Sa ki nou bezwen *go for*. Si nou pe dir ozordi, zot pa le vin devan pour zot anrezistre. Si nou pe dir ozordi nou pe ganny difikilte, fer zot anrezistre, tou le de parti pe sey fer sa bann zenn anrezistre. Mon dir pe seye. Aköz nou tou nou pe lager pour fer sir ki zot anrezistre aköz zot partisipasyon i enportan. So pa in ler pour nou *move the next step*.

So Mr Speaker, nou pe pran en *step in the right direction*. Mon ti la dan sa *meeting*, mon asize mon'n ekout bann diskisyon. Mon'n ekout bann – madanm Amesbury dernyen fwa ler in koze.

In koz lo kan lalis pour fermen, in koz lo bann provizyon lamannman ki bezwen ganny fer. E mon konpran kote in *link* sa avek lanrezistremman bann zenn ki pour ganny 18an.

Nou'n annan deba lo sa *addendum list*. Sa i a ede pour nou klersi sa bann keksoz. Lafason ki keksoz pe ganny fer, *hopefully* prezan dan sa *meeting* ki nou pour gannnen demen, ki mon'n ganny en *email* pour annan sa *meeting* demen. E ki mon parti in enformen lekel nou bann reprezantan, nou a kapab ganny en diskisyon pli larz lo ki mannyer bann provizyon Lalwa, pour *enable* sa sityasyon, sa ki nou pe met dan Konstitisyon arive. Sa ki nou bezwen gannnen. En leksplikasyon kler ki korek. Mon remerisi ou Mr Speaker, pour ou latansyon. Sa ki mwan mon annan poudir Mr Speaker i toultan reste parey.

US i reste sel opsyon pour Sesel Mr Speaker. Mersi.

MR SPEAKER

Ou point of order Onorab. Wi.

HON BERNARD GEORGES

Mersi Mr Speaker. Mr Speaker, mon pe *raise en point of order* anba *Order* 59(7). Ki dir ki, en Manm pa pour *improper motive* oubyen fer sarz personnel kont en lot Manm a mwens ki anmenn en Mosyon.

Onorab Pillay in fer en alegasyon kont enn mon Manm. Onorab Labonte. Onorab Labonte, i pa'n anmenn en Mosyon.

Mosyon ti ganny anmennen par Onorab Loze in fel. E i pa *proper* pour li anmenn, pour li fer sarz kont enn mon Manm san fonnman e kont *Order* 59(7). Mersi.

MR SPEAKER

Mersi. Bon,

(comments off-mic)

MR SPEAKER

Order! Non, non, non! Nou pa kapab antre dan en deba, nou pa kapab antre dan en deba. Mon krwar dan bann deba, Manm pa devret pran loportinite zis pour zot fer lakizasyon kont en lot Manm.

I pa byen e mon ti a voudre ki zot ti a evite. Mersi. Onorab Gervais Henrie ou annan laparol. 15minit.

HON GERVAIS HENRIE

Mersi Mr Speaker. Bonn apre midi tou dimoun. Sirtou bann zabitan distrik Mont Buxton e mon ava *welcome panel* dan Lasanble Nasyonal.

Mon rekonnet poudir ozordi zot la avek Vis-Prezidan, akòz dapre nou *Standing Orders* dan seksyon Lezislasyon, dan 15yenm parti anba *Order* 66, i dir poudir, "*The Vice-President or any Minister or subject to Order 67 any Member may at any time give notice of intention to present a Bill*".

Savedir nou *Standing Orders* ozordi pa fer provizyon ki koman en antite, menm endepandan zot pa anmenn zot *Bill*. Zot bezwen anmenn avek en Minis.

Me depi senkyenm Lasanble – sa Lasanble la setyenm, nou'n pran en pratik ki annan bann antite ki vin defann zot Bidze zot menm. San prezans en Minis, e *SBC* i en legzanp.

E sa i montre ki mannier sa kote latap pe moderniz nou demokrasi e mwan mon aplodi sa bann demars.

Mr Speaker, koman en tre zenn Seselwa. Mon ti fyer pour partisip mon premye vot ki mon vote dan Sesel, mon ti vot lo

proze *referendum* pour sa Konstitisyon.

E mon ti vot non. Mon ti parmi bann dimoun ki ti vot non. Konstitisyon premye, son premye *referendum*, nou a rapel pa ti pase. Mon ti parmi sa bann Seselwa ki ti vot non e mon ti vot Anse Etoile mon rapel.

Mon ti travay *SBC* solman, ti annan bann laranzman ki ti fer, mon ti kapab vot laba, menm si pa ti pa mon distrik elektoral.

E apre en serten letan koman en zenn dimoun, mon ti war sa zafer *referendum* proze Konstitisyon sitan *boring*. Pe ale vini, pa zanmen fini, ler dezyenm vot i vini koman en zenn dimoun e bokou zenn sa letan, Nou dir ou konnen kwa, nou'n fatigue avek sa. Zot le zot Konstitisyon donn zot. Mon ti vot wi. E sanmenm sa Konstitisyon. Se pourtan mwan koman en zenn ki ti'n etidye listwar, mon fasinen avek *parliamentary form of democracy* olye en sistenm prezidansyel.

E ziska ozordi mon ankor krwar koman enn pti pei parey Sesel, nou ti devret annan en sistenm parlmanter olye en sistenm prezidansyel. Me mon pe eksplik sa aköz pour mwan

kapab koz ek bann zenn laba deor. Mon konpran zot retisans vizavi politik parfwa.

Akoz i vin en size konpleks pour zot. Me nou a bezwen retourn lo la enn pti pe pli tar si nou bezwen.

Lamannman ki devan nou ozordi Mr Speaker, i en lide modern. I en keksoz ki gou, ki byen ki nou merit pe selebre e ki mon swete bann zenn, sirtou bann dan distrik Mont Buxton, i sezi e aplodi sa ki nou pe fer.

Dan son gro konponan pli enportan, se ki normalman letan en eleksyon i anonse, rezis voter i fermen. E normalman i apepre 3 mwan avan sa date eleksyon.

E nou konnen poudir sa i pour sanze, Komisyon Eleksyon a en moman ava dir nou, si pour reste 3 mwan, si pour al en pe pli pre avek sa dat ki nou konnen la i le 27 Septanm son *main polling day*. Me sa i deba pour en lot moman.

Me sa ki mon pe dir ek bann zenn la, se ki normalman letan en eleksyon i anonse Sesel dapre nou Lalwa, rezis voter i frenmen.

Alor si eleksyon ti pour fer le 27 Septanm, annou kont 3 mwan, an aryer, ou sa zenn ki ti pour ganny 18an, enn fwa ki sa lalis i fermen, menm si prezan ou ganny ou laz apre ki

sa dat in frenmen, e le 27 Septanm ou annan 18an, ou pa ti pour kapab vote.

E sa i en drwa ki sosyete Seselwa ti pe pran avek ou. Me nou ozordi, ki nou pe fer la nou pe dir non. Ki pour arive? Nou pour fer en leksepsyon bann zenn ki pour ganny 18an ant sa dat ki sa rezis i fermen avek zour eleksyon, zot pour kapab vote a kondisyon, ki zot al anrezistre e zot pas dan tou prosedir. Komisyon Eleksyon ava fer verifikasyon.

E zot non ava aparet lo lalis avek en mark ki bann kandida ava konnen poudir an – sa entel li, sa dat letan lalis pou'n sorti sertifye. I pour ganny 18an tel dat.

Alor mon'n sey asize pour rode lekel pei ankor dan lemonn ki fer sa? Mon pa pe dir pour met mon likou lo biyo, la poudir napa e nou premye.

Me mon pa'n kapab war. E zis dan larezyon mon pa neseserman krwar, mon'n sey koz avek mon bann koleg politisyen ki mon'n zwenn o kour mon parkour aletranze, me zot pa'n kapab dir mwan, dan zot pei i annan sa. Donk i ankor en lot *first* pour Sesel.

E nou merit aplodir sa. Wi, in vin atraver konsiltasyon avek bann parti politik. Me lefe i reste ki Ladministrasyon ki o

pouvwar, ti'n kapab refize sa lide.

Me zot aksepte, nou parti pour siporte an gran mazorite. E nou merit aplodi sa. E lazenes Seselwa, ozordi ou ki mon'n zwenn dan distrik, dan distrik Mont Buxton e en pe partou ki'n dir mwan zot pa konnen si zot pour anrezistre, zot pa enterese, pour anrezistre, mon pe dir avek ou ozordi poudir, mwan ler mon'n zwenn ou, zanmen mon'n fors ou anrezistre. Mon'n toultan dir ou vote i ou drwa e ou devwar.

Mon pa'n zanmen dir ou, ou bezwen al anrezistre pour ou vot pour mwan. Zanmen. Sa ki kapab dir poudir Gervais Henrie in dir ek li sa. Sot devan la e dir mwan. Montre mwan son figir. Mon'n dir ou poudir, al anrezistre e ou swa i pour ou.

Ekout bann kanpanny fer ou swa. Napa opsyon en sel opsyon pour Sesel ki personn i kapab enpoz lo nou. Sa zenn ou deside lekel parti ki ou anvi vote.

Ekout bann kanpanny, swazir parti ki ou anvi vote. Swazir. E nou pa pour fors ou. Nou pa pour ankoler avek ou. Nou pa pour pini ou. Solman nou koman bann politisyen ki bokou nou i menm annan zanfan ki pli vye ki ou ki pe ekoute, ki pour al vote premye

fwa, nou kontinyen, nou fer bann keksoz pour amelyor ou lavi. Nou a kontinyen ogmant *allowance* post segonder. Si ou antre premye lannen ou pe ganny R950.

E apre en ta letan ki ti napa revizyon sa Ladministrasyon in ogmant sa. Nou pe donn ou, nou mentenir ledikasyon gratwit ziska nivo liniversite. Me solman ou bezwen annan en kondisyon pour al liniversite, ou bezwen ganny ou 18pwen.

E nou dir ou si ou fer pares, ou pa kapab selman ganny sa 18 pwen ou paran i kapab *afford then* zot pran en *educational loan*. Ki annan mal avek sa? Ki annan mal avek sa?

Nou pe *still* donn ou en dezyenm opsyon. Ou ki'n donn poum ou pa'n travay pour ganny ou 18 pwen, be selman ou paran i *afford*, ouswa ou anvi pran ou *loan*. Letan ou pour retournen sa ki ou pou peye.

Ki i annan mal avek sa? Bann malen la anndan dir mwan ki annan mal avek sa? Ouswa ou pe zis bat latet lazenes. Pour sey fer krwar nou bann move dimoun, ki'n enpoz en *educational loan* lo zot.

Nou'n entrodwir *ICT Scholarship*, nou'n met Lekol A *Level* lo Praslin. Nou'n refer

NIHSS, nou'n retir *security clearance* pour onor nou moto eleksyon, “Sesel pour tou son zanfan”. Mr Speaker, pour donn bann zenn ki pou ganny 18an apre ki dat eleksyon in frenmen, i en lot keksoz ki nou pe donn lazenes. E alor ki annan mal avek sa?

Mr Speaker, vote i drwa e devwar en sitwayen. E nou, nou pa krwar dan sa zafer met non otomatik lo lalis voter.

Akoz ozordi menm, ler nou pe dir zot, zot ki be – i ou responsabilite pour ou al anrezistre. E i annan parti politik, ki pe desann pe fors bann zenn al anrezistre.

E bann zenn ler i ariv laba i dir mon pa ti anvi vin la mwan, sa madanm ki sal makro lo lans ki'n anmenn mwan la. Mon ti anvi vin la mwan.

(laughter)

HON GERVAIS HENRIE

Ou konpran ? So nou pe dir zot poudir ou sa zenn pran ou responsabilite desann. E nou demann zot pour fer en keksoz tou le 5an pour zot pei, se pour partisip dan sa prosesis eleksyon.

Zenn ozordi, ou ki pe ekout mwan, be pa ou servi ou telefonn ou tou le semenn ou *text Paradise FM* ou swazir

sanson Julia, 'Set Serman' sepa mwan lekel ankor pour li ariv nimero 1 ?

Be si ou fer sa ou vote, ou pe vote ou, pour ou santer prefere ariv premye dan *chart*. E tou le semenn ou depans enn pti larzan aköz sa *text* ki ou anvoye la, i en *SMS* ki ou pey *Cable* ou pey *Airtel*.

Be vote i free e nou demann ou pour fer li en fwa tou le 5an. Kote ki mal avek sa ? E si ou, ou swazir, konm dir Obama in deza dir avek bann zenn, i dir, 'lazenés ou swazir ou lenz, ou swazir ou swa lanmizik, be aköz ou refize al vote pour les en bann dimoun ki mwen konnen ki ou swazir direksyon ki ou pei i le al ladan ?'.

Ler ou pa vote, ou pe enterfer avek direksyon ou lavenir, swa ou desann ou pa al anrezistre, pour ou kapab swazir kalite karyer ou pour annan, ki mannyer ou sityasyon *socioeconomic* pour vini, e lanvironnman ou pei ki pour travay - ou pe reste ladan an term sekirite, lapropte, pri lavi. Be ler ou al vote ki ou pour deside.

Alor nou'n anmenn en keksoz pour ou la. Nou pe dir ou menm ler lalis voter pou'n fermén e ou pour ganny 18an, ant sa dat ki in fermén avek dat

ki eleksyon i fer, nou pe donn ou sa loportinite pour ou vote sa zour. Me solman ou bezwen al anrezistre koman ou responsabilite personnel.

E Mr Speaker nou pa pour kapab fors bann zenn fer sa. Sel keksoz ki nou kapab ankouraz zot, pour fer. Aköz nou koman bann adilt responsab nou kontinyen travay pour amelyor nou pei. E lazénés par konsekans i benefisyé.

Lazenés an fet li dan tou Bidze ki vini, i annan en konponan larzan li ki i gannyen. Enkli dan Bidze Komisyon Eleksyon ki la devan nou.

Aküz letan zot fer bann ledikasyon voter, zot al dan bann, zot fer bann *outreach programs*, zot al dan bann lekol post segonder. Lazénés pe benefisyé. Dan tou keksoz ki nou fer lazénés i annan en par ladan.

E alor zot, zot bezwen zot osi vin devan aköz pei pe sanze pe modernize, pe avanse. Sesel i bezwen bann nouvo, lide, i bezwen bann nide kreativ, bann nide inovativ.

Nou bezwen bann nouvo dirizan pour ki nou aret antann sa bann kalite polemik, politik ki nou tande la anndan dan Lasanble Nasyonal tou le semenn.

Nou bezwen anmenn bann keksoz ki pli *fresh* e ki *response* avek legzizans letan ki nou pe viv ozordi. E si ou lazenes ou kontinyen reste a lekar. Nou pour mank en loportinite pour nou anbelir nou demokrasi. E alor lenvitasyon i pour ou, desann al anrezistre.

Mon pa kapab mank sa loportinite Mr Speaker, pour dir wi, nou pe koz lo bann zenn ki pour ganny 18an. Konmsi nou pe fer zot en kado pour bann ki pour ganny 18an ant sa dat ki rezis voter pour frenmen avek letan eleksyon pour fer.

Me otreman i annan bann lezot dimoun ki zot, zot pa ankor ditou anrezistre. Zot reste touzour bann *first time voters*, menm ler zot avanse dan laz. Anfet mon fek zwenn en msye Mont Buxton, pa tro lontan mon ti pe vizit en fanmir, e sa msye in vin reste kot enn son ser. I annan laz sekirite li. Solman zanmen in anrezistre pour vote. Be bann dimoun koumsa nou bezwen ankouraz zot pour partisipe.

Akoz zisteman menm son laz i avanse, i osi bezwen partisip dan ki kalite dirizan ki i oule diriz nou pei. E ki kalite Gouvernman ki i oule.

Mr Speaker, alor mon ava termin lo la. Sesel i nou pei, nou enn pti pei, e annou mazin en

bato. En navir lo lanmer pe diriz ver en direksyon. Sa navir i nou pei, e tou dimoun abor koman bann matlo i annan en responsabilite.

E sa i enkli pour ou ki pe ekout mwan dan lakour ki bezwen anrezistre e al vote. Ou rol ki ou pei i demann ou pour fer enn fwa tou le 5an, se partisip dan sa eleksyon. E swazir meyer swa pour ou pei.

Sa stabilite avek sa progre ki nou'n akonplir ziska la, sirtou dan sa dernyen 4an edmi, nou ti'n tonm preski lo nou zenou. Me get sa mirak ki'n arive avek benediksyon Bondye, ki nou'n kapab remet nou pei lo en semen progre avek stabilite.

Si nou les sa loportinite ki nou annan ozordi sap nou, nou riske pa zanmen ganny sa Sesel beni ankor pour nou zwir sak zour ki soley i leve.

Alor nou annan en loportinite pour nou tenir nou pei dan nou de lanmen for, kit li lo semen progre avek stabilite e asire ki i reste en pei ki tou Seselwa i trouv son plas.

E ki napa okenn parti ouswa politisyen ki vini, e ki fer krwar zot, zot bann msye ki pour kontrol nou lavi dan fason ki zot anvi. Mersi Mr Speaker.

(APPLAUSE)

MR SPEAKER

Mersi Onorab. Mersi tou bann Onorab pour zot partisipasyon dan deba. Nou pe, nou'n termin deba la. Me selman mon bezwen anvoy Repons Vis-Prezidan pour demen matin.

Donk nou pour *adjourn* Lasanble. Demen *matin* mon bezwen met ler komansman Lasanble 9er 15. E zis pour eksplik zot, nou annan en vizit en delegasyon Maldivyen ki'n ariv dan pei la apre midi. E on bezwen resevwar zot demen. So nou a komans enn pti pe avek dele 9er 15. Mersi. Lasanble a *adjourn*.

(ADJOURNMENT)